

Ulloq: 6. juli 2021  
Allaffik: Nordatlantkontoret  
Suliarinn.: Amanda Alberte  
Heino Stilling  
Suliaq nr.: 2019-490-0141  
Dok.: 1810327

## Uunga missingiut

## Siunnersuut

uunga

# Kalaallit Nunaanni pinerluttulerinermi inatsisip aamma Kalaallit Nunaanni eqqartuussisarnermik inatsisip allanngortinneqarnissaannut inatsit

(Nuummi inissiisarfimmi kinguaassiuutitigut pinerluuteqarsimasunut katsorsaannermut inissanik pilersitsineq, ukiukinnerusunik pinngitsaaliinermi pineqaatissiisutit sakkortusinerat, ataqqinassutsimik ajuallatsitsinernut sakkortuunut pisortanit utaqqisitaasumik unnerluutigineqarneq, aningaasarsianik nammineerluni malunnarunnaarsitsiniaanerit pinerluutinngortinnerat, iluanaarutininik arsaarinnissinnaanerup annertusinera, nakkutigineqartussanngorluni eqqartuunneqarnermut atatillugu tarnip pissusaanik nakorsamit katsorsarneqarnissamut peqquneqarneq)

## § 1

Kalaallit Nunaanni pinerluttulerinermik inatsimmi, tak. inatsisitut nalunaarut nr. 1045, 7. september 2017-imeersoq, inatsit nr. 1718, 27. december 2018-imeersumi § 2-kkut, inatsit nr. 168, 27. februar 2019-imeersumi § 1-ikkut aamma inatsit nr. 1056, 30. juni 2020-meersumi § 1-ikkut

allanngortinneqartumi tulliuttunik allannguisoqassaaq:

1. § 20, *imm.* 2-mi, »unnerluussut,«-ip kingorna pkt. 2.-tut ilanngunneqassaaq: »Taamaattoq innarlīgaasup qinnuteqarneratigut pisortat unnerluutiginnissinnaapput

1) suliani sakkortuumik pasisaaneq eqqortuunngippat,

2) suliani pisuutitsineq tusagassiutit amerlasuunniit atuarneqartartut imaasigut saqqummiunneqarsimappat imaluunniit siaruaanneqarluni, pasisaanerlu innarlīgaasumik annertuumik ajoqusiisinnaappat,

3) suliani inuk pissutsimik pisortani atorfimminik suliaminilluunniit annaasaqassutigisinnaasaanik pasisaappat, imaluunniit

4) suliani, sakkortuumik pasinninneq kinaassutsimik isertuussilluni siaruaanneqarsimappat.«.

2. § 22, *imm.* 1-imi »namminerisamik unnerluutiginninneq«-p kingorna ikkunneqassaaq: »aamma pisortat unnerluutssinissaannut piunasaqarneq«, aamma »suliaq«-p kingorna: »imaluunniit piunasaqarneq«, aamma »suliassanngortitsineq«-p kingorna: »imaluunniit unnerluussinissamut piunasaqarnermik saqqummiussineq«.

3. § 22, *imm.* 2-mi, *pkt.* 2.-tut ikkunneqassaaq:

»Pisuusut ilaannut tamanut pisortat unnerluutiginninnissaannik piunasaqarnissamut piffissarititaasoq qaangerneqarsimappat, kisianni pisuusunut sinnerinuunngitsiq, taamaattoq unnerluussisussaataasut aalajangiinissaat apeqqutaassaaq, taakkununga unnerluutiginninnissamut piunasaqarneq aamma ingerlanneqassanersoq.«

4. § 22, *imm.* 3-mi »namminerisamik unnerluutiginninneq«-p kingorna ikkunneqassaaq: »imaluunniit pisortat unnerluutiginninnissaannut piunasaqarneq«.

5. § 77-imi *imm.* 3-tut ilanngunneqassaaq:

»*Imm.* 3. Pineqaatissiissummik aalajangersaanermi kanngunarsaaneq pineqartoq inatsisinik unioqquitsinermut attuumassuteqartoq pingaartinneqassaaq, taamaliorneq 18-it inorlugit ukiulimmut iliuserineqarsimappat«.

6. § 111, *Imm.* 1-mi, »pinerluttulerinermi inatsisitigut akisussaataaeramik kinguneqarsinnaavoq« kingorna ilanngunneqassaaq: »iliuserisaq § 111 a-mut ilaangippat«.

7. § 111-p kingorna ilanngunneqassaaq:

»§ 111 a. Aningaasanik malunnarunnaartitsiniaasutut eqqartuunneqassaaq inuk aningaasanik pinerluuteqarnikkut toqqaannartumik toqqaannangitsumilluunniit pissarsiarisimasaminik allanngortitsisoq imaluunniit nuussisoq, inatsisinik unioqquitsinikkut pinngorfeqarnerat

toqqorterniarlugu imaluunniit malunnarunnaartinniarlugu.«.

8. § 120 atorunnaassaaq.

9. § 135, *imm. 1, nr. 3*-mi, »malissavai« kingorna ilanngunneqassaaq: »tarnip pissusaanik imaluunniit«.

10. Immikkoortoq II-mut qulequtaq imatut allanneqassaaq:

### »Immikkoortoq II

#### **Pineqaatissiinerit ataasiakkaat aamma pinerluuteqarnermi inatsisitigut kingunegartitsinerit allat«**

11. § 168, *imm. 1, nr. 2*-mi, »inatsisinik unioqqutitsineq«-rup kingorna ilanngunneqassaaq: »imaluunniit ikiaroorartut pillugit inatsisinik unioqqutitsineq«.

12. § 196, *imm. 2*-mi, nr. 3-p kingorna ilanngunneqassaaq:

»4) eqqartuunneqartoq perorsaariaatsikkut, nakorsatut imaluunniit allatigut immikkut ittumik ikiorniarlugu,

5) pinngitsoortinniarlugu, inissinneqarsimasup qanigisami arlaata suliffigisaani inissinneqarnissaa,

6) pinngitsoortinniarlugu, eqqartuunneqarluni inissinneqarsimasup pinerluffigisimasaata atorfilittap imaluunniit taassuma qanigisaata suliffigisaani inissinneqarnissaa«.

Nr. 4 aamma 5 kingorna tassaalissapput nr. 7 aamma 8.

13. § 215-imi *imm. 2*-p kingorna *imm. 3*-tut ikkunneqassaaq:

»*Imm. 3.* Pinerluuteqarsimasunik isumaginnittoqarfiup aalajnagersinnaavaa, pulaartut inissinneqarsimasup pulaarnissaannut akuersissummik piniaqqaassasut. Pulaarnissamut akuersissummut piunasaqaataasinnaavoq, pulaartut misissorneqarnissamut akuersinissaat. Misissuineq tassaasinnaavoq pulaartut atisaannik misissuineq, pulaartut pulaarnerminni atugaannik, aamma annertunerusumik pulaartut qaatiuguinik aamma nassataannik misissuineq.«

Taassuma kingorna *imm. 3* *imm. 4*-nngussaaq.

14. § 215, *imm. 3*-mi, *imm. 4*-nngortussami, »*imm. 1, pkt. 1.* malillugu« allanngortinneqassaaq imaalillugu: »pulaarnermut.«

15. § 221-p kingorna qulequtaq sioqqullugu § 222 sioqqullugu ikkunneqassaaq:

»§ 221 a. Inissiisarfiup pisortaata imaluunniit inuup tamatumunnga piginnaatitaasup aalajangersinnaavaa inissinneqarsimasoq supoorsilluni misiligummik imaluunniit quumik misiligummik tunniussissasoq, imigassamik, ikiaroorartunik allatigulluunniit akuutissanik inatsisit nalinginnaasumik atuuttut malillugit inerteqqutaasunik iisaqarsimasinnaanera misissorniarlugu.

*Imm. 2. § 221, imm. 4, assigisaanik atorneqassaaq.*

*Imm. 3. Supoorsilluni misiligutit nakkutigineqarnissaasa aamma quumik misiligutit nakkutigineqarnissaasa piviusunngortinnissaannut Kalaallit Nunaanni Pinerluuteqarsimasunik Isumaginnittoqarfiup aqutsisui maleruagassanik aalajangersaassapput.«.*

**16. § 226-mi nr. 3-p kingorna ilanngunneqassaaq:**

»4) § 221 a malillugu supoorsilluni misiligummik imaluunniit quumik misiligummik tunniussinissaq itigartitsissutigineqarpat,

5) imigassamik, ikiaroorartunik imaluunniit akutissanik allanik inatsit nalinginnaat malillugit inerteqqutaasunik iisisimanermi,«.

Nr. 4-6 kingorna tassaalissapput nr. 6-8.

**17. § 227, imm. 2-mi, nr. 3-p kingorna ilanngunneqassaaq:**

»4) § 221 a malillugu supoorsilluni misiligummik imaluunniit quumik misiligummik tunniussinissaq itigartitsissutigineqarpat,«

Nr. 4-5 kingorna tassaalissapput nr. 5 aamma 6.

**18. § 227, imm. 2, nr. 4-mi, nr. 5-nngortussami, »imaluunniit aanngajaarniutit« kingorna ikkunneqassaaq: »imaluunniit aanngajaarniutit allat, inatsit nalinginnaasoq malillugu inerteqqutaasut, «.**

## § 2

Kalaallit Nunaanni eqqartuussisarneq pillugu inatsimmi, tak. inatsisitut nalunaarut nr. 1581, 13. december 2016-imeersoq, inatsit nr. 1056, 30. juni 2020-meersukkut kingullermik allannngortinneqartumi tulliuuttunik allannguisoqassaaq:

**1. § 44, imm. 2-mi, »sakkortuumik pineqaatissiissut«-ip kingorna ilanngunneqassaaq: »imaluunniit inatsisitigut kinguneqartitsineq«.**

**2. § 311-ip kingorna qulequtaq sioqqullugu § 312 sioqqullugu**

ikkunneqassaaq:

»§ 311 a. Pisortat inatsisit malillugit unnerluussuteqarnissaannut qinnuteqarnissaq piumasqaataappat, taamaallaat unnerluussuteqartoqarsinnaavoq tamanna pillugu qinnuteqaat § 302 malillugu namminerisaminik unnerluussuteqarsinnaasoq tamatumunnga qinnuteqartuuppat. Pisinnaatitaasumit nalunaarutiginninneq pisortat unnerluussinissamik qinnuteqaataattut isigineqasaaq, nalunaarutiginninnermit allamik takusaqarsinnaanngikkaanni. Namminerisamik unnerluutiginninneq aallartinneqarsimappat, pisortat unnerluutiginninnissaat qinnuteqaatigineqarsinnaanngilaq. Unnerluutiginninnermut oqartussat pisortat unnerluussinissamut qinnuteqaataat malissallugu itigartitsissutigisinnaavaat, arlaata pisooqataasup malersorneqarnissaa pisinnaajunnaarsillugu. Qinnuteqaat pisooqataasut ilaannaannut tungasuuppat, pisooqataasut allat mattutinngikkaluarlugit, unnerluussinermut oqartussat malersuineq taakkununnga annertusisissinnaavaat, pisinnaatitaasoq tamanna pillugu oqaaseqarnissamut periarfissinneqareernermi kingorna tamatumunnga akerliunngippat. Taamaassappat pkt. 4. atorneqassaaq.

*Imm. 2.* Naalagaaffiup unnerluussisua aamma politiit pisortaat imm, 1-imi aalajangersakkat apeqqutaatinnagit kinguartinneqarsinnaanngitsunik iliuseqarsinnaapput, iliuserineqarsimasoq isumaqarfigineqarpat tassaasoq unnerluussuteqarnissamut aalajangiisinnaasoq imaluunniit tamatumunnga qinnuteqarsinnaasoq, ilisimaneqanngitsoq aamma pissutsit aallaavigalugit isumaqartoqarsinnaalluni unnerluussuteqarnissaq aalajangiunneqassasoq imaluunniit qinnuteqaatigineqarluni. Qinnuteqaat eqqartuussuteqartoqartinnagu imm, 1 malillugu utertinneqarpat, malersuineq unitsinneqassaaq, unnerluussuteqarnermut oqartussat nalilinnngippassuk tamat mianerineqarnissaat pissutigalugu malersuinerup ingerlatiinnarneqarnissaa pisariaqartoq.«.

**3.** § 452, *imm. 2*-mi, »allatut pineqaatissiineq«-up kingorna: »imaluunniit inatsisitigut kinguneqartitsineq« ilanngunneqassaaq.

### § 3

*Imm. 1.* Inatsit ulloq [...] atuutilissaaq.

*Imm. 2.* Pinerluttulerinermi inatsimmi § 215, *imm. 3* malillugu malittarisassat aalajangersarneqarsimasut atuutiinnassapput, tak. inatsimmut nalunaarut nr. 1045, 7. september 2017-imeersoq, atorunnaarnissaasa imaluunniit pinerluttulerinermi inatsimmi § 215, *imm. 4* malillugu malitassanik taarserneqarnissaasa tungaanut.

# *Inatsisissatut siunnersuummut oqaaseqaatit*

## *Oqaaseqaatit nalinginnaat*

### *Imai*

<b>1. Aallaqaasiut .....</b>	<b>7</b>
<b>2. Inatsisissatut siunnersuummi immikkoortut pingaarnerit .....</b>	<b>9</b>
2.1. Ataqinassutsimik ajuallatsitsinerit unnerluutiginerat.....	9
2.1.1. <i>Inatsisit atuuttut .....</i>	<i>9</i>
2.1.2. <i>Justitsministeriap eqqarsaatai aaqqissuussunissaatullu siunnersuutigineqartoq ..</i>	<i>11</i>
2.2. Meeqqanik kinguaassiuutitigut atoqateqarluni aamma kinguaassiuutitigut allatut iliuuseqarluni pinngitsaaliinermi pineqaatissiissutit sakkortusinerat.....	15
2.2.1. <i>Inatsisit atuuttut .....</i>	<i>15</i>
2.2.2. <i>Justitsministeriap eqqarsaatai aaqqissuussinissatullu siunnersuutigineqartoq ....</i>	<i>18</i>
2.3. Aningaasarsianik malunnarunnaarsitsiniaaneq pillugu namminerisamik aalajangersakkamik eqqussineq .....	19
2.3.1. <i>Inatsisit atuuttut .....</i>	<i>19</i>
2.3.2. <i>Justitsministeriap eqqarsaatai aaqqissuussinissatullu siunnersuutigineqartoq ....</i>	<i>21</i>
2.4. Arsaarinnineq .....	24
2.4.1. <i>Inatsisit atuuttut .....</i>	<i>24</i>
2.4.2. <i>Justitsministeriap eqqarsaatai aaqqissuussinissatullu siunnersuutigineqartoq ....</i>	<i>28</i>
2.5. Nakkutigineqartussanngorluni eqqartuussaannermut atatillugu tarnip pissusaanik ilisimassalimmit katsorsagassanngorluni peqquneqarneq.....	31
2.5.1. <i>Inatsisit atuuttut .....</i>	<i>31</i>
2.5.2. <i>Justitsministeriap eqqarsaatai aaqqissuussinissatullu siunnersuutigineqartoq ....</i>	<i>32</i>
2.6. Inissiisarfimmik naammassinniffiusussamik toqqaaneq.....	32
2.6.1. <i>Inatsisit atuuttut .....</i>	<i>32</i>
2.6.2. <i>Justitsministeriap eqqarsaatai aaqqissuussinissatullu siunnersuutigineqartoq ....</i>	<i>33</i>
2.7. Imigassamik aamma aanngajaarniutinik atornerluinerit akiorniarlugit suliniutit. ....	36
2.7.1. Pulaartunik misissuineq .....	36
2.7.2. Isertitsivinni quumik aamma supoorsilluni misiligutit .....	41
<b>3. Danmarkip nunani tamalaani pisussaaffiitut pissutsit.....</b>	<b>48</b>
<b>4. Pisortanut aningaasaqarnikkut kinguneri aamma atuutsitsilernerup kinguneri..</b>	<b>50</b>
<b>5. Inuussutissarsiortunut il. il. aningaasaqarnikkut allaffissorniukkullu kinguneri..</b>	<b>51</b>
<b>6. Innuttaasunut allaffissornikkut kinguneri .....</b>	<b>51</b>
<b>7. Silap pissusianut aamma avatangiisinut kinguneri .....</b>	<b>51</b>
<b>8. EU-mi inatsisinut pissutsit .....</b>	<b>51</b>
<b>9. Oqartussat aamma suleqatigiiffillu il. il. tusarniaaffigineqartut .....</b>	<b>51</b>
<b>10. Immersugaq eqikkaaffiusoq .....</b>	<b>52</b>

## 1. Aallaqqaasiut

Danskit naalackersuisuisa kissaatigaat Naalagaaffeqatigiinnermi Kalaallit Nunaatalu akornanni naligiissumik, pitsaasumik nukittorsagaasumillu peqatigiittoqassasoq. Kalaallit Nunaat peqatigalugu naalackersuisut danskit akisussaaffeqarfigisaat ineriartortikkusuppaat, Naalackersuisut taamatut iliorniarput ilaatigut oqartussaaffinni Danmarkip akisussaaffigisaani Kalaallit Nunaanni inatsisit naleqqussarnerisigut.

Suliamut tamatumunnga atatillugu Justitsiministeriap inatsisissatut siunnersuut manna suliaraa. Inatsisissatut siunnersuut allannguutiniq assigiinngitsunik arlalinnik imaqarpoq, ilaatigut Naalackersuisut, Inatsisartut kiisalu Kalaallit Nunaanni Eqqartuussiveqarnermut Siunnersuisoqatigiit kissaatigisaannik tunuliaqutaqartunik.

Ataqinassutsimik ajullatsitsinermik suliani sakkortunerpaani pisortat utaqqisitaasumik unnerluussisinnaanissaat inatsisissatut siunnersuutip siullertut siunertaraa. Naalackersuisut qinnuiginninnerat tunuliaqutaralugu allannguisoqarpoq, taakku Inatsisartut aalajangernerisa malitsigisaannik ataqinassutsimik ajullatsitsinerit pillugit maleruagassat allanngortinneqarnissaat kissaatigalugu saqqummiussimmata, taamaasilluni unioqutitsinerit imaluunniit sakkortuumik unioqutitsinerit erseqqinnerusumik taaneqartut pisortat utaqqisitaasumik unnerluussuteqarnerannik kinguneqarsinnaasunngorlugit.

Inunnik 18-it inorlugit ukiulinnik kinguaassiuutitigut atoqateqarluni allatulluunniit kinguaassiuutitigut iliuuseqarluni pinngitsaaliinernut pineqaatissiissutit sakkortusineqarnissaat inatsisissatut siunnersuutip aappaattut siunertarivaa, tamatumunnga atatillugu piumasaqaataavoq ullumikkumut naleqqiullugu pineqaatissiissutit annertussusaasa 50 procentimik sakkortusineqarnissaat, taamaasilluni innarligaasup kannguttaatsuliorfigineqarnera pineqaatissiissutikkut annerusumik takutinneqartassalluni. Inatsisissatut siunnersuutip peqatigisaanik siunertarivaa, qanimut peqatigiinnissamat tunngavik saneqqullugu kinguaassiuutitigut pinerluuteqarsimasut Nuummi Isertitsivimmut nuunneqarsinnaanerisa inatsitigut tunngavissinnissaa, tassani katsorsarneqarnissamat inissanik pilersitsisoqassammat, kinguaassiuutitigut atonerlueqqinnerit pinaveersaartinniarlugit.

Inatsisissatut siunnersuutip ilai taakku kalaallit danskillu ataatsimoorussamik suleqatigiissaasa kaammattuutaanik

piviusungortitsisuupput, taakku siunertarigamikku Kalaallit Nunaanni meeqqat inuusuttullu aarlerinartorsiortut atugaasa pitsanngorsarnissaannut kaammattuutunik aalajangersimasunik tikkuussinissaq. Suleqatigiissitap kaammattuutai nalunaarusiami “Kalaallit Nunaanni meeqqanut inuusuttunullu aarlerinartorsiortunut sakkortunerusumik suliniuteqarniarluni kalaallit danskillu suliaqarfiit akimorlugit suleqatigiinnerat” august 2020-imeersumi tamanut saqqummiunneqarpoq.

Nammineerluni aningaasarsianik malunnarunnaarsitsiniaanerup inertequtaalersinnissaa inatsisissatut siunnersuutip pingajuattut siunertaraa, taamaasiornikkut aningaasarsianik malunnarunnaarsitsiniaaneq akiorniarlugu suliniutit sakkortusineqassammata. Tamanna pivoq Kalaallit Nunaanni Eqqartuussiveqarnermut Siunnersuisoqatigiit aamma naalagaaffiit akornanni suleqatigiiffiup Financial Action Task Forces-ip (FATF) kaammattuuteqarnerisigut.

Arsaarinninnermut maleruagassat allanngortinneqarnissaat inatsisissatut siunnersuutip sisamaattut siunertarivaa, ilaatigut pigisat inatsisunik unioqquitsissutaasut meeqqanit 15-it inorlugit ukulinnit arsaarinnissutigineqarnissaat periarfissaalersinniarlugu, ilaatigullu suliani ikiaroonartut pillugit inatsisunik unioqquitsinermut tunngasuni pisuussutitigut ajunngitsorsiassaatinik arsaarinninnissaq ajornannginnerulersinniarlugu. Naalakkersuisit aamma Kalaallit Nunaanni Politiit kissaateqarnerisigut taamatut allannguisoqarpoq, tamannalu Kalaallit Nunaanni Eqqartuussiveqarnermut Siunnersuisoqatigiinnut saqqummiunneqarpoq, soorlu aamma tamanna Danmarkimi 2019-imili ajornanngitsoq.

Nakkutigineqartussanngorluni eqqartuussaannermut atatillugu atugassarititaasunik aalajangersaanermi pinerluttulerinermi inatsimmi tunngavissarititaasut erseqqissaatiginissaat inatsisissatut siunnersuutip tallimaattut siunertaraa. Nakkutigisassanngorluni eqqartuussaannermut atatillugu tarnip pissusaanik ilisimasalimmit katsorsarneqarnissamut atugassarititaasut eqqartuussiviup aalajangersarsinnaagai aalajangersakkap oqaasertalernerani siunnersuutikkut erseqqissumik takuneqarsinnaassaaq.

Pinerluuteqarsimasunik isumaginnittoqarfiup inissiisarfiini inissinneqarsimasut imigassamik, ikiaroonartumik il. il. iisaqarsimasinnaanerit misissorniarlugu supoorsilluni nakkutilliinerit aamma quumik nakkutilliinerit – misiligutaasumik aamma aalajangersimasumik pasitsaassaqarnermi – ingerlanneqarsinnaanerisa qulakkeernissaat inatsisissatut siunnersuutip arfinilissaattut siunertaraa.



Taamatut iliornerup Kalaallit Nunaanni Pinerluttunik Isumaginnittut periarfissaqalissaaq inissinneqarsimasut imigassamik, ikiaroorartumik il. il. anngiortumik eqqussisarnerat iisisarnerallu angusaqarfiulluarnerusumik akiorsinnaanngussavaa. Suliniutinut ilaavoq, Kalaallit Nunaanni Pinerluttunik Isumaginnittut aanngajaarniutinik naamasartumik qimmitaarnissaanut 2021-mut aningaasanut inatsimmi aningaasaliisoqarsimanera.

Qanimut peqatigiinnissamut tunngaviup saneqqussinnaaneranik periarfissap inatsisissatut siunnersuutip arfineq aappassaattut siunertaraa, taamaaliornikkut inissinneqarsimasup qanigisami suliffigisaani inissinneqarsinnaanera pinngitsoortinneqarsinnaassammat imaluunniit inissinneqarsimasup pinerluffigisimasaata imaluunniit taassuma qanigisaata suliffigisaani inissinneqarsinnaanera pinngitsoortinneqarsinnaassammat.

## **2. Inatsisissatut siunnersuutip immikkoortui pingaarnerit**

### **2.1. Ataqqinassutsimik ajuallatsitsinerit unnerluussutigineqarnerat**

#### *2.1.1. Inatsisit atuuttut*

Pinerluttulerinermik inatsimmi § 99, imm. 1 malillugu, inuup inuup allap ataqqinassusaa oqaatsinik iliuitsinilluunniit ajuallannartunik atuilluni imaluunniit iliuitsit ajuallatsitamut inoqatit akornanni nikanarsaataasinnaasut pillugit pasilliutinik saqqummiussilluni siaruaalluniluunniit ajuallatsikkuniuk imaluunniit taanna allanut atatillugu ajoquseruniuk, inuk pineqartoq ataqqinassutsimik ajuallatsitsisutut eqqartuunneqarsinnaavoq.

Pinerluttulerinermik inatsimmi § 99, imm. 2-p malitsigisaanik kinaluunniit pasilliutip eqqortuunera uppersarneqartoq pillugu eqqartuunneqarsinnaanngilaq, imaluunniit taanna ajunngitsumik eqqarsarluni saqqummiunneqarsimappat, pineqartorlu oqaaseqaateqarnissamut pisussaaffeqarsimappat imaluunniit tamat soqutigisaannik isumaginninniarsimappat pisussaaffeqarluni iliuseqarsimappat, imaluunniit imminerminut allanullu pitsaanerpaq isumaginiarsimallugu.

Taamaattoq kinaluunniit pasilliummik uppersarneqarsinnaasumik saqqummiussisoq eqqartuunneqarsinnaavoq, pasilliut ilusiligaanermigut pisariaqanngitsumik ajuallannartuuppat, imaluunniit iliuseqartoq

taassuminnga saqqummiussinissaminut naammaginartumik tunngavissaqarsimangippat, tak. pinerluttulerinermi inatsimmi § 99, imm. 3.

Uppernarsaalli inatsisunik unioqqutitsisutut ingerlanneqassanngilaq, tassunga pasillerneqartoq nunami maani nunaniluunniit allani inaarutaasumik eqqartuunneqarnermini pinngitsuutinneqarsimappat, tak. pinerluttulerinermi inatsimmi § 99, imm. 4.

Ataqqinassutsimik ajuallatsitsisumik pasilliut tunngavissaqanngippat, ajuallatsinneqartup oqaaseqaatai malillugit tamanna pillugu eqqartuussutip inerniliusnaanut oqaaseqaatit ilanngunneqassapput, tak. pinerluttulerinermi inatsimmi § 99, imm. 5.

Pinerluttulerinermi inatsimmi § 99, imm. 6 malillugu, kinaluunniit ataqqinassutsimik ajuallatsitsisumik pasilliteqartutut eqqartuunneqartoq, taamaallaat eqqartuussutip inerniliussaanik imaluunniit ilanngullugu eqqartuussutip tunngavilersuutaanik aviisimi tamanit atuarneqarsinnaasumi ataatsimi arlalinniluunniit tamanut saqqummiussinermigut ataqqinassutsimik ajuallatsitsinermini aningaasartuutigineqartut matussuserneqarnissaannut, ajuallatsinneqartup tunngavilersuineratigut aningaasanik eqqartuussiviup annertussusiligaanik akiliinissamut pisussaaffilerneqassaaq. Tamanna atuuppoq naak eqqartuussut taamaallaat imm. 5 malillugu saqqummiussinermik atorunnaarsitsinerugualuartoq.

Pinerluttulerinermi inatsimmi § 99, imm. 7-ip malitsigisaanik kinaluunniit inummik toqukkut qimagutereersimasumik ataqqinassutsimik ajuallatsitsisoq, imaluunniit toqukkut qimagutereersimasumut ataqqinassutsimik ajuallatsitsisumik oqaaseqaatinik siaruarterisoq eqqartuunneqassaaq.

Pinerluttulerinermi inatsimmi § 20 imm. 2-p malitsigisaanik ataqqinassutsimik ajuallatsitsineq pillugu pinerluttulerinermik inatsimmi § 99 malillugu, namminerisamik unnerluutiginninnermik kinguneqassaaq, tamatuma kingunerissallugu suliat pineqartut unnerluussisutut oqartussanit unnerluussutigineqassanngitsut, kisianni innarlugaasumit namminermit unnerluussutigineqassallutik.

Pinerluttulerinermi inatsimmi § 22 imm. 1-imi allaqqavoq, namminerisamik unnerluussisinnaatitaaneq atorunnaartartoq, unnerluussisinnaatitaasoq suliassanngortitsisimangikkaangat, kingusinnerpaamik qaammatit 6-t

qaangiunneranni pineqartup pisumik ilisimasaqalerneraninngaanniit, naammattumik tunngavissaqarluni suliassanngortitsinissamut.

Kalaallit Nunaanni eqqartuussisarnermik inatsimmi § 302, imm. 1-imi takuneqarsinnaavoq pinerluttulerinermik suliat namminerisamik unnerluussutigineqartussat, saqitsaannermik suliat suliarineqarnissaat pillugu maleruagassat malillugit suliarineqassasut. Tamatuma kinguneraa, innarlerneqartup nammineerluni pinerluttulerinermi suliamik qaqitsisuussasoq, saqitsaannermik eqqartuussisarnermi suleriaaseq malillugu.

§ 317, imm. 1 malillugu inatsisunik unioqqutitsinermut pisortat unnerluussisussaataitanerat pisinnaavoq, tamat soqutigisaasa taamatut ittariaqartippassuk. Tamannali atuutinnigilaq unioqqutitsineq pillugu namminerisamik pinerluttulerinermik suliameq unnerluussisooqareersimatillugu.

### *2.1.2. Aaqqissuussinissaq pillugu Justitsministeriap eqqarsaatai*

Naalakkersuisut Inatsisartut aalajangernerat tunuliaqutaralugu kissaatigaat ataqqinassutsimik ajuallatsitsinermut maleruagassat allanngortinneqassasut, taamaasilluni unioqqutitsinerit imaluunniit pinerluttulerinermik inatsimmi § 99 malillugu sakkortuumik unioqqutitsinerit erseqqinnerusumik taaneqartut utaqqisitaasumik pisortanit unnerluussutigineqarsinnaassallutik.

Pillaasarneq pillugu inatsisip allanngortinneqarnissaa pillugu inatsit nr. 1719, 27. december 2018-imeersukkut (Eqqissisimanissamik ataqqinassutsimillu kanngunarsaanerit) danskit pillaasarnermut inatsisaanni § 275-ikkut suliat eqqissimanissamik ataqqinassutsimillu kanngunarsaanerit pillugit maleruagassat annertusineqarput, taamaasilluni ataqqinassutsimik kanngunarsaanerit erseqqinnerusumik taaneqartut arlaqartut namminerisamik unnerluussutigineqarnissaat piunnaarlugu pisortat utaqqisitaasumik unnerluussisinnaanngorlugit.

Allannguinnermut Pillaasarnermut Inatsimmut Siunnersuisoqatigiit eqqissisimanissamik ataqqinassutsimillu kanngunarsaanerit pillugit isumaliutissiissutaat (kingorna isumaliutissiissummik taagorneqartoq) nr. 1563/2017 tunngavigineqarpoq. Ataqqinassutsimik kanngunarsaanerit suliameq unnerluussuteqarnissaq naalagaaffiup qanoq annertutigisumik suliassarisariaqarneraa isumaliutissiissummi Pillaasarnermut Inatsimmut Siunnersuisoqatigiit eqqarsaatersuutigaa. Taamaasilluni ataqqinassutsimik

kanngunarsaanermi pisortat utaqqisitaasumik unnerluussisinnaanerisa annertusinerat nalinginnaasumik politiit aamma unnerluussisutut oqartussat sulianik sakkukinnerusunik aamma pillaatissiissutigissallugit nalikinnerusumik suliassaqaqarnerulernissaat takuneqarsinnaasutut oqaatigineqarpoq, suliat taakku (pisortat) pillaasarnermik sulianut ilaasariaqaqnginnerarlugit. Tamanna atuuppoq naak pisortat utaqqisitaasumik unnerluussisussaataitanerat isumaqaqngitsoq, unnerluussinermut oqartussat unnerluussinissaat innarligaasup piunasaqaatigisinnaagaa, kisianni taamaallaat isumaqarluni unnerluussuteqarnissamut tunngavissaqaqnersoq aalajangerniarlugu pisortat unnerluussinissaannut qinnuteqaat nalinginnaasumik suliamik sularinninnermik kinguneqassasoq. Unnerluussisutut oqartussat qinnuteqaatinik taamatut ittunik sularinninnermut aamma suliat taamatut ittut unnerluussuteqarnissamut tunngavissaqaqarpat, suliat eqqartuussivimmut saqqummiunnissaannut annerusumik suliassaqaqalersussaapput. Tamanna suliat amerlinerisigut eqqartuussiviit artukkerneqarnerulernerat ilassutaasussaavoq. Atugassarititaasunik atuinerup namminermi mianerineqarnissaa aamma pissutsit pillaatissiissutigissassallu nalinginnaasumik nalikitsuunerisa mianerineqarnissaat eqqarsaatigigaanni, Pillaasarnermut Inatsimmut Siunnersuisoqatigiit isumaqarput ataqqinassutsimik kanngunarsaanernut assigiinngitsunut tamanut pisortat utaqqisitaasumik unnerluussisinnaanerit nalinginnaasumik eqqutissallugu eqqarsarnartoqartussaasoq.

Pillaasarnermut Inatsimmut Siunnersuisoqatigiit isumaqarput, pillaasarnermi inatsimmi § 267 malillugu ataqqinassutsimik kanngunarsaanerit, ilaatigut pinerluttulerinermi inatsimmi § 99-imut assingusuusoq, ingerlaqqittumik namminerisamik unnerluussutigineqartariaqartut. Illuatungaatiigulli Pillaasarnermut Inatsimmut Siunnersuisoqatigiit isumaqarput, taamatut mamarliinerit, § 268-mut siunnersuummut ilaatinneqartut, pinerluttulerinermi inatsimmi § 99-imut ilaasut, tassalu sakkortuumik pasilliinerit, ilisimasaaqarpiarani saqqummiunneqartut imaluunniit siaruarterneqartut, tassaasut ataqqinassutsimik sakkortunerpaamik kanngunarsaanerisut, pisunilu taamatut ittuni pisortat utaqqisitaasumik unnerluussuteqarnissaat pissusisamisoorutut siunertamullu naapertuuttutut isigalugit, aamma pasilliineq isumaliutissiissutip saqqummiunneqarnerata nalaani § 275, imm. 2, pkt. 2.-mi atuuttumiittumi isikkoqartoq imaluunniit iluseqartoq kisiat eqqarsaatiginagu. Tamatuma saniatigut suliat taamatut ittut pisortat utaqqisitaasumik unnerluussuteqarnissaannut naleqqupput, tassani eqqortuunerannik uppernarsaatinik saqqummiussisoqassanngimmat. Taamatut iliornikkut siunnersuisoqatigiit aamma pingaartippaat,

ataqqinassutsimik kanngunarsaanermik suliani taamatut ittuni sakkortuumik parnaarusnaanermik eqqartuussuteqarnissaq suli periarfissaammat aamma suli periarfissaasariaqarluni.

Pillaasarnermik Inatsimmut Siunnersuisoqatigiit aamma eqqarsaatigaat teknikkikkut ineriartorneq internettip siaruaakkiarneranik imaqartoq, tamatumalu kinnguneranik ataqqinassutsimik kanngunarsaanerit annertuumik ajoqusiisinnaanerannik aarlerinaatit, politiit aamma unnerluussisutut oqartussat pillaasarnermi inatsimmi § 268 malillugu ataqqinassutsimik kanngunarsaanernut allanut sakkortuunut pisortat utaqqisitaasumik unnerluussisinnaanerat aqcutigalugu politiit aamma unnerluussinermut oqartussat ikiuussinnaanernut tunngavilersuutaasinnaanersoq, Illuatungaatigulli Pillaasarnermik Inatsimmut Siunnersuisoqatigiit isumaqarput ataqqinassutsimik kanngunarsaanernut sakkortunerpaanut angusaqarfiulluarmik illersuinissaq pissusissamisoortoq, ilanngullugu aamma aalajangersakkat nalinginnaasumik pinaveersaarsitsinermik sunniuteqarnissaat siunertaralugu, aamma taamatut illersuinerup aamma pisortat utaqqisitaasumik unnerluussisinnaanerannik aalajangersakkatigut pisinnaatitsinikkut. Taamatut illersuineq Pillaasarnermik Inatsimmut Siunnersuisoqatigiit isumaat malillugu pissusissamisuussaaq – aamma inatsisunik unioqcutitsinernut pisortat (utaqqisitaasumik) unnerluussisinnaanerannut ilaasunut naleqqiullugu isiginiaraanni – pingaartumik assersuutigalugu sakkortuumik pillaatisissutaasinnaasunik pasilliinernut aamma ajortisaarinerpassuarnut ilaatigut ataqqinassutsimik kanngunarsaanermik imaqartunik (ilisimasaqarpiarani pasilliinerunngitsunut), saaffiginnissutit taakku amerlanerujussuigut eqqugaasut annertoqisumik artukkerneqarnerannik kinguneqarsinnaasarput. Illuatungaatigulli Pillaasarnermik Inatsimmut Siunnersuisoqatigiit maluginiarpaat taamatut pisortat utaqqisitaasumik unnerluussisinnaanerannut aqcutissap annertusinera politiit unnerluussisutullu oqartussat suliassaasa amerlinerisigut pineqartut artukkerneqarumaartut, ilanngullugu pingaartumik ajortisaarinerit pillugit suliat, taakkunani oqaaseqaatit tuusintilikkaanik arlalinnik nalilersorneqartussanik amerlassuseqarsinnaasarmata, nalinginnaasumillu pinerluuteqartut amerlaqisut pillarneqarnissamut malersorneqartussaallutik. Tamatuma saniatigut suliat qaqutiguunngitsoq inatsisilerinikkut annertuumik eqqarsaatigineqartariaqartarput, pingaartumillu uppernarsaatinut atasumik ajornartorsiutinik nassataqartassallutik. Kingullertut taaneqartut assersuutigalugu ajortisaarinerpassuarnut atatillugu atuuttussaavoq, tamatumani unnerluutigineqartoq ilumut tassaasoq ataqqinassutsimik kanngunarsaataasumik internettikkut siaruaassisutut

uppernarsarneaannassannginnami, kisiannili aamma ajortisaarinerpassuit ilumut pineqartut uppernarsarneaqartussaalluni, aamma unnerluutigineqartup nammineq ajortisaarinerpassuarnut atatillugu ataqqinassutsimik kanngunarsaataasunik saqqummiussinini nalusimangikkaa uppernarsarneaqassalluni.

Pillaasarnermik Inatsimmut Siunnersuisoqatigiit tamanna tunuliaqutigalugu oqaatigaat, siunnersuisoqatigiit ataatsimoorlutik isumaqartut atugassarititaasut pingaaruteqanngitsoorunangitsut pingaartumik politiit aamma unnerluussinermut oqartussat sakkortuumik ataqqinassutsimut kannguttaalliornerit immikkoortiternissaannut, suliarinissaannut malersornissaannullu atortariaqassagaat, suliat amerlagunangillat suliat sakkortussusaannut naleqqiunneqarsinnaasussat. Tamatumunnga atatillugu oqaatigineqarpoq naak ataqqinassutsimik kannguttaatsuliornerit sakkortuut pineqaraluartut, iliuitsit pillaaatissutaasinnaanerat tamatigut pissusissamisoortuussanngitsoq.

Pillaasarnermik Inatsimmut Siunnersuisoqatigiit isumaliutissiissummi oqaatigaat, ataqqinassutsimut kannguttaatsuliornerit pisortat utaqqisitaasumik unnerluussuteqarsinnaanissaannut siunnersuisoqatigiit annerusumik kaammattuinnissaq piumannikkaat, tamannalu pisoq unnerluussisutut oqartussat siunissami eqqartuussisarnermik inatsimmi § 727, imm. 2, Kalaallit Nunaanni eqqartuussisarnermik inatsimmi § 317, imm. 1-ip assigisaa, malillugu periarfissaq annerusumik maluginiarneqarumaartoq, ataqqinassutsimullu kanngunarsaanerit sakkortunerusuni, tamat mianerineqarnissaasa taamaattariaqartippassuk, pillaaasarnermi inatsimmi § 267 malilugu unnerluussisoqarsinnaassalluni.

Ataqqinassutsimik kanngunarsaanerit pisortat utaqqisitaasumik unnerluussisinnaanerat ilisimasaqarpiarani sakkortuumik pisuutitsinernut § 268-itut siunnersuutigineqartoq malillugu mamarliinermik suliat qaangerlugit pisortat utaqqisitaasumik unnerluussisinnaanerat annertusineqartariaqanngitsoq Pillaasarnermut Inatsimmut Siunnersuisoqatigiit kingorna inerniliuppaat, Suliani taamatut ittuni unnerluussisutut oqartussat ilisimasaqarpiarani pasilliinernut atatillugu iliuseqartup piaraluneerana uppernarsartariaqarpaat, aamma EMRK artikeli 10 erseqqissumik aallaavittut ilisimasaqarpiarani pasilliinerit pillaaatissutiginissaannut ajoqutaassanngilaq.

Pillaasarnermik Inatsimmut Siunnersuisoqatigiit unnerluussuteqarnermut piginnaatitaaneq pillugu eqqarsaatai siunnersuutaalu Justitsministeriap pingaarnertut isumaqatigai, ministereqarfiup Pillaasarnermik Inatsimmut

Siunnersuisoqatigiit kaammattuutaannit annertunerusumik pisortat utaqqisitaasumik unnerluussisinnaanerit tunngavissaqartoq, tak. inatsisissatut siunnersuut nr, L 20-mi, 3. oktober 2018-imi saqqummiunneqartumi imm. 2.11.

Justitsministeria isumaqarpoq Kalaallit Nunaanni Danmarkimisulli annertutigisumik ataqqinassutsimut kanngutaatsuliornernut pisortat utaqqisitaasumik unnerluussisinnaanissaasa eqqunneqarnissaat tunngavissaqartoq, tassalu suliat pillaasarnermik inatsisip allanngortinneqarnissaa pillugu inatsit nr, 1719, 27. december 2018-imeersoq sioqqullugu pisortat utaqqisitaasumik unnerluussuteqarnissamut aqqutissaqarfigisaat, aamma suliat inatsimmik allannguerup taaneqartup inatsisitigut tunngavissaq eqqunneqartoq eqqarsaatigalugit, tamannalu tunuliaqutaralugu siunnersuutigineqarpoq pinerluttulerinermik inatsimmi § 20 allanngortinneqassasoq taamaasilluni suliani sakkortuumik pasilliinerni eqqunngitsuni, suliani pasilliinerup imaa imaluunniit taassuma siaruarterneqarnera tusagassiuutit amerlasuunit malinnaavigineqartut atorlugit pisimappat, pasilliinerlu innarligaasup annertuumik ajoquserneqarnissaanut naleqquppat, suliani inuk pissutsinik pineqartup pisortani atorfimminik suliaminilluunniit annaasaqarneranik kinguneqarsinnaasumik pisuutinneqarpat kiisalu suliani sakkortuumik pasilliineq aternik taasinani siaruaanneqarpat, pisortat utaqqisitaasumik unnerluutiginnissinnaalersillugit.

Pinerluttulerinermik inatsisip allanngortinneqarnissaanik siunnersuutip kinguneranik siunnersuutigineqarpoq eqqartuussisarneq pillugu inatsimmi pisortat unnerluussinissaannik qinnuteqarnermut malerugassanik eqqussisoqassasoq.

Taamaasilluni siunnersuutigineqarpoq suliani pisortat utaqqisitaasumik unnerluuteqarfigisinnaasaanni Kalaallit Nunaanni eqqartuussisarneq pillugu inatsimmi § 302 malillugu pisinnaatitaasoq suliame pisortat unnerluussuteqarnissaanik qinnuteqarsinnaavoq. Pisinnaatitaasup politiiunut nalunaaruteqarnera tamatumunnga atatillugu pisortat unnerluussuteqarnissaannik qinnuteqaatitut isigineqassaaq, nalunaaruteqarnermi allanik takusaqarsinnaanngikkaanni. Namminerisamik unnerluutiginninneq aallartinneqareersimappat, pisortat unnerluussinissaannik qinnuteqartoqarsinnaanngilaq, unnerluussinissamut oqartussat pisortat unnerluussinissaannik qinnuteqaat itigartissinnaassavaat pisooqataasut malersorneqarsinnaanngippata. Qinnuteqaat taamaallaat pisuusut ilaannaanut tunngappat, pisooqataasut mattutinngikkaluarlugit, siunnersuutigineqarpoq unnerluussisussatut oqartussat malersuineq inunnut

taakkununnga annertusisinnaassagaat, pisinnaatitaasoq tamanna pillugu oqaaseqaateqarsinnaareernermi kingorna tamatumunnga akerliunngippat.

Inatsisissatut siunnersuummi § 1, nr. 1-4, aamma § 2, nr. 2 kiisalu taakkununnga oqaaseqaatit innersuussutigineqarput.

## **2.2. Meeqqanik kinguaassiuutitigut atoqateqarluni aamma allatigut kinguaassiuutitigut ililiuuseqarluni pinngitsaaliinerni pineqaatissiisutit sakkortusinerat**

### *2.2.1. Inatsisit atuuttut*

Pinerluttulerinermi inatsimmi § 77, imm. 1, nr. 1-imi takuneqarsinnaavoq kinaluunniit nakuuserluni imaluunniit nakuusernissamik qunusaarilluni inummik pinngitsaaliilluni kinguaassiuutitigut atoqateqartoq imaluunniit allatigut kinguaassiuutitigut iliuuseqartoq pinngitsaaliisutut eqqartuunneqassaaq.

Atoqateqarneq pinngitsaaliinerussaaq, aamma nakuusernerup atoqatigiinnerullu akornanni pissutaasut ataqatigiissapput. Piumasaqaatip tamatuma kinguneraa atoqatigiinnerup innarlugaasup piumasaa akimorlugu piviusunngortissimanissaa.

Allatigut kinguaassiuutitigut iliuuseqarnermi pineqarput arnami naalungiarsuup aqquaatigut imaluunniit itikkut pinnani allatut kujanninneruvoq, inuit suaiaaqatigiinngitsut suaiaaqatigiilluunniit akornanni pinera apeqquaatinnagu.

Pinerluttulerinermik inatsimmi § 77, imm. 1, nr. 2 malillugu kinaluunniit pinngitsaaliisutut eqqartuunneqassaaq inummut qanoq issutsimigut imaluunniit atukkamigut pineqartup iliuutsimut akiuuffigisinnaanngisaanut kujannittoq imaluunniit allatigut kinguaassiuutitigut iliuuseqartoq.

Pinerluttulerinermi inatsimmi § 77, imm. 1, nr. 3 malillugu kinaluunniit pinngitsaaliisutut eqqartuunneqassaaq meeqqamik 12 inorlugit ukiulimmik kujannittoq imaluunniit allatigut kinguaassiuutitigut iliuuseqartoq.

Pinerluttulerinermi inatsimmi § 77, imm. 1, nr. 1-3.mut pinerluutit assigiinngitsut arlallit ilaapput, ilanngullugit saassussilluni pinngitsaaliinerit kiisalu meeqqamut 12 inorlugit ukiulimmut kujanninnani kinguaassiuutitigulli iliuuseqarneq, aamma pinerluutit inatsisit atuuttut



malillugit pineqaatissiissutigineqartarput, apeqquataalluni pinerluutip qanoq sakkortutiginera, qaammatalunni inissiisarfimmiittitaanermiit ukiuni arlalinni inissiisarfimmiittitaanermut.

Pinerluttulerinermi inatsimmi § 121, imm. 1, nr. 1 aamma nr. 2-mi takuneqarsinnaavoq pineqaatissiissummik toqqaanermi annertussusiliinermilu inatsisinik unioqqutitsinerup qanoq peqqarniitsiginera isiginiarneqassasoq, ilanngullugit taamatut iliuseqarnernik pinaveersaartitsiniarluni inuiaqatigiit soqutigisaat kiisalu iliuseqartup inuttut atugai, ilanngullugu pineqartup inatsisinik unioqqutitseqqinnginnissaanut suut pisariaqartutut nalilerneqarnersut.

Pinerluttulerinermi inatsimmut Kalaallit Nunaanni Eqqartuussiveqarneq pillugu Isumalioqatigiissitaasa Kalaallit Nunaanni eqqartuussiveqarneq pillugu isumaliutissiissutaat nr. 1442/2004 (kingorna eqqartuussiveqarneq pillugu isumaliutissiissutaannik taagorneqartoq) tunngavigineqarpoq. Eqqartuussiveqarneq pillugu isumalioqatigiissitat isumaliutissiissutaannit takuneqarsinnaavoq pinerluttulerinermik inatsit aamma danskit pillaasarneq pillugu inatsisaat erseqqivissummik assigiinngissuteqartut, pinerluttulerinermik inatsimmi oqaaseq »pineqaatissiissutit« atorneqarami, oqaaseq »pillaatit« pinnagu. Oqaatsinik toqqaanermut assigiinngissummut tunngavikkut tunuliaqutaasoq tassaavoq Kalaallit Nunaanni siumut isiginissaq annerusumik pingaartinneqarmat siunissamilu pinerlunniarnissaq pinaveersaartinniarlugu, pinerluttup inuiaqatigiinnut akuuleqqinnissaa ilanngullugu, pinerluutigisimasamut kingumut isiginiarnani. Pingaartumik aallaqqaammut pinerluttulerinermik inatsimmi 1954-imeersumi tamanna takutinneqarpoq – pinerluttunut killeqaqisumik kiffaannngissusiiiaalluni pineqaatissiineq atorneqartarmat. Tamatuma saniatigut inatsimmi pillaatinut sinaakkutit atorneqanngillat. Eqqartuussiveqarneq pillugu isumalioqatigiissitat isumaliutissiissutaanni qupperneq 121ff innersuussutigineqarpoq.

Taamaasilluni pinerluttulerinermi inatsit iliuseqartumik tunngaveqarnermik taaneqartumik aallaavittut tunngaveqarpoq, taamaasilluni eqqartuussiviup pineqaatissiissummik toqqaanermi iliuseqartup inuttut inooqatigiinnermilu atugai annertuumik ilanngullugit mianerissallugit, ilanngullugu pineqartup pinerluuteqaqqinnginnissaanut suut iluaqutaassanersut ilanngullugu mianerissallugu. Taamaattoq pinerluutip qanoq ittuunera taamatullu ittumik pinerluuteqarnissap akiorniarnissaanut inuiaqatigiit soqutigisaat ilanngullugit mianerineqartussaapput (iliuutsimik tunngaveqarneq).

## 2.2.2. *Justitsministeriap eqqarsaatai aaqqissuussinissatullu siunnersuut*

Naalackersuisut kinguaassiuutitigut atonerluinerit akiorniarlugit periusissiaanni – Killiliisa-mi – takuneqarsinnaavoq misissuinerit assigiinngitsut tikkuussisut innuttaasut pingajorarterutaat sinnerlugit kinguaassiuutitigut atonerlugaasimasut.

2019-imi Kalaallit Nunaanni innuttaasut 1.000-iugaangata kinguaassiuutitigut pinerluutit 10-t nalunaarutigineqartarput. Piffissami taamaaqataani Danmarkimi innuttaasut 1.000-iugaangata kinguaassiuutitigut pinerluutit 0,9 nalunaarutigineqartarlutik.

Naalackersuisut ukiuni kingullerni Justitsministeriamut oqaatigisarpaat pinerluttulerinermik inatsimmi § 147-mi pineqaatissiissutinut sinaakkusiussaq annertusitikkusullugu, suliani pinerluutini sakkortunerusuni, soorlu kinguaassiuutitigut pinerluutini, toqutsinerni sakkortuumillu nakuusernemi sivilunerusumik inissiisarfimmuut inissiisoqartarnissaa siunertaralugu.

Naalackersuisut Inatsisartut juli 2019-imi aalajangernerat tunuliaqutigalugu danskit naalagaaffiat qinnuigaa Kalaallit Nunaanni meeqqat aarlerinartorsiortut pillugit ikiueqqullugu. Tamanna tunuliaqutigalugu Kalaallit Nunaanni Danmarkimilu naalackersuisut ataatsimoorussamik kalaallit danskillu suleqatigiissitaannik pilersitsippat, suleqatigiissitap meeqqat inuusuttullu aarlerinartorsiortut atugaasa pitsanngorsarnissaannut kaammattuuteqarnissaq siunertaraa. Suleqatigiissitap kaammattuutai nalunaarusiami “Kalaallit Nunaanni meeqqat inuusuttullu aarlerinartorsiortut sullinnerisa nukittorsaaviginissaannut kalaallit danskillu suliaqarfiit akimorlugit suleqatigiivisa sulinerat” august 2020-mi tamanut saqqummiunneqarput, kaammattuutit ilagaat suliani meeqqanik kinguaassiuutitigut atoqateqarnermi allatigulluunniit kinguaassiuutitigut iliuuseqarnermi pineqaatissiissutit sakkortusineqarnissaat.

Naalackersuisut Inatsisartut aalajangernerat tunuliaqutaralugu maj 2020-mi Justitsministeriamut saffiginnippat, Kalaallit Nunaanni unnerluussisutut oqartussat meeqqanik kinguaassiuutitigut atonerluinernut pineqaatissiissutit sakkortusineqarnissaat kaammattuutigalugu.

Pineqaatissiissutit qaffasissusaasa Kalaallit Nunaanni innuttaasut eqqortuliornermik misigisimasaannut naleqquttuunissaasa Naalackersuisut qulakkeerinnikkusunnerannik tapersiinissaq danskit naalackersuisuinut pingaaruteqarpoq, soorlu aamma inatsisinik unioqqutitsinerit

sakkortussusaat qanorlu ittuunerat pineqaatissiissutini takuneqarsinnaasariaqartoq.

Taamaattumik siunnersuutigineqarpoq pinerluttulerinermik inatsimmi § 77-imi pinngitsaaliineq pillugu aalajangersakkamik nutaamik ilanngussisoqassasoq, tassani oqaatigineqarluni pineqaatissiissummik toqqaanermi inatsimmik unioqqutitsinermi immikkut ittumik kanngunarsaaneq pingaartinneqassasoq.

Ukiukinnerusunik, tassalu inunnik 18-it inorlugit ukiulinnik pinngitsaaliinerni kinguaassiuutitigullu allatut iliuuseqarnerni pineqaatissiissutit qaffasissusaasa 50 procentinik sakkortusineqarnissaat inatsisissatut siunnersuutikkut piumasaqaataavoq.

Pineqaatissiissutip toqqarneranut annertussusilerneranullu pisuni ataasiakkaani suliameq pissutsinik tamanik eqqartuussiviit aalajangersummik naliliinerat suli tunngavigineqassasoq oqaatigineqassaaq, ilanngullugit inatsisinik unioqqutitsinerup peqqarnissusia aamma iliuuseqartup inuttut atugai tunngavigineqassallutik, tak. pinerluttulerinermi inatsimmi § 121, taamaattumik aamma pineqaatissiissutip qaffasissusaa taaneqartoq qummut imaluunniit ammut saneqqunneqarsinnaassaaq, suliameq pineqartumi sakkortusitsisunik imaluunniit sakkukillisitsisunik tunngavigisassaqarpat.

Pinerluttulerinermik inatsimmi nutaaliortoqarnera siunnersuutip kinguneraa, aatsaammi siullerpaamik pinerluttulerinermik inatsimmi aalajangersakkamik unioqqutitsinermi pineqaatissiissutip qaffasissusaa aalajangersimasoq pillugu maleruagassat erseqqinnerusut piviusunngortinneqarnissaat siunertarlugu inatsisiliortoqarmat, kiisalu inatsisinut atuuttunut naleqqiullugu pineqaatissiissutit qaffasissusaasa qaffanneqarnerannik kinguneqassalluni.

Tamatuma saniatigut inatsisissatut siunnersuummi § 1, nr. 5, kiisalu tamatumunnga oqaaseqaatit innersuussutigineqarput.

## **2.3 Aningaasarsianik malunnarunaarsitsiniaanerup pinerluutinngortinnissaa pillugu namminerisamik aalajangersakkamik eqqussineq**

### *2.3.1. Inatsisit atuuttut*

Aningaasarsianik malunnarunnaarsitsiniaaneq aamma ajortumeerininik

aningaasalersuineq pinaveersaartinnerat pillugu inatsit (Aningaasarsianik malunnarunnaarsitsiniaanermut inatsit) peqqussut nr. 812, 12. august 2019-meersukkut Kalaallit Nunaannut atuutilersinneqartoq, aningaasarsianik malunnarunnaarsitsiniaaneq aamma ajortumeerianik aningaasalersuineq pinaveersaartinnerat pillugu maleruagassanik imaqarpoq. Akerlianilli aningaasarsianik malunnarunnaarsitsiniaanermut inatsisikkut pinnani kisianni pinerluttulerinermi inatsisikkut aningaasarsianik malunnarunnaarsitsiniaaneq pinerluutinngortinneqarpoq.

Aningaasarsianik malunnarunnaarsiniaanermut inatsimmi aningaasarsianik malunnarunnaarsitsiniaaneq tassaavoq aningaasanik iluanaarutininik, inatsisinik unioqqutitsinikkut pissarsiarineqartunik pisussaaffiginagu nammineq pissarsineq allanilluunniit pissarsisitsineq, imaluunniit pisussaaffiginagu toqqorsineq, uninngatitsineq, assartuineq, allamut ingerlateqqinnerannut ikiuunneq imaluunniit inatsisinik unioqqutitsinermi pinerluutaasumit aningaasanik iluanaarutininik kingorna allatigut iliuseqarluni qulakkeerinninniarnaq imaluunniit taamatut iliutsinut peqataaniarnaq imaluunniit peqataaneq.

Pinerluttulerinermik inatsimmi § 111 tillitanik pisinermut tunngasoq malillugu kinaluunniit inatsinik unioqqutitsinermi pinerluutaasumit pisussaataitanani tiguisoq imaluunniit imminut allanilluunniit iluanaarutininik pissarsitittoq, aamma kinaluunniit pisussaataitanani unioqqutitsinermi pinerluutaasumit iluanaarutininik toqqorsisoq, uninngatitsisoq, assartuisoq, tunisinermut ikiuuttoq imaluunniit kingorna assigisaanik iliorluni unioqqutitsinermi pinerluttulerinermik inatsimmik akisussaataassutigisinnaasaminik allat iluanaarutininik pissarseqataanissaasa qulakkeernissaannut peqataasoq.

Kinaluunniit ilaqtaminit imaluunniit inooqatiminit nalinginnaasumik inuussutissaminut pissarsianik tiguisoq imaluunniit nioqqutissanik nalinginnaasumik ulluinnarni atugassanik, atortussanik imaluunniit sullissinernik nalinginnaasumik akissarsiassatut tiguisoq pinerluttulerinermi inatsisitigut akisussaataasinnaangilaq, tak. § 111, imm.2.

Aningaasarsianik malunnarunnaarsitsiniaanermut inatsimmi aningaasarsianik malunnarunnaarsitsiniaanerup nassuiaataa pinerluttuletinermik inatsimmi tillitanik pisinerup nassuiaataanit allaaneruvoq, aningaasarsianik malunnarunnaarsitsiniaanermut inatsimmut nammineerluni aningaasarsianik malunnarunnaarsitsiniaaneq aamma ilaammat, tamatumani inatsimmik unioqqutitsinermut pinerluttulerinermik

inatsimmik unioqutitsisutut akisussaatitaatinneqarsinnaasumut kingorna inatsimmik unioqutitsinermut pineqartumit pissarsiani nammineq malunnarunnaarsinniarsimappagit.

Taamaalilluni tillitanik pisineq aalajangersagaq atuuttoq malillugu nammineerluni aningaasarsianik malunnarunnaarsitsiniaanerunngimmat, tunngaviatigut eqqarsartaaseq pineqarpoq, tassalu iliuuseqartup pinerluttulerinermik inatsimmik unioqutitsinermut pissarsiffiusumut akisussaanini nassuerutigippagu, tamanna pinerluttulerinermik inatsimmik unioqutitsinermut akisussaaaneq aamma iliuuseqartup pissarsiat pineqartut aamma akisussaaffigigai. Iliuuseqartorlu kingorna pissarsiat tunineqarnissaannik siunertaqartumik iliuuseqarpat, assersuutigalugu pissarsiat tuniniarlugit, taava maleruagassat atuuttut malilugit iliuuseqartoq nutaamik inatsisunik unioqutitseqqinngilaq pinerluttulerinermi inatsisunik unioqutitsinermut akisussaaffigisassaminik, assersuutigaluguli aatsaat taamatut pissalluni peqquserlulluni allagaasioruni imaluunniitt pisisumut peqquserluuteqaruni.

Aningaasarsianik malunnarunnaarsitsiniaanermut inatsit aamma nammineerluni aningaasarsianik malunnarunnaarsitsiniaaneq ilaammat, tamatuma aningaasarsianik malunnarunnaarsitsiniaanermut inatsisip aningaasarsianik malunnarunnaarsitsiniaanerup pinaveersaartinneranut iliuutsinut attuumasuteqarnera pissutaavoq, tamatumani assersuutigalugu pinerlunniartarnerup akiorneqarneranut nalunaarfigineqartarnerup pisariaqartinnerata assigisaanik pisariaqartitsisoqarluni, aallaqqaammut iliuuseqartoq imaluunniit pingajuusoq aningaasarsianik malunnarunnaarsitsiniartuugaluarpat, tamatumunnga atatillugu tak. danskit inatsisissatut siunnersuutaannut oqaaseqaatini nalinginnaasuni imm. 3.1, tak. Folketingstidende 2016-17, A, L 41, qupp. 84-imi saqqummiunneqarneratut ittoq.

### *2.3.2 Justitsministeriap eqqarsaatai aaqqissuussinissatullu siunnersuutigineqartoq*

Danskit pillaasarnermut inatsisaanni aningaasarsianik malunnarunnaarsitsiniaanerup namminerisamik pinerluutinngortinnera § 290 a-miittoq pillaasarnermik inatsisip allannngortinneqarnissaa pillugu inatsit nr. 711, 8. juni 2018-imeersukkut piviusunngortinneqarpoq (Aningaasarsianik malunnarunnaarsitsiniaaneq pillugu namminerisamik aalajangersagaq).

Danskit aalajangersagaata eqqunneqarneranut mianeriniagaq

tunuliaqutaasoq tassaavoq aningaasarsianik malunnarunnaarsitseriaatsit nalinginnaasumik aningaasaqarnermik suliaqarfiit aqqutigalugit pinerlunnermit pissarsiat inuussutissarsiornermik suliffeqarfinnut inatsisinik malitsisumut eqqunniarneqartarfii annerusumik aarlerinaateqarfii immikkut ukkatariniarneqarmata, taakku pitsaanngitsumik kinguneqarnissaat aarlerinartuummat. Taamaasilluni nammineerluni aningaasarsianik malunnarunnaarsitsiniaaneq aalajangersakkakut pinerluutinngortinneqarpoq.

Tamatuma saniatigut pinerluuteqartup nammineerluni aningaasarsiat malunnarunnaarsinniarlugit iliuusaasa pinerluutinngortinnerinut mianeriniagaq tunuliaqutaasoq tassaavoq nunat tamalaat akornanni suleqatigiiffiup Financial Action Task Force-p (FATF-ip) kaammattuutaata malinneqarnissaa, taassuma Danmarkimik 2017-imi nalilersuinermini kaammattuutigigamiuk nammineerluni aningaasarsianik malunnarunnaartitsineq pinerluutinngortinneqassasoq. Naliliinerup teknikkimut tunngasortaani ilaatigut innersuussutigineqarpoq aningaasarsianik malunnarunnaarsitsineq aamma tillitanik tigusineq pinerluutaasut assigiinngitsut, aamma iluanaarutitut aningaasarsianik malunnarunnaarsitsineq pinerluutaasut assigiinneqisut piffissaq sumiiffigisarlu eqqarsaatigalugit, pinerluttup pigisanik tillissimasaminit tuniniaanerani aamma aningaasanik tillissimasaminik aningaaserivimmut ikisinerani allaanerulluinnarlutik. Aamma ilanngullugu oqaatigineqarpoq nunat allat amerlaqisut (ilanngullugit nunat assigisaanik eqqartuussisarnermi ileqqullit, aningaasarsianik nammineerluni malunnarunnaarsitsiniaanermik pinerluutinngortitsisimasut.

Kalaallit Nunaanni Eqqartuussiveqarnermut Siunnersuisoqatigiit 2018-imi ataatsimiinnerminni aningaasarsianik malunnarunnaarsitsiniaaneq pillugu namminerisamik aalajangersakkamik eqqussinissamik pisariaqartitsineq oqaluuseraat, aamma siunnersuisoqatigiit tamatumunnga atatillugu kaammattuutigaat tamanna pillugu pinerluttulerinermik inatsimmi namminerisamik aalajangersakkamik eqqussisoqassasoq.

Kalaallit Nunaanni Eqqartuussiveqarnermut Siunnersuisoqatigiit kaammattuutaat Justitsministeriap isumaqatigaa, aamma ministeria isumaqarpoq mianerisassat Danmarkimi 2018-imi inatsimmik allannguinermit tunngavissiiisut aamma Kalaallit Nunaannut atatillugu atuuttut, taamaattumik siunnersuutigineqarpoq Kalaallit Nunaanni pinerluttulerinermik inatsimmi aningaasarsianik malunnarunnaarsitsiniaanerup pinerluutinngortinnissaa pillugu aalajangersakkanik assigisaanik eqqussisoqassasoq.

Taamaasilluni siunnersuutigineqarpoq tillitanik pisineq pillugu aalajangersakkap ilaa immikkoortinneqassasoq, taamaasilluni ilaa siunissami aningaasarsianik malunnarunnaarsitsiniaaneq pillugu aalajangersakkamik imaqartussanngorlugu.

Aningaasarsianik malunnarunnaarsitsiniaaneq pillugu aalajangersagassatut siunnersuutigineqartumi aningaasarsianik malunnaarunnaarsitsiniarneq siunniussaavoq, tamatumani pinerlunnermit pissarsiat toqqaannartumik aningaasaatillugit aamma pissarsiat aningaasaanngitsut aningaasanngortinneri kingorna aningaasarsiatut malunnarunnaarsinniarnegartillugit.

Akerlianilli aningaasarsianik malunnarunnaarsitsiniaanermut aalajangersakkami siullermeertumik aningaasanngorlugit kaaviiartitsineq imaluunniit pissarsianik aningaasaanngitsunik passussineq siunniussaanngillat. Tamatumani assersuutigalugu pigisanik tillitanik imaluunniit pinerluuteqarnikkut arlaanniit arsaarinnissutaasunik pisineq tunisinerlu, soorlu aamma pigisanik taamatut ittunik assartuineq uninngatitsinerlu pineqarput. Taamaasilluni taamatut ittumik iliuuseqarneq allannguutitaqanngitsumik tillitanik pisinermut aalajangersakkamut ilaassaaq.

Aallaavittut iliuutsit nutaat pinerluutinngortinnissaat pineqanngilaq. Taamaattoq tillitanik pisinermut aalajangersakkat atuuttut akerleralugit aningaasarsianik malunnarunnaarsitsiniarnermut aalajangersagassatut siunnersuut nammineerluni aningaasarsianik malunnarunnaarsitsiniaaneq ilaavoq. Taamaasilluni pinerluummut iliuuseqartumut naleqqiullugu siunnersuut arlaatigut nutaamik pinerluutinngortitsinertut takussutissaavoq. Suleriaatsikkut iliuuseqartoq pinerluummut annerusumik pineqaatissinneqarsinnaavoq aningaasarsianik malunnarunnaarsitsiniaanermut aalajangersagassatut siunnersuutigineqartoq malillugu, aningaasarsianik malunnarunnaarsitsiniaanermik iliuutsit pineqartup iliuuserisimasai inatsisinik unioqqutitsinermit pissarsiat nalinginnaasumik passunnerannit annertuumik qaangiippata.

Taamaasilluni aningaasarsianik malunnarunnaarsitsiniaanermut killiliinermut siunnersuutigineqartukkut iliuutsit pingaarnertut eqqorneqassapput, iluanaarutit inatsisinik unioqqutitsinermit pinngorfiannik toqqorsiniarnermik pingaarnertut siunertaqartut, kisiannili tunngaviatigut iluanaarutit piviusunngortinnissaannut pisariaqanngitsut.

Iliuutsini pinerluutaasuni pinerluuteqarnermi iluanaarutissatut siunniussat nalinginnaasumik aningaasannngortinneqartariaqartut pissarsiat allat assiginagit, aningaasannngorlugit pissarsiat toqqaannartumik akiliutitut atorneqarsinnaapput, taamaasilluni aningaasarsianik malunnarunnaartitsiniarnermik iliuutsini pinerluuteqarnermit pissarsiat aningaasannngortinniarnissaat pisariaqanngilaq.

Aningaasarsianik malunnarunnaarsitsineq pillugu namminerisamik aalajangersakkap killilerneqarnissaanut siunnersuutigineqartukkut, pinerluuteqarneq taamaallaat aningaasanik allannngortitsineq imaluunniit nuussineq ilaassapput. Taamaattumik pinerluut sioqqullugu iliuuseqartoq nutaamik pinerluuteqaaqqissanngilaq pissarsianik uninngatitsinermigut imaluunniit atuinermigut imaluunniit assertuutigalugu tillitanik tunisinermigut. Taamaattoq pinerluut sioqqullugu iliuuseqartoq kingorna assersuutigalugu tillitanik tunisinermigut aningaasanik iluanaarutiminik allannngortitsiguni imaluunniit nuussiguni, tamanna aningaasarsianik malunnarunnaarsitsiniaaneq pillugu namminerisamik aalajangersagassatut siunnersuutigineqartumut ilaassaaq.

Taaguutip »aningaasarsianik malunnarunnaarsitsiniaaneq«-rup siunissami pinerluttulerinermik inatsimmi aamma aningaasarsianik malunnarunnaarsitsiniaaneq pillugu inatsimmi assigiinngitsunik isumaqalernissaa inatsisissatut siunnersuutip kingunerissavaa. Taamaasilluni aningaasarsianik malunnarunnaarsitsiniaaneq pillugu inatsisip atorneqarfissaa siunissami aningaasarsianik malunnarunnaarsitsiniaanerussaaq aamma pinerluttulerinermik inatsisip paasineqarfissaa malillugu tillitanik pisinerussalluni.

Tamatuma saniatigut danskit inatsisissatut siunnersuutaannut oqaaseqaatit nalinginnaat innersuussutigineqarput, tak. Folketingstidende 2017-18, ilanngussaq A, L 147, qupp. 2 ff.

Tamatumalu saniatigut inatsisissatut siunnersuummi § 1, nr. 6 aamma 7, kiisalu taakkununga oqaaseqaatit innersuussutigineqarput.

## **2.4. Arsaarinnineq**

### *2.4.1 Inatsisit atuuttut*

Pinerluttulerinermik inatsimmi arsaarinninnermut maleruagassat § 166-170-imi nassaassaapput.



Pinerluttulerinermik inatsimmi § 166 malillugu pinerluuteqarnermit pissarsiat imaluunniit aningaasat taamaaqataat tamakkiisumik ilaannakortumilluunniit arsaarinnissutigineqarsinnaapput. Aningaasat qanoq annertutiginerat aalajangissallugu naammattumik tunngavissaqanngippat, aningaasat pissarsiarineqartut nalilerneqartut assigisaat arsaarinnissutigineqarsinnaapput.

Suli annertunerusumik inatsisinik unioqutitsisoqarnissaata pinaveersaartinneranut imaluunniit pissutsit immikkut ittut taamatut ittariaqartippassuk, pigisanik pinerluuteqarnermut atorneqarsimasunik imaluunniit pinerluuteqarnermut atorneqartussatut aalajangigaasunik, pigisanik pinerluuteqarnikkut pissarsiarineqartunik, kiisalu pigisanik pinerluuteqassutaasimasunik arsaarinnittoqarsinnaavoq, tak. § 166, imm. 2.

Taamaattoq pigisat iliuseqartup inatsisinik eqqortitsisumik inuussutissarsiutaanut annertuumik pingaaruteqartut arsaarinnissutigineqarsinnaanngillat, aatsaat pissutsit immikkut illuinnartut taamatut ittariaqartippassuk arsaarinnissutigineqarsinnaallutik, tak. § 166, imm. 3.

Pigisat § 166, imm. 2-mi taaneqartut arsaarinnissutigineqartut, taarsiullugu aningaasat taakku naleqataat imaluunniit taakku ilaat arsaarinnissutigineqarsinnaapput, tak. § 166, imm. 4.

Tamatuma saniatigut § 166, imm. 2-mi taaneqartut arsaarinnissutigineqartut, annerusumik inatsisinik unioqutitsisoqarnissaa pinaveersaartinniarlugu pigisat pillugit pineqaatissiisoqarnissaanik aalajangiisoqarsinnaavoq, tak. § 166, imm. 5.

Pinerluttulerinermik inatsimmi § 167-imi takuneqarsinnaavoq § 166, imm. 1 malillugu arsaarinnittoqarsinnaasoq inummi pinerluuteqarnerup kinguninnga iluanaarutininik pissarsisimasumi.

Pigisat naliliutillu § 166, imm. 2 aamma 4-mi taaneqartut inummit inatsisinik unioqutitsinermut akisussaasumit aamma inummit taanna sinnerlugu pineqartup iliuseqarfisimasaa arsaarinnissutigineqarsinnaapput, tak. § 167, imm. 2.

Pigisanut arsaarinnissutigineqartunut pisinnaatitaaffiit immikkut qulakkiigaasut aatsaat atorunnaarsinneqarsinnaapput eqqartuussiviup aalajangiineratigut, piumasaqaatit § 167, imm. 2-mi taaneqartut assigisaat piumasaqaatigalugit, tak. § 167, imm. 3.

Inuit § 167, imm. 1 aamma 2-mi taaneqartut pinerluuteqarnerup kingorna pissarsianik pigisanilluunniit § 166, imm. 2-mut ilaasunik imaluunniit tamatuma saniatigut pisinnaatitaaffinnik atuisimappata, tunniunneqartut imaluunniit taakkua nalingi pissarsisumit arsaarinnissutigineqarsinnaapput inuup taassuma nalusimanngippagu tunniunneqartut pinerluummut attuumassuteqartut, imaluunniit taanna tamatumunnga atatillugu annertuumik mianersuaalliorsimappat, imaluunniit tunniussineq tunissutitut pisimappat, tak. § 167, imm. 4.

§ 167, imm. 5-imi takuneqarsinnaavoq, § 167, imm. 1-4 malillugit inuk arsaarneqarnissamut akisussaasuusoq toqukkut qimaguppat, taassuma akisussaana atorunnaassaaq. Tamannali § 166, imm. 1 malillugu arsaarinninnermut atuutinngilaq.

Pinerluttulerinermik inatsimmi § 168, imm. 1 malillugu pisuussutitut ajunngitsorsiassat, inuup pinerluummut pisuutitaasup pigisai arsaarinnissutigineqarsinnaapput, iliuuseq imatut ippat annertuumik iluanaaruteqarfusinnaalluni, imaluunniit inatsisinik unioqqutitsineq immikkut sakkortussusilik pineqarpat.

Assigisaanillu pisuussutitut ajunngitsorsiassat tamakkiisumik ilaannakortumilluunniit arsaarinnissutigineqarsinnaapput, pineqartup katissimasaata inooqataataluunniit pissarsiarisimasai, taakku pisuussutitut ajunngitsorsiassat pinerluut imm. 1 malillugu arsaarinninnermut tunngavissiisoq ukiunik tallimanik sioqqullugu pissarsiarineqarsimanngippata, imaluunniit piffissami pissarsinerup nalaani suli katissimanngippata imaluunniit inooqatigiinneq aallartissimanngippat arsaarinnissutigineqarsinnaanatik, tak. § 168, imm. 2.

Tamatuma saniatigut § 168, imm. 1-imi piunasaqaatit eqqortinneqarsimappata, aammattaaq § 168, imm. 3 malillugu, pisuussutitut ajunngitsorsiassat inatsisitigut pisinnaatitaasumut pisussaataasumullu pineqartup kisimiilluni imaluunniit qaninnerpaamik ilaquttani peqatigalugit aalajangiisumik sunniuteqarfigisaanut tunniunneqarsimasut tamakkiisumik ilaannakortumilluunniit arsaarinnissutigineqarsinnaapput. Assigisaa atuuppoq pineqartoq inatsisitigut pisinnaatitaasup pisussaataasullu isertitaasa ilaanik annertuunik pisartagaqartuuppat. Arsaarinnittoqarsinnaanngilarli pisuussutitut ajunngitsorsiassat inatsisitigut pisinnaatitaasumut pisussaataasumullu tunniunneqarsimappata pinerluut imm. 1 malillugu arsaarinninnermut tunngavissiisoq ukiunik 5-nik sioqqullugu tunniunneqarsimappata.

§ 168, imm. 4-mi takuneqarsinnaavoq § 168, imm. 1-3 malillugit arsaarinnittoqarsinnaanngitsoq, pineqartup uppersarsarsinnaappagu pisuussutitut ajunngitsorsiassaq inatsisunik eqqortitsisumik imaluunniit aningaasat inatsisunik eqqortitsisumik pissarsiarineqarsimasut atorlugit pissarsiarineqarsimasoq.

§ 168, imm. 5-imi takuneqarsinnaavoq pisuussutitut ajunngitsorsiassat aalajangersimasut § 168, imm.1-3 malillugit arsaarinnissutiginerannut taarsiullugu aningaasat taakkua naleqataat imaluunniit taakkua ilaat arsaarinnissutigineqarsinnaasut.

§ 169-mi takuneqarsinnaavoq § 166, imm 1 imaluunniit § 168 malillugu arsaarinnittoqarpat, inatsisinillu unioqqutitsineq pissutigalugu arlaat taarsiiffigitinnissamik piunasaqaateqarpat, arsaarinnissutit taarsiiffigitinnissamik piunasaqaatip matussusersinissaanut arsaarinnissutit atorneqarsinnaasut. Assigisaa atuuppoq pigisat naliliutillu § 166, imm. 2 aamma 4 malillugit arsaarinnissutigineqartut, eqqartuussinerup tamanna pillugu aalajangiisoqarpat, tak. 169 imm. 2. Eqqartuunneqartup pisut § 169, imm. 1 aamma 2-mi taaneqartut ilaanni eqqartuussinerup kingorna innarlugaasoq taarsiissutissanik akilersimappagu, aningaasat arsaarinnissutaasut assigisaanik annikillineqassapput, tak. 169, imm. 3.

§ 170-imi takuneqarsinnaavoq pigisat qanoq ittuunertik pissutigalugu pissutsinut allanut atuuttunut atatillugu pinerluummut atorneqarnissaat ersissutigineqartillugu arsaarinnissutaasinnaasut, tamanna pinerluutip pinngitsoortinnissaanut pisariaqartinneqartutut isigineqarpat. Piunasaqaatit assigisaat atorlugit pisuussutitut ajunngitsorsiassanik allanik, ilanngullugit aningaasanik arsaarinnittoqarsinnaavoq. § 166, imm. 5 assigisaanik atorneqassaaq.

Pinerluttulerinermik inatsimmi § 118-imi takuneqarsinnaavoq, eqqartuussiviup eqqartuussinerup peqatigisaanik aalajangerpagu pineqaatissiissutit § 119-imi taaneqartut ilaat sorleq atorneqassanersoq eqqartuussiviup aalajangissagaa. § 119-imi takuneqarsinnaavoq eqqartuussiviup ilaatigut akiliisitsineq aamma inissiisarfinnut inissiineq aalajangersinnaagaa. Ilangullugu § 120-mi takuneqarsinnaavoq pisinnaatitaaffimmik annasaqarneq aamma arsaarinninneq pineqaatissiissutitut allanut tamanut atatillugit eqqartuussutigineqarsinnaasut.

Arsaarinninneq pillugu pinerluttulerinermik inatsimmi maleruagassat

(kapitali 37) pinerluttulerinermik inatsimmi immikkoortoq II-miipput, qulequtaqarlutik “Pineqaatissiissutit ataasiakkaat”.

Eqqartuussisarneq pillugu inatsimmi § 440, imm. 1-imi maleruagassat malillugit eqqartuussinertaqanngitsumik arsaarinnittoqarsinnaavoq, pasineqartoq nassuerpat, taamatullu aalajangiisoqarnissaa kissaatigalugu.

Pinerluttulerinermik inatsimmi § 16-imi takuneqarsinnaavoq meeqqat 15-it inorlugit ukiullit pinerluttulerinermik inatsit malillugu pineqaatissinneqarsinnaanngitsut.

#### *2.4.2. Justitsministeriap eqqarsaatai aaqqissuussinissatullu siunnersuut*

##### *2.4.2.1. Meeqqanik 15-it inorlugit ukiulinnit arsaarinnissinnaaneq*

Kalaallit Nunaanni Politiit kissaatigisimavaat meeqqanik 15-it inorlugit ukiulinnit pinerluttulerinermik inatsimmi §§ 166-170 malillugit arsaarinnissinnaaneq inatsisitigut tunngavissinneqassasoq.

Kalaallit Nunaanni arsaarinninnermut maleruagassat danskit maleruagassat assigilluinnangajappaat, kisianni danskit inatsisaat malillugit arsaarinninneq tassaavoq “iliuutsimut pillaatisissutaasinnaasumut pillaataanani inatsisitigut allatut kinguneqartitsineq” taamaattumillu meeqqanut pinerluttulerinermi pillaatisinissamut ukiukippallaartunut sulii atorneqarsinnaalluni, Kalaallit Nunaannili inatsisit malillugit arsaarinninneq pineqaatissiissutit allat assigalugit pineqaatissiissutaavoq, taamaattumillu meeqqanut 15-it inorlugit ukiulinnut atorneqarsinnaanani. Danskit inatsisaat malillugit arsaarinninneq meeqqanut 15-it inorlugit ukiulinnut aamma atorneqarsinnaavoq, tamannalu Østre Landsretip suliaani aalajangerneqarpoq, Ugeskrift for Retsvæsen 2000 qupp. 2547-imi issuarneqarluni.

Justitsministeria isumaqarpoq inatsisit taamatut innerat naapertuutinngitsaq. Assersuutigalugu ikiaroorntumik tuniniaasartut inatsisit atuuttut malillugit ikiaroorntut uninngasuutitik tamaasa ukiukinnerusunut tunniussinnaavaat, tamatumalu kingunerissallugu politiit pissutsit aallaavigalugit ikiaroorntut arsaarinnissutigisinnaassanagit.

Taamaattumik siunnersuutigineqarpoq, immikkoortoq II-p quleqataa allanngortinneqassasoq, taamaalilluni “Pineqaatissiinerit ataasiakkaat” kingorna ilanngunneqassalluni “pinerlunnerup malitsigisaanik eqqartuussisarnermi kinguneqaataasut aamma allat”. Tamanna

ilanngussineq oqaaseqaatini takutinniarlugu, illersuisut pillugit kapitali 35, pisinnaatitaaffeqarunnaarneq pillugu kapitali 36 aamma arsaarinnineq pillugu kapitali 37 isigineqassasut pinerlunnermut tunngatillugu eqqartuussisarnermi kinguneqaataasutut allatut, imatuunngitsoq pineqaatissiissutitut. Tamatuma malitsigivaa, arsaarinninnermut maleruagassat pineqaatissiissutitut isigineqarunnaarsillugit, tamatuma kingunerissallugu taakku meeqqanut 15-it inorlugit ukiulinnut atorneqarsinnaalernissaat.

Taamatut allannguisoqarneratigut Kalaallit Nunaanni Politiit assersuutigalugu inummit 13-inik ukiulimmit ikiaroorntoq arsaarinnissutigisinnaalissavaat. Politiit aamma assersuutigalugu ningittakkat meeqqamit 15-it inorlugit ukiulimmit arsaarinnissutigisinnaassavaat, taakku unioqqutitsilluni aalisarnermut atorneqarsimappata.

Inatsisissatut siunnersuummi § 1, nr. 8, 10 aamma nr. 11 aamma § 2, nr. 1 aamma nr. 3, kiisalu taakkununga oqaaseqaatit innersuussutigineqarput.

*2.4.2.2. Suliani ikiaroorntut pillugit inatsisinut tunngasuni pissarsianik arsaarinninnissamut aqutissat annertusinerat.*

Kalaallit Nunaanni Politiit suliani ikiaroorntut pillugit inatsisinik unioqqutitsinerni iluanaarutinik arsaarinninninnissamut periarfissat annertusineqarnissaat kissaatigaat, tamanna pillugu danskit aaqqissuussinerattut annertussuseqalersillugu.

Pinerluttulerinermik inatsimmi § 168, imm. 1 malillugu pissarsianik annertusisamik arsaarinnittoqarsinnaavoq, iliuuseq ima pissuseqarpat, tamanna annertuumik pissarsissutigineqarsinnaalluni aamma inatsisinik unioqqutitsineq immikkut ittumik sakkortussuseqarpat. Maanna pissarsianik annertusisamik arsaarinnittoqarsinnaanngilaq ikiaroorntut pillugit inatsisinik unioqqutitsineq aamma inatsisinik unioqqutitsinertut immikkut ittumik sakkortuutut pineqanngippat.

Pillaasarneq pillugu inatsimmi ikiaroorntut pillugit inatsimmik unioqqutitsinermi taamatut iluanaarutinik arsaarinninnissamut inatsisitigut tunngavissaqarpoq. Taamatut inatsisitigut tunngavissaq pillaasarneq pillugu inatsimmi § 76 a-p annertusineqarnissaa pillugu pillaasarneq pillugu inatsisip aamma eqqartuussisarneq pillugu inatsisip allanngortinneqarnissaat pillugu inatsit nr. 436, 10. juni 2003-meersukkut eqqunneqarpoq (Rockerit pinerlunniartarnerannik aamma

aaqqissuussaasumik pinerlunniartarnermik akiuiniarneq).

Pillaasarneq pillugu inatsimmi § 76 a malillugu pissarsianik annertusisamik arsaarinnissinnaanerup tamatuma periarfissaqalersippaa pisuussutitigut naliliutinik annertunerusunik arsaarinnissinnaaneq, naak unnerluutigineqartoq pinerluut annikitsuaqqamik iluanaarfiusoq imaluunniit iluanaarfiumngitsoq pillugu eqqartuunneqarsimagaluartoq, eqqartuunneqartup isertitai pillugit paasissutissat malillugit naliliutit taakku inatsisunik eqqortitsisumik pissarsiarineqarsimanerat ilimanaateqanngippat.

Pillaasarneq pillugu inatsisip allanngortinneranut pissutaavoq annertusisamik arsaarinnissamut taamanikkut pinerluutip annertussusaanut piunasaqaat taamaallaat sulianut ikiaroorartut pillugit inatsisunik unioqqutitsinermut tunngasuummat, tamatumani ikiaroorartut qanoq annertutiginerat qanorlu ittuunerat kisimik apequtaasarlutik, tamatuma kingunerisarlugu pineqartup pillaasarnermik inatsimmi § 191-imut ilaannginnera, naak pisuni amerlaqisuni pinerluut misilittakkat malillugit annertuneroqisumik iluanaarfiusinnaagaluartoq, aamma pinerluut taamatut ittoq tunuliaqutaralugu aamma pigisatigut pisuussutit annertoqisut pineqartup pigimmagit tunngavissaqarluartumik pasinnissutaasoq pinerluut paasineqartoq taamaallaat pineqartup pinerluutigisimasaasa ilaannarigaat.

Pillaasarnermik inatsip allanngortinneqarnera isumaqarpoq inuk ikiaroorartut pillugit inatsimmik unioqqutitsisimasoq, assersuutigalugu hashimik 8 kg-nik pigisaqarnini pissutigalugu eqqartuunneqarpat, pigisatigut pisuussutit annertunerusut pineqartup pigisai arsaarinnissutigineqarsinnaassapput, pineqartup uppersarsarsinnaanngippagu pigisatigut pisuussutit inatsisunik eqqortitsisumik pissarsiarisimallugit. Assigisaanik pigisatigut pisuussutit annertunerusut, inuup immikkut ittumik peqqarniitsumik anngiortumik eqqussisimasutut eqqartuussaasup pigisai arsaarinnissutigineqarsinnaassapput, pineqartup uppersarsarsinnaanngippagu pigisatigut pisuussutit inatsisunik eqqortitsisumik pissarsiarisimallugit.

Justitsministeria isumaqarpoq mianerisassat Danmarkimi 2003-mi inatsimmik allannguineranut tunngavigineqartut, aamma Kalaallit Nunaannut atatilugu atuuttut, taamaattumillu siunnersuutigalugu suliani ikiaroorartut pillugit inatsisunik unioqqutitsinermut tunngasuni pinerluttulerinermik inatsimmi pissarsianik annertusisamik arsaarinnissamut assigisaanik periarfissamik eqqussisoqassasoq.

Danskit inatsisissatut siunnersuutaannut oqaaseqaatit nalinginnaat innersuussutigineqarput, imm. 5, tak. Folketingstidende 2002-03, ilaliussaq A, qupp. 6737 ff.

Tamatuma saniatigut inatsisissatut siunnersuummi § 1, nr. 8, kiisalu taakkununga oqaaseqaatit innersuussutigineqarput.

## **2.5 Nakkutigineqartussanngorluni eqqartuunneqarnermut atatillugu tarnip pissusaanik ilisimasalimmit katsorsagaanissamik peqquneqarneq**

### *2.5.1 Inatsisit atuuttut*

Pinerluttulerinermik inatsimmi § 135, imm. 1-imi takuneqarsinnaavoq eqqartuussiviup eqqartuusinermini eqqartuunneqartup pinerluuteqarsimasunik isumaginnittoqarfiup aalajangigaanik assigiinngitsutigut katsorsarneqarnissaa piumasaqaatit aalajangersarsinnaagaa.

Pinerluttulerinermi inatsimmi § 135, imm. 1, nr. 1 malillugu eqqartuunneqartoq imigassamik, ikiaroorartunik akuutisanilluunniit assigisaanik atornerluinerminut katsorsarneqarsinnaavoq, pisariaqarpat katsorsaavimmi immikkut ittumi imaluunniit Kalaallit Nunaanni napparsimmavissuarmi.

Pinerluttulerinermik inatsimmi § 135, imm. 1, nr. 2 malillugu eqqartuunneqartoq nakorsamit katsorsarneqarsinnaavoq, pisariaqarpat Kalaallit Nunaanni napparsimmavissuarmi.

Naggataagullu pinerluttulerinermik inatsimmi § 135, imm. 1, nr. 3-mi takuneqarsinnaavoq eqqartuunneqartoq tarnip pissusaanik nakorsamit/kinguaassiuutitigut atornerluisutut katsorsarneqarsinnaasoq.

Tamanna siunertamut iluaqutaasutut isigineqarpat, eqqartuussinermi pineqaatissiissutit imm. 1-imi taaneqartut pillugit ingerlaannaq aalajangiisoqarsinnaavoq, tak. § 135, imm. 2.

Aalajangersakkamut oqaaseqaatini takuneqarsinnaavoq aalajangersagaq assigiinngitsunut katsorsagaanissamut periarfissiisoq, ilanngullugit imigassamik atornerluinermut, tarnip pissusaasigut/kinguaassiuutitigut atornerluinermut nakorsamit katsorsagaanermut, tak. Folketingstidende

2007-08 (ataatsimiinneq 2.), ilaliussaq A, qupp. 1671. Nakorsap nalileereerneratigut kinguaassiuutitigut atonerluinermut katsorsagaaneq assersuutigalugu nakorsaatit kinguaassiuutitigut atoqateqarusukkunnaarsitsisartut atorlugit pisinnaavoq. Aammattaaq eqqartuunneqartup tarnip pissusaanik ilisimasalimmit katsorsagaanissaa piunasaqaatit aalajangersarneqarsinnaavoq.

### *2.5.2 Justitsministeriap eqqarsaatai aalajangersagassatullu siunnersuut*

Kalaallit Nunaanni Eqqartuussiveqarnermut Siunnersuisoqatigiit 2018-imi aamma 2019-imi ataatsimiinnerminni pinerluttulerinernik inatsimmi § 135 oqaluuseraat, kaammattuutigalugulu pinerluttulerinermik inatsimmi § 135, imm. 1, nr. 3 erseqqissarneqassasoq, aalajangersakkamut oqaaseqaatit malillugit tarnip pissusaanik ilisimasalimmit katsorsagaanissamut periarfissaq piunasaqaatit aalajangersarneqarsinnaammat, taamaasilluni erseqqivissumik takuneqarsinnaassalluni nakkutigineqartussanngorluni eqqartuussaanermut atatillugu tarnip pissusaanik ilisimasalimmit katsorsarneqarnissaq eqqartuussiviup piunasaqaatit aalajangersarsinnaagaa.

Justitsministeriap Kalaallit Nunaanni Eqqartuussiveqarnermut Siunnersuisoqatigiit kaammattuutaat isumaqatigaa.

Tamatuma saniatigut inatsisissatut siunnersuummi § 1, nr. 9, kiisalu tamatumunnga oqaaseqaatit innersuussutigineqarput.

## **2.6. Inissiisarfimmik toqqaaneq**

### *2.6.1 Inatsisit atuuttut*

Pinerluttulerinermik inatsimmi § 196, imm. 1-ip malitsigisaanik inissiisarfimmut inissinneqartussanngorluni pineqaatissinneqarnermi, tamanna suleriaatsikkut ajornanngitsillugu eqqartuunneqartup angerlarsimaffiata qanittuani naammassineqassaaq (qanittumiinnissamik tunngaveqarneq). Eqqartuunneqartup inissiisarfimmik sumiiffigisasaanik toqqaanermi aamma eqqartuunneqartup nammineq kissaatigisai, mianerineqassapput, pingaartumik suliffeqarnikkut, ilinniagaqarnikkut, ilaqutariissutsikkut imaluunniit peqqissutsikkut atugai mianerineqassallutik.

Qanittumiinnissamik tunngaveqarneq pisuni assigiinngitsuni arlalinni



avaqqunneqarsinnaavoq, taakku pinerluttulerinermik inatsimmi § 196, imm. 2-mi tulleriiaarlugit allattugaapput.

Siullertut qanittumiinnissamik tunngaveqarneq avaqqunneqarsinnaavoq § 197, imm. 2, nr. 1 malillugu, taamatut inissiineq ilaannakortumik matoqqasumi naammassinninnermut tunngasoq taarsiullugu atorneqarsinnaappat pinerluttulerinermi inatsimmi § 197, imm. 2 malillugu, aalajangersagarlu taanna malillugu inissiisoqarsinnaavoq pineqartoq inummut ulorianaatilimmik sakkortunerusumik pinerluuteqarsimanini pissutigalugu eqqartuunneqarsimappat, ammasumilu inissinninneqarnissaanut tamatuminnga mianerinninnissaq akerliuppat.

Aappaattut § 196, imm. 2, nr. 2 malillugu qanittumiinnissamik tunngaveqarneq avaqqunneqarsinnaavoq, eqqartuunneqartoq inuiaqatigiinnut annertuunik nalilinnut sammititamik pinerluuteqarsimappat, eqqortuliornissallu mianerinissaata eqqartuunneqartup angerlarsimaffiata qanittuaniittumi naammassinnissaa akerliuppat.

Pingajuattut § 196, imm. 2, nr. 3 malillugu qanittumiinnissamik tunngaveqarneq avaqqunneqarsinnaavoq eqqartuunneqartoq kingullermik inissiisarfirmi najukkaminut qanittumi naammassinninnermini nutaamik pinerluuteqarsimappat, imaluunniit inissiisarfiup maleruagassaanik sakkortuumik unioqqutitsisimappat.

Sisimaattut § 196, imm. 2, nr. 4 malillugu qanittumiinnissamik tunngaveqarneq avaqqunneqarsinnaavoq tamanna eqqartuunneqartup kanngutaatsuliornissaanut illersorniarlugu pisariaqartutut isigineqarpat.

Tallimaattut § 196, imm. 2, nr. 5 malillugu qanittumiinnissamik tunngaveqarneq avaqqunneqarsinnaavoq pinerluuteqarsimasunik isumaginnittoqarfiup inissiisarfiutaani inissat tamakkiisumik atorluarnissaasa tamanna pisariaqartippassuk.

Pinerluttulerinermik inatsimmi § 196, imm. 3 malillugu § 196, imm. 1 aamma imm. 2-mi maleruagassat assigisaanik atorneqassapput, § 198 malillugu immikkoortoqarfimmit ammasumit matoqqasumut nuussineq pillugu aamma § 199 malillugu immikkoortoqarfimmit matoqqasumit ammasumut nuussineq pillugu aalajangiisoqartillugu.

*2.6.2. Justitsministeriap eqqarsaatai aalajangersagassatullu siunnersuut*

Kalaallit-danskit suleqatigiissitaata, meeqqat inuusuttullu aarlerinartorsiortut atugaasa pitsanngorsaavigineqarnissaannut kaammattuutit saqqummiussinissamik siunertaqartoq, kaammattuutigaat Nuummi inissiisarfimmi kinguaassiuutitigut pinerluuteqarsimasunut katsorsaavittut inissanik pilersitsisoqassasoq, Kalaallit Nunaanni Pinerluuteqarsimasunik Isumaginnittoqarfimmi pinerlunnaveersaartitsinermik suliniutit nukittorsaavigineqarnissaat siunertaralugu. Nuummi inissiisarfimmi katsorsaannermut inissanik pilersitsinerup kinguneranik qanittumiinnissamik tunngaveqarnerup avaqqunneqarnissaanut periarfissat annertusineqarnissaat pisariaqarpoq.

Danmarkimi qanittumiinnissamik tunngaveqarneq avaqqunneqartarpoq ilaatigut kinguaassiuutitigut pinerluuteqarsimasutut eqqartuunneqarsimasooq naammassinniffissaannik toqqaannermut atatillugu, eqqartuussaq sumiluunniit najugaqaralarpat Herstedvester Fængselimut aallaavittut inissinneqartarami, tak. pillaatisiap naammassinissaa pillugu inatsimmi § 23, imm, 2, nr. 4, taanna malillugu eqqartuunneqartoq perorsaariaatsikkut, nakorsamit imaluunniit allatigut immikkut ittumik ikiorneqarnissaa pissutigalugu qanittumiinnissamik tunngaveqarneq avaqqunneqarsinnaammat.

Pillaatisiap naammassineqarnissaa pillugu inatsimmi § 23, imm. 2, nr. 4 aamma atorneqartarpoq arnat arnanut parnaarussivinnut, 15-17-inik ukiullit inuusuttunut immikkoortoqarfinnut kiisalu eqqartuunneqarsimasut immikkut tarnip pissusaatigut ikiorserneqarnissamik pisariaqartitsisut Herstedvester Fængselimut inissinneqartarlutik.

Pinerluttulerinermi inatsimmi § 196, imm. 2, nr. 4-mi aalajangersakkamik assigisaanik ilanngussisoqarnissaa siunnersuutigineqarpoq, taamaasilluni qanittumiinnissamik tunngaveqarnerup avaqqunneqarsinnaanera periarfissanngussalluni, eqqartuunneqartup perorsaariaatsikkut, nakorsamit imaluunniit allatigut immikkut ikiorserneqarsinnaanera periarfissaalersinniarlugu, assersuutigalugu qanittumiinnissamik tunngaveqarneq avaqqunneqarsinnaasunngorlugi kingussiuutitigut pinerluuteqarsimasutut eqqartuunneqarsimasut Nuummi inissiisarfimmut nuunneqarsinnaanerat qulakkeerniarlugu. Peqqatigisaanillu allannguinnikkut erseqqissaatigineqassaaq qanittumiinnissamik tunngaveqarneq avaqqunneqarsinnaasooq assersuutigalugu arnat arnanut immikkoortoqarfinnut nuunneqarsinnaasunngorlugit, tamannalu Kalaallit Nunaanni pinerluuteqarsimasunik isumaginnittoqarfimmi suleriaasioreerpoq.

Qanittumiinnissamik tunngaveqarnerup avaqqunneqarsinnaaneranik periarfissamut tunngatillugu aammattaaq siunertamut naapertuussorineqarpoq eqqartuunneqarsimasup qanigisaata inissiisarfimmi atorfeqarnera pissutigalugu imaluunniit eqqartuunneqarsimasup pinerluffigisimasaata inissiisarfimmi sulinera imaluunniit pinerluffigisimasaata qanigisaata sulinera pissutigalugu qanittumiinnissamik tunngaveqarnerup avaqqunneqarsinnaanera, aammalu atorfeqartup innimigineqarnissaa eqqarsaatigalugu eqqartuunneqarsimasup sumiiffimmi allami inissinneqarnissaa.

Danmarkimi pillaatit il. il. eqquutsinneqarnissaat pillugu inatsimmut siunnersuutikkut nr. 432, 31. maj 2000-imeersukkut qanittumiinnissamik tunngaveqarnerup avaqqunneqarsinnaaneranut tunngavimmik eqquussisoqarpoq, pinngitsoortinniarlugu inissinneqarsimasup qanigisaata atorfeqarfigisaani inissisimatinneqarnissaa, tak. pillaatit eqquutsinneqarnissaat pillugu inatsimmi § 23, imm 2, nr. 7.

Pillaatit eqquutsinneqarnissaat aamma eqqartuussisarnermik akileraarut pillugit inatsisip allanngortinneqarnissaanik inatsit nr. 113, 3. februar 2012-imeersukkut (Pillaatit eqquutsinneqarnissaat il. il. pillugit inatsimmik nutarterineq) Danmarkimi pinerluttunik isumaginnittoqarfinnut periarfissaalermoq qanittumiinnissamik tunngaveqarnerup avaqqunneqarsinnaaneranut, pinngitsoortinniarlugu eqqartuunneqarsimasup inissiisarfimmi pillagaassutaasinnaasumik atorfilittamut imaluunniit taassuma qanigisaanut pinerluuteqarfigisimasaani inissisimatinneqarnissaa, tak. pillaatit eqquutsinneqarnissaat pillugu inatsimmi § 23, imm 2, nr. 8.

Siunnersuutigineqarpoq pinerluttulerinermi inatsimmi § 196, imm. 2, nr. 5-imi aalajangersakkamik eqquusinissaq, taamaalilluni qanittumiinnissamik tunngaveqarneq avaqqunneqarsinnaanngorluni, pinngitsoortinniarlugu eqqartuunneqarsimasup qanigisaata inissiisarfimmi atorfeqarfigisaani eqqartuunneqarsimasup inissisimatinneqarnissaa.

Taamatuttaaq siunnersuutigineqarpoq pinerluttulerinermi inatsimmi § 196, imm. 2, nr. 6-imi aalajangersakkamik eqquusinissaq, taamaalilluni qanittumiinnissamik tunngaveqarneq avaqqunneqarsinnaanngorluni, pinngitsoortinniarlugu eqqartuunneqarsimasup inissiisarfimmi pillagaassutaasinnaasumik atorfilittamut imaluunniit taassuma qanigisaanut pinerluuteqarfigisimasaani inissisimatinneqarnissaa. Taamaalilluni Justitsministeriap paasinninnerivaa, pisuni taamaattuni atorfilittanut innimiginnilluni nalilersuilluartoqareerneratigut qanittumiinnissamik

tungaveqarnerup avaqunneqarsinnaaneranut tungavissaqarsinnaanera.

Tamatuma saniatigut inatsisissatut siunnersuummi § 1, nr. 12 kiisalu tassunga oqaaseqaatit innersuussutigineqarput.

## **2.7 Imigassamik aamma aanngajaarniutinik atornerluinerit akiorniarlugit suliniutit**

### *2.7.1. Pulaartunik misissuineq*

#### *2.7.1.1. Inatsisit atuuttut*

Pinerluttulerinermi inatsimmi § 215, imm. 1 malillugu, inissinneqarsimasut ikinnerpaamik sapaatip akunneranut ataasiarlutik sivikinnerpaamik akunneq ataaseq aammalu akunnerit marluk angullugit pulaartoqarsinnaatitaapput. Inissinneqarsimasunut aneequsaanngitsunut pulaartoqarnissamut sapinngisamik annertusisamik akuersissuteqartoqartassaaq.

Imm. 3 malillugu Kalaallit Nunaannit Pinerluttunik Isumaginnittut pisortai, torersuunissaq imaluunniit isumannaatsuunissaq pillugu inissinneqarsimasut pulaartoqarsinnaanerit pillugu imm. 1, pkt. 1 malillugu eqqartuussivimmi killilersuutinut malittarisassanik aalajangersaasinnaapput.

Pinerluttulerinermi inatsimmi § 215, Kalaallit Nunaanni pinerluttulerinermi inatsimmut siunnersuutitigut inatsit nr. 306, 30 april 2008-meersukkut ikkunneqarpoq.

Inatsimmut tungaviuvoq eqqartuussiveqarneq pillugu ataatsimiititaliarsuup isumaliuutissiissutaa. § 215, imm. 3 pillugu ataatsimiititaliarsuaq inassuteqarpoq, isumannaatsuunissaq pillugu pulaartoqarsinnaanermut killilersuutinut malittarisassanik aalajangersaasinnaanissamut pinerluttunik isumaginnittut pisortai piginnaatinneqassasut, tassunga ilagitillugu inunnik aalajangersimasunik pulaaqqusinningineq pillugu aammalu nakkutilliisoqarluni pulaartoqarnissaq pillugu, pulaartoqarnissamut akuersissuteqarnissamut pulaartup qaatiguunik aamma nassataanik misissuinissamut piumasqaateqarsinnaaneq pillugu, aammalu pulaartoqarnerup unitsinneqarsinnaanera pillugu aalajangiisinnaanermut piginnaatitaanermik. Eqqartuussiveqarneq pillugu ataatsimiititaliarsuup isumaliuutissiissutaanut, atuakkap ungalua III, qupp. 1093-1094.

Pinerluttunik isumaginnittut inissiisarfiini inissinneqarsimasunut pulaartoqarsinnaaneq pillugu nalunaarummi (pulaartoqarneq pillugu nalunaarut) nr. 1174, 7. december 2009-meersumi pulaartunik misissuineq pillugu malittarisassat aalajangersarneqarput, pinerluttulerinermi inatsimmi § 215, imm. 3 malillugu.

Pulaartoqarneq pillugu nalunaarummi § 8, imm. 1 malillugu, immikkoortorta qarfimmi matoqqasumi pulaartoqarnissamut akuersissuteqarnissamut pinngitsoorani maleruagassaavoq, pulaartup nassatami misissorneqarnissaanut akuersinissaa.

§ 8, imm. 2 malillugu, inissiisarfimmi ammasumik imaluunniit ilaannaakortumik matoqqasumi pulaartoqarnissamut akuersissuteqarnissamut piunasaqaataasinnaavoq, pulaartup nassatami misissorneqarnissaanut akuersinissaa. Piunasaqaataasinnaasoq taamaalilluni pinngitsoorani maleruagassaangilaq.

Pulaartoqarneq pillugu nalunaarummi § 9, imm. 1 malillugu, immikkoortorta qarfimmi matoqqasumi pulaartoqarnissamut akuersissuteqarnissamut pinngitsoorani maleruagassaavoq, pulaartup qaatiguumi misissorneqarnissaanut akuersinissaa.

§ 9, imm. 2 malillugu, inissiisarfimmi ammasumik imaluunniit ilaannaakortumik matoqqasumi pulaartoqarnissamut akuersissuteqarnissamut piunasaqaataasinnaavoq. Aamma tamanna piunasaqaataasinnaasoq pinngitsoorani maleruagassaangilaq.

Pulaartup qaatiguunik misissuineq pissappat, pulaartoqarneq pillugu nalunaarummi § 11 malillugu, tamanna pitinnagu pulaartumut nalunaarutigineqassaaq, misissuineq pineqartup akuersineratigut aatsaat pisinnaasoq, aammalu itigartitsisoqarneranik kinguneqartitsisoqarsinnaasoq, pineqartoq misissorneqarusunnigippat.

Immikkoortorta qarfinni matoqqasuni kiisalu ilaannakortumik matoqqasuni aammalu ammasuni, pulaartoqarneq pillugu nalunaarummi § 10, imm. 1 malillugu, qaatiguunik misissuineq ima ingerlassaaq, pulaartoq qinnuigineqassalluni kaasarfimmiittuutiminik il. il. takutitsinissamut. Misissuineq aamma pulaartup qaatiguunik metaldetektor atorlugu misissuineramik ilaqarsinnaavoq.

Pulaartoqarneq pillugu nalunaarut, ammasumi imaluunniit ilaannakortumik

matoqqasumi pulaartup qaatiguunik annertusisamik misissuinissamut periarfissaqartitsinngilaq.

Taamaattorli § 10, imm. 2 malillugu, matoqqasumi pulaartup qaatiguunik annertusisamik misissuisoqarsinnaavoq, pisuni ataasiakkaani tunngavissalimmik pasitsaanneqarpat, pulaartoq anngiortumik eqqussiniartoq. Pulaartup qaatiguunik annertusisamik misissuineq imm. 3 malillugu imatut pissaaq, pulaartup qaatiguumi peernissaanik qinnuigineqassalluni, inissiisarfiup taassuminnga misissuilluarnissaa siunertaralugu.

Pulaartoqarneq pillugu nalunaarummi § 12, imm. 1 malillugu, pulaartup qaatiguunik annertusisamik misissuineq inimi misissuinnermut atugassiami pissaaq aammalu ingerlanneqassanani imaluunniit malinnaaffigineqassanani misissorneqartussap suiaaqatiginngisaanit.

§ 12, imm. 2 malillugu, annertusisamik misissuineq pulaartunit allanit imaluunniit inissinneqarsimasunit malinnaaffigineqassanngilaq. Taamatuttaaq misissuineq imatut ingerlanneqassaaq, pulaartup killissaanik qaangiisumik sapinngisamik pissuseqarfiussanani, tak. § 12 imm. 3.

#### *2.7.1.2. Justitsministeriap eqqarsaatai aalajangersagassatullu siunnersuut*

Pulaartunik misissuineq pillugu malittarisassat pulaartut innarligassaanninnerinut mianerinninnermut aammalu isertitsivinnut anngiortumik eqqussinnginnissamut mianerinninnermut oqimaaqatigiissitsinermik ersersitsissapput.

Pillaasarneq pillugu inatsisip, pillaatit eqquutsinneqarnissaat il. il. pillugit inatsisip aamma naalagaaffimmiit ilinniarnermusiat pillugit inatsisip allanngortinneqarnissaannik inatsisikkut nr. 628, 12. juni 2013-imeersukkut (Iperagaagallarnissamut periarfissaq annertusisaq aamma singernikkut kalunneqarluni pineqaatissinneqarneq annertusisaq, isertitsivimmi nakkutilliisutut il. il. ilinniarnermut atatillugu atuarnermi ilinnianermusiat) inissiisarfinni pulaartunik misissuisarneq pillugu malittarisassat allanngortinneqarput, Danmarkimi anngiortumik eqqussisarnerit akiorniarlugit suliniuteqarnerup sakkortusinissaa siunertaralugu.

Inatsimmik allannguinnermut tunuliaqutinut ilaavoq, pinerluttunik isumaginnittut inissiisarfii pulaartoqarnermut atatillugu anngiortumik eqqussisoqartarneranik siumuisarnerat, taamaattumillu pisariaqartutut nalilerneqarsimavoq pulaartut parnaarussivinnut anngiortumik

eqquussisarnerinut, tassunga ilagitillugit aanngajaarniutunik aamma atortunik inerteqquataasunik assigiinngitsunik, inissiisarfiit isumannaarinissamut periarfissaasa annertusinissaat.

Danskit inatsisissatut siunnersuutaannut oqaaseqaatit nalinginnaat innersuussutigineqarput, imm. 6.2, tak. Folketingstidende 2012-13, A, L 133, saqqummiunneqartutut, qupp. 22.

Justitsministeriap paasinninnerivaa, Kalaallit Nunaanni Pinerluttunik Isumaginnittut Kalaallit Nunaanni isertitsisarfinni anngiortumik eqquussisarnerit akiornissaannut periarfissaqarnerata nukittorsarneqarnissaa pisariaqartinneqartoq, aammalu tamanna tunuliaqutaralugu siunnersuutigineqarpoq pulaartunik misissuinissamut periarfissat Kalaallit Nunaannut annertusineqarnissaannut malittarisassanik eqquusinissaq.

Tamanna tunuliaqutaralugu siunnersuutigineqarpoq, isertitsiviit pulaartut annertusisamik misissorneqarnissaannut piunasaqarsinnaanerannik periarfissaqarnissaat, ullumikkut malittarisassat periarfissaqartitsinerannut taarsiullugu. Siunnersuutip pulaartup takkunnermini atisat atugaasa misissorsinnaanerinut inissiisarfiit periarfissippai, taamatuttaaqaq pulaartup qaatiguuisa aammalu atortut nassatarisaasa annertusisamik misissorsinnaanerinut.

Tamatuma saniatigut ataatungaani qimmit aanngajaarniutunik naamasartut atorlugit pulaartunik misissuineq pillugu immikkoortoq 2.7.1.3. innersuussutigineqarpoq.

Aammattaaq inatsisissatut siunnersuummi § 1, nr. 10 aamma 11 innersuussutigineqarput. Siunnersuut akuerineqassappat, aammattaaq pulaartoqarneq pillugu nalunaarummi pisariqartumik allannguisoqassaaq.

*2.7.1.3. Qimmit aanngajaarniutunik naamasartut atorlugit pulaartunik aamma inissineqarsimasunik misissuineq*

Naalakkersuisut 2021-mut aningaasanut inatsimmut atatillugu, piffissap naammassinniffissap kingornatigut, Kalaallit Nunaanni Pinerluttunik Isumaginnittut inissiisarfiini qimmit atorlugit aanngajaarniutit inerteqquataasut pillugit misissuisinnaanngornissaaq isumannaarpaat.

Kalaallit Nunaanni isertitsivinni haship atugaanera annikillisarniarlugu misiligutitut suliniutigineqarpoq, qimmimik aanngajaarniutunik naamasartumik peqarlernissaaq.

Pinerluttulerinermi inatsimmi § 221, imm. 1 malillugu, inissiisarfiup misissorsinnaavaa inissinneqarsimasoq pigisanik sunik inimi sumiiffigisamini imaluunniit timimini suuteqarneris (timimik qimerluuineq), tamanna torersuunissamik aalajangersakkat malinneqarnissannut imaluunniit isumannaatsuunissamik mianerisassat malinneqarnissaannut qulakkeerinninnissaq pisariaqartinneqarpat. Immikkoortoq 2.7.2.1.-imi ataaniittoq aamma takuuk.

Inissiisarfiup aqutsisuata § 221, imm. 2 malillugu isumannaallisaanermut mianerisassat pissutigalugit aalajangersinnaavaa inissinneqartup inutaa misissorneqassasoq (timimik misissuineq), aalajangersimasunik pissuteqarluni isumaqartoqarpat inissinneqarsimasoq pisussaaffiginagu pigisanik pigisaqartoq.

§ 221, imm. 5 malillugu Kalaallit Nunaanni Pinerluttunik Isumaginnittut pisortai inissinneqarsimasup inuttaata aamma inigisaata misissorneqarnissaasa naammassineqarnissaat pillugu malittarisassamik aalajangersaasinnaapput. Taamaattumik naatsorsuutigineqarpoq, qimminik aanngajaarniutunik naamasartunik atulluni inissinneqarsimasunik misissuisarneq pillugu najoqqutassianik aalajangersaasoqassasoq.

Timimik qimerluuinikkut, pinerluttulerinermi inatsimmi § 221, imm. 1 malillugu, malittarisassat atuuttut sinaakkutaasa iluini, Kalaallit Nunaanni Pinerluttunik Isumaginnittut qimmit aanngajaarniutunik naamasartuutaat atorneqassapput inissinneqarsimasunik misissuinerne.

Inissinneqarsimasoq qimmeq aanngajaarniutunik naamasartuq atorlugu misissorneqarusunnigippat, taamatut misissuineq naammassineqassanngilaq, § 221, imm. 3 aamma 4-mi qimminik naamasartunik mianerinninnissaq pissutigalugu, kiisalu oqimaaqatigiisitsinermik aamma qajassuussinermik tunngaveqarnerit pissutigalugit. Taarsiullugu, timimik misissuineq pillugu § 221, imm. 1 malillugu, misissuineq ullumikkut periuserineqartoq malillugu ingerlanneqassaaq aammalu timimik misissuineq pillugu § 221, imm. 2 malillugu ingerlanneqarsinnaalluni, tamatumunnga piumasagaatit naammassineqarsimappata.

Pulaartunik misissuinerne qimminik atuneq pinerluttulerinermi inatsimmi § 215-ip sinaakkutaasa iluani pissaaq, uani inatsisissatut siunnersuummi aalajangersakkap allassimaneratut, tak. immikkoortut 2.7.1.1.-ip aamma 2.7.1.2.-p qulaaniittoq.



Pinerluttulerinermi inatsimmi § 215, imm. 3 malillugu, uannga inatsisissatut siunnersuutitigut imm. 4-nngortussap, qimmit aanngajaarniutunik naamasartut atorlugit pulaartunik misissuisarnermut allaffissornikkut malittarisassanik aalajangersaasoqassaaq.

Tassunga atatillugu aalajangersarneqassaaq, qimmeq aanngajaarniutunik naamasartuq atorlugu pulaartumik misissuineq taamaallaat pisassasoq pulaartup akuersineratigut. Aammattaaq aalajangersarneqassaaq, tamanna itigartitsinermik kinguneqarsinnaasoq, pulaartoq qimmimik aanngajaarniutunik naamasartumik misissorneqarusunngippat. Tamanna pisuni ataasiakkaani naliliinikkut pisassaaq, pulaartup qimmimik aanngajaarniutunik naamasartumik misissorneqarusunnginnera itigartitaaneramik kinguneqassanersoq. Tassani naliliinermi ilaatigut tunngavigineqassaaq, pulaartup itigartitsinerminut suna pissutiginneraa.

### *2.7.2. Isertitsivinni quumik aamma supoorsilluni misiligutit*

#### *2.7.2.1. Inatsisit atuuttut*

Pinerluttulerinermi inatsimmi § 221, imm. 1 malillugu, pinerluuteqarsimasunik isumaginnittoqarfiup misissorsinnaavaa inissinneqarsimasoq pigisanik sunik inimi sumiiffigisamini imaluunniit timimini suuteqarnersoq (takunnilluni misissuineq), torersuunissamik aalajangersakkat malinneqarnersut imaluunniit isumannaatsuunissamik mianerisassat malinneqarnersut, ilanngullugu inissinneqarsimasoq inissiisarfiimmut isertinneqarpat, pulaartoqarnini sioqqullugu tamatumalu kingorna, inissiisarfiimmit imaluunniit immikkoortoqarfimmit sumiiffigisaminiit peqannginnini sioqqullugu kingoqqullugulu, imaluunniit inissinneqarsimasoq pasineqarpat pigisanik pisussaaffiginnigisaminiit pigisaqartoq, taamatut misissuinissaq pisariaqartutut isigineqarpat.

Inissiisarfiup aqutsisuata § 221, imm. 2 malillugu isumannaallisaanermut mianerisassat pissutigalugit aalajangersinnaavaa inissinneqartup inuttaa misissorneqassasoq, aalajangersimasunik pissuteqarluni isumaqartoqarpat inissinneqarsimasoq pisussaaffiginagu pigisanik pigisaqartoq. Taamatut timikkut misissuineq taamaallaat nakorsaq najuutsillugu ingerlanneqarsinnaavoq. Nakorsap isummerfigissavaa akuliunnerup piviusunngortinnera tamatumunngalu atasumik annersitaasinnaaneq kiisalu inissinneqarsimasup qanoq issusaa nakorsatut illersorneqarsinnaanersoq. Misissuineq piviusunngortinneqassanngilaq akuliunnerup siunertaa aamma akuliunnerup kanngunarsaataanera kiisalu akuliunnerup ippiortitsinertut

kingunerisinnaasaatut eqqarsaataasut imminnut atsikkutigiinningsutut isigineqarpata, tak. § 221, imm. 3.

Misissuineq pissutsit aallaavigalugit sapinngisamik sallaatsumik ingerlanneqassaaq. Misissuinerit atisaajarnermik kinguneqartut inissineqartup suaaraqatiginngisaanik najuuffigineqartut taamaallaat qaqutiguinnaq pisinnaapput. Tamannali peqqinnissaqarfimmi sulisunut atuutinnilaq, tak. § 221, imm. 4.

Kalaallit Nunaanni Pinerluttunik Isumaginnittut aqutsisuisa inissinneqarsimasup inuttaanik inimillu sumiiffigisaanik misissuinerit ingerlanneqarnissaannut maleruagassat aalajangersassavaat, tak. § 221, imm. 5. Aalajangersagaq taanna malillugu, pinerluttunik isumaginnittut inissiisarfiini inissinneqarsimasunik aamma isersimaartarfiinik misissuineq pillugu nalunaarut nr. 1175, 7. december 2009-meersoq atuutilersinneqarpoq.

Aalajangersagaq Kalaallit Nunaanni pinerluttulerinermi inatsit pillugu inatsit nr. 306, 20. april 2008-meersukkut eqqunneqarpoq.

Aalajangersakkamut oqaaseqaatitigut takuneqarsinnaavoq, tak. Folketingstidende 2007-08, ilaliussaq A, qupp. 1693, »pigisat suut inissinneqarsimasup timimini piginerai misissorlugu«-mi siunniunneqarpoq akuliunneq timimik takunnilluni misissuineq, tassalu inuup timaani ammanerit pulaffiginagit imaluunniit misissuineq siunertaralugu timimik attuualaarinani misissuineq.

Ilanngullugu takuneqarsinnaavoq pinerluttulerinermik inatsimmi § 221, imm. 2 malillugu timikkut piviusumik misissuineq qaqutiguinnaq atorineqarsinnaasoq. Timikkut piviusumik misissuineq tassaavoq timikkut attuisarluni misissuineq, ilanngullugu timip ammerinik misissuineq (assersuutigalugit itip ammaneranik aamma naalungiarsuup aqutaanik misissuinerit), aaversilluni misissuineq il.il. Taamaallaat inissiisarfiup aqutsisua tamanna pillugu aalajangiisinnaatitaavoq, misissuinerlu taamaallaat nakorsamit suliarineqarsinnaalluni. Nakorsap nalilinerrani nakorsat ileqqorissaarnissamut maleruagassat atorineqassapput. Tamatumunnga ilaavoq inissinneqarsimasup akuliunnermut akuersisimanissaa.

Inissinneqarsimasup inuttaanik aamma inimik sumiiffianik misissuineritut pinerluttulerinermik inatsimmi aalajangersakkat Kalaallit Nunaanni pinerluuteqarsimasunik isumaginnittoqarfiup inissiisarfiini

inissinneqarsimasut aneersinnaatitaanerat pillugu nalunaarut nr. 1157, 7. december 2009-meersumik ilassuserneqarput (aneersinnaanermut nalunaarut). Aneersinnaanermut nalunaarummi § 3, imm. 1 nr. 10-mit takuneqarsinnaavoq aneersinnaanermut akuerineqarnissaq atugassarititaasunik piunasaqaatitaqartinneqarsinnaasoq, taakku aneersinnaanermut akuersissutip atornerlunneqarnissaa pinngitsoortissavaat imaluunniit eqqortuliortussaanerup mianerinissaanut iluaqutaassallutik, ilanngullugu inissinneqarsimasup inissiisarfimmut uternerani imigassartorsimanermut misiliinissamut inissinneqarsimasoq peqataassalluni, quumilli misiliinissaq ilaatinneqarani.

Ilanngullugu aneersinnaanermut nalunaarummi § 3, imm. 3, pkt. 1.-imi takuneqarsinnaavoq pinerluuteqarsimasunik isumaginnittoqarfiup, imigassartorsimanermik misissortinnissamut piunasaqaatinik aalajangersaasoqarsimannginnera apeqqutaatinnagu, aalajangersinnaagaa inissinneqarsimasut aneereersimanermik kingorna uteqqinnerminni taamatut misissortittassasut, pisuni ataasiakkaani taamatut pisoqarnissaa pissutsit aallaavigalugit pisariaqartutut isigineqarpat. Taamatut misissuineq angerlamut apuunnermi suliarineqarsinnaavoq, aamma itikkut aamma naalungiarsuup aqquaatigut misissortinnermik ilaneqarsinnaalluni, tak. pinerluttulerinerimi inatsimmi § 221, imm. 2.

Tamatuma saniatigut pinerluuteqarsimasunik isumaginnittoqarfik inissinneqarsimasunik supoorsititsilluni aamma quumik misissuinissamut inatsisitigut tungavissaqanngilaq, aatsaat taamatut iliorsinnaalluni inissinneqarsimasoq tamatumunnga akuersippat. Taamaasilluni pinerluuteqarsimasunik isumaginnittoqarfiup inissiisarfii inatsisit atuuttut malillugit inissinneqarsimasut supoorsitillugit misissussallugit piunasaqaateqarsinnaanngillat, taamaallaalli aneereerneramik kingorna uterlutik takkunneranni taamatut iliorsinnaallutik, aamma inissinneqarsimasut quumik misissugassamik tunniussinissaat qaqugukkulluunniit piunasaqaatigissallugu inatsisitigut tungavissaqanngillat. Taamaasilluni inissinneqarsimasoq pissusissanik saneqqutsisimasutut pineqaatissinneqarsinnaanngilaq quumik supoorsillunilu misiligutinik tunniussiumannginnermigut.

Oqaatigineqassaaq Kalaallit Nunaanni Pinerluttunik Isumaginnittut quumik misiligutit uppernarsarlugit nalilersueqqissaarnissamut periarfissaqanngimmat, taamaattumik periuseq maanna atorineqanngilaq. Pinerluuteqarsimasunik isumaginnittoqarfiup Kalaallit Nunaanni peqqissutsimut oqartussanik oqaloqateqarpoq, suleqatigiilernissaq siunertaralugu, tamatuma kingorna uppernarsarlugit nalilersueqqissaarnerit

peqqissutsimut oqartussat laboratooriaanni ingerlanneqarsinnaalissapput.

### *2.7.2.2. Justitsministeriap eqqarsaatai aalajangersagassatullu siunnersuut*

#### *2.7.2.2.1. Quumik aamma supoorsilluni misiligutit*

Kalaallit Nunaanni Pinerluuteqarsimasunik Isumaginnittoqarfiup oqaatigaa Kalaallit Nunaanni inissiisarfinni inissinneqarsimasuni arlaleriarlutik imigassamik nassaartarsimalluni. Pinerluuteqarsimasunik isumaginnittoqarfik qulaani takuneqarsinnaasutut periarfissaqanngilaq pisuni allani inissinneqarsimasunik supoorsititsilluni imigassartorsimanermik misiliinissaq piunasaqaatigissallugu, taamaallaalli aneereerluni utermermi taamatut iliorsinnaalluni. Kalaallit Nunaanni Pinerluuteqarsimasunik Isumaginnittoqarfik soorlu aamma qulaani takuneqarsinnaasutut quumik nakkutilliilluni misiliguteqarnissamut inatsisitigut tungavissaqanngilaq, aatsaat taamatut iliorsinnaalluni inissinneqarsimasooq tamatumunnga akuersippat.

Ikiaroorartut pillugit inatsisip aamma pillaatisiap naammassineqarnissaa pillugu inatsisip allanngortinneqarnissaat pillugu inatsit nr. 445, 9. juni 2004-meersukkut (Ikiaroorartunik il.il. sakkortusisamik akiuiniarneq) Danmarkimi pinerluuteqarsimasunik isumaginnittoqarfiup parnaarussiviini paarnaarussat quuinik misiligutinik tiguisoqarsinnaalerpoq, ikiaroorartunik aamma akuutissanik allanik inatsisit nalinginnaasut malillugit intertequtaasunik, soorlu nukkassaatinik il.il. atonerluisoqarsinnaanerata misissorneqarnissaa siunertaralugu. Aalajangersagaq malillugu quumik misiligutit nalinginnaalluinnartumik piunasaqaatigineqarsinnaapput, aalajangersimasumik pasitsaassaqarnikkut aamma misiligutinik tigusinissaq siunertaralugu.

Danskit maleruagassaannut tunuliaqutitut mianeriniarneqartoq tassaavoq ikiaroorartunik inertequtaasunik atonerluineq parnaarussivinni inooqatigiinnermut pitsaanngitsumik kinguneqartarmat, aammalu sulisunut parnaarussallu akornanni nakuusernermut pissutaaqataasarluni. Aammattaaq pinerluuteqarsimasunik isumaginnittoqarfiup misilittagai malillugit ikiaroorartunik inertequtaasunik atonerluineq parnaarussat inuiaqatigiinnut akuuleqqinnissaannut, atuarnernut, sulinerannut il.il. sunniuteqartarpoq.

Ikiaroorartunik akuutissanillu aallanik inatsisit nalinginnaat malillugit inertequtaasunik anngiortumik eqqussuineq, niuerneq atonerluinerlu taakkualu kingunipilui pinngitsoortinniarlugit Justitsministeriap isumaa

malillugu pinerluuteqarsimasunik isumaginnittoqarfiup parnaarussiviinik sakkortunerusumik nakkutilliinissaq pisariaqartinneqarpoq.

Danskít inatsisissatut siunnersuutaannut oqaaseqaatini nalinginnaasuni imm. 3 innersuussutigineqarpoq, tak. Folketingstidende 2003-04, ilaliussa q A, qupp. 6316.

Pillaatisiap il. il. naammassineqarnissaa pillugu inatsisip, suliffeqarnermut ilinniartitaaneq il. il. pillugit inatsisip, ammasumik ilinniartitaaneq pillugu inatsisip (inuussutissarsiutinut sammititamik inersimasunik ilinniartitsineq) il. il. aamma eqqartuussisarneq pillugu inatsisip (pinerlunniartartoqatigiinnut ilaasortat il. il. pulaarsinnaatitaannginnerat pinngitsisaaliissummik sipaagaqarneq, AMU-mi pikkorissarnernut peqataasinnaaneq, imigassamik nakkutilliineq, arsaarinninnermut il. il. annertusisamik aqutissaqarneq) allanngortinneqarnissaat pillugu inatsit nr. 713, 8. juni 2018-imeersukkut, pillaatiniq eqquutsitsineq pillugu inatsimmi § 60 a annertusineqarpoq parnaarussat quunik misiliisinaanerup assigisaanik atugassaqartitaalluni supoorsitillugit misiliisinnaaneq ilaatinneqalerluni.

Annertusisitsinermut tunuliaqutitut mianeriniarneqartoq tassaavoq imigassartorneq ikiaroonartunik atuneq assigalugu pinerluuteqarsimasunik isumaginnittoqarfiup parnaarussiviini inooqatigiinnermut pitsaanngitsunik kinguneqartarnera.

Justitsministeria isumaqarpoq Danmarkimi 2004-mi aamma 2018-imi inatsisunik allannguinnermut tunngaviusumik mianeriniakkat aamma Kalaallit Nunaannut atatillugu atuuttut assigigaat, taamaattumik siunnersuutigineqarpoq pinerluuteqarsimasunik isumaginnittoqarfiup inissiisarfiini inissinneqarsimasunut quumik supoorsillunilu misiligutinik tigusinissamut nalinginnaasumik aaqquissuussinissamut maleruagassanik eqquussoqassasoq.

Imigassartorsimanerup uppersarnissaanut supoorsilluni misiligutit naleqqulluartuupput, soorlu aamma quumik misiligutit ikiaroonartunik il. il. inertequtaasunik atornerluineq nalilersoqqissaarlugu uppersarnissaanut naleqquttuusut, aamma misiligutinik atorlugit nakkutilliinissamut siumoortumik pasitsaassaqarmanissaq piumasaaqatiginngikkaluarlugu nalinginnaasumik aqutissaqarnissaq Justitsiministeriap isumaa malillugu Kalaallit Nunaanni Pinerluuteqarsimasunik Isumaginnittoqarfik periarfissaqalissaaq inissinneqarsimasut imigassamik, ikiaroonartunillu il. il. inertequtaasunik

anngiortumik eqqussuinerannut, niuernerannut atonerluinerannullu angusaqarfiulluartumik akuliussinnaanerannut, tamannalu nalilerneqarpoq inissiisarfinni inooqatigiinnermut inissinneqarsimasullu inuiaqatigiinnut akuuleqqinnissaannut pitsaasumik kinguneqassasoq. Peqatigisaanillu misiligutitigut nakkutilliinikkut pinerluuteqarsimasunik isumaginnittoqarfiup paasisinnaalissavaa atonerluineq qanoq annertutiginersoq, aamma imigassamik ikiaroorannut inissiisarfinnut anngiortumik eqqussuinerit annertussusaat paasisinnaalissavaa, taamaasilluni inatsisinik unioqutitsisumik ingerlatat akiorniarnerrannut tunaartaqarnerusumik suliniuteqarsinnaalissalluni.

Danskit inatsisissatut siunnersuutaanni imm. 2-mut oqaaseqaatit nalinginnaat innersuussutigineqarput. Tak. Folketingstidende 2017-18, ilanngussaq A, L 203, qupp. 18-19.

#### *2.7.2.2.2. Quumik supoorsillunilu misiligutit piviusunngortinnerat*

Quumik supoorsillunilu misiligutinik tunniussineq inissinneqarsimasumut akuliunnerit allat assigalugit mianersortumik tunngaveqarnissamik nalinginnaasunut ilaasariaqarput. Taamaattumik siunnersuutigineqarpoq § 221, imm. 4, aalajangersakkamut siunnersuutigineqartumut aamma atorneqassasoq. Tamanna ilaatigut isumaqarpoq supoorsilluni aamma quumik misiligutinik tunniussinermi inissinneqarsimasut allat najuuttariaqanngitsut.

Aammattaaq pisortat ingerlatsinerannut inatsisitigut tunngaviit nalinginnaat malitsigisaannik supoorsilluni aamma quumik misiligutit taamaallaat piimasaqaatigineqarsinnaapput tamatumunnga suliamut atatillugu naammaginnartumik tunngavissaqarpat.

Quumik misiligummik tunniussinermi ilaatigut atisaajartoqartariaqarpoq. Taamaattumik Justitsministeriap isumaa malillugu quumik misiligummik tunniussinermi inuit inissinneqarsimasumit allatut suaassusillit qaqutigunnaq najuuttariaqarput. Akerlianilli supoorsilluni misilitsinnermi tamanna aalajangersakkamut pingaaruteqanngilaq, tamatumunnga atatillugu atisaajarnissaq pisariaqanngimmat.

Quumik supoorsillunilu misiligutinik tunniussineq imatut annertuumik akuliunnertut isigineqanngilaq, taamaattumik nakorsap najuunnissaa piimasaqaatigineqartariaqarnani.

Taamaattumik Justitsministeriap isumaa malillugu § 221, imm. 2-p maanna

atuuttup atorneqarfia annertusineqartariaqanngilaq quumik imaluunniit supoorsilluni misiligummik tunnissineq ilaasussanngolugit. Taamatut oqarnermi § 221 a-mi aalajangersakkami quumik misiligummik tunniussinermi timikkut pinngitsaaliineq pineqanngimmat (sullulimmik ikkussilluni quititsineq), kisiannili taamaallaat pinngitsaaliinertarivaa inissinneqarsimasoq pissusissanik malinninngitsut pineqaatissinneqarsinnaammat, tak. ataaniittoq, pineqartoq quumik misiligummik tunniussiumanngippat.

Suleriaaseq tunngavigalugu quumik misiligummik tunniusserup piviusunngortinneranut maleruagassat erseqqinnerusut allaffissornikkut najoqqutassatigut aalajangersarneqassasut siunnersuutigineqarpoq. Tamatuma inissinneqarsimasup inuttaanik inimillu sumiiffigisaanik § 221 malillugu aaqquissuusserup atuuttup assigaa, tak. § 221, imm. 5.

Tamatuma saniatigut inatsisissatut siunnersuummi § 1, nr. 15 tamatumunngalu oqaaseqaatit innersuussutigineqarput.

#### *2.7.2.2.3. Pissusissanik malinninngitsutut kinguneqartitsinerit*

Justitsministeria isumaqarpoq aalajangersagassatut siunnersuutit siunertaat mianeralugit nakkutilliinissamat periarfissat siunnersuutigineqartut angusaqarfiulluarnissaasa qulakkeernissaat pisariaqartinneqartoq, pinerluuteqarsimasunik isumaginnittoqarfik – danskit maleruagassaat assigalugit – inissinneqarsimasut quumik imaluunniit supoorsilluni misiligummik tunniussiumanngippata kinguneqartitsinissamik pisussaaffiliisinnaassasoq. Taamaanngippat aalajangersagaq taamaallaat killilimmik sunniuteqarsinnaassaaq.

Taamaattumik siunnersuutigineqarpoq pinerluttulerinermik inatsimmi § 226, pissusissanik malinninnani unioqqutitsinernut tunngasumi ilanngunneqassaaq quumik imaluunniit supoorsilluni misiligummik tunniussinissamat itigartitsinerni pissusissanik malinninngitsutut pineqaatissiissoqassasoq.

Ilanngullugu siunnersuutigineqarpoq quumik imaluunniit supoorsilluni misiligummik tunniussiumannginnermi pissusissanik malinninngitsutut pineqaatissiisutitut ineeqqaamut kisimiiffiusussamat inissinneqarnissaq inatsisitigut tunngavissinneqassasoq. Taamatut iliornikkut siunertaavoq quumik supoorsilluniluunniit misiligummik tunniussiumannginnermi pineqartup quumik supoorsilluniluunniit misiligummik positiviusumik tunniussinermi, tamannalu tunuliaqataralugu uppernasineqarsinnaalluni

imigassartorsimasoq, umaluunniit ikiaroorartunik imaluunniit akuutissanik allanik inatsisit nalinginnaasut malillugit inerteqqutaasunik atuisimasoq, taamaasillunilu pineqaatissiisummik assigisaanik kinguneqartitsinnaanerup qulakkeerneqarnissaa. Taamaasilluni quumik supoorsilluniluunniit misiligummik tunniussinissamut peqataajumannginnermi pissusissanik malinnginngitsutut ineeqqamut kisimiiffiusumut inissinneqarnissaaq pinngitsoorneqarsinnaassanngilaq.

Ilanngullugu siunnersuutigineqarpoq pissusissanik malinnginngitsutut unioqqutitsinerit pillugit § 226-imi aalajangersakkami erseqqissumik takuneqarsinnaassasoq, imigassartorneq, ikiaroorartunik akuutissanilluunniit allanik inatsisit nalinginnaat malillugit inerteqqutaasunik atuneq pissusissanik malinngitsutut pineqaatissinneqarnermik kinguneqarsinnaassasut.

Imigassartorneq, ikiaroorartunik akuutissanilluunniit allanik inatsisit nalinginnaat malillugit inerteqqutaasunik atuneq inissinneqarsimasup maleruagassanik inissiisarfirmut atuuttunik unioqqutitsisimaneranik peqatigisaanik takutitsisuuvoq. Taamaattumik tamatuma erseqqissumik kingunerisariaqarjaa pineqartup pissusissanik malinninngitsutut pineqaatissinneqarnissaa. Aammattaaq pinerluttulerinermik inatsit atuuttoq malillugu inissinneqarsimasut ikiaroorartunik akuutissanillu allanik inatsit malillugit inerteqqutaasunik atuisut ineeqqamut kisimiiffiusumut inissinneqarnissaaq periarfissaareerpoq.

Suliani ataasiakkaani inissinneqarsimasup imigassartorsimaneranik, ikiaroorartunik imaluunniit akuutissanik allanik, inatsisit nalinginnaat malillugit inerteqqutaasunik atuisimaneranik aalajangersimasumik naliliineq tunngavigineqartassaaq. Suleriaatsikkut quumik misiligut positiviusoq nalinginnaasumik pineqarup ikiaroorartunik il.il. atuisimaneranik takussutissaassaaq, soorlu aamma supoorsilluni misiligut positiviusoq imigassartorsimaneranik takussutissaassasoq. Aamma pissutsit allat, soorlu qilanngaarpaluttumik oqalunneq, saniportartarluni pisunneq il.il. aalajangersimasumik naliliinermut ilaatinneqassasut.

Inatsisissatut siunnersuummut § 1, nr. 13, 14, 15, 16 aamma nr. 17, kiisalu taakkununga oqaaseqaatit innersuussutigineqarput.

### **3. Danmarkip nunap tamalaani pisussaaffiitut tunngasut**

*Isertitsivinni quumik aamma supoorsilluni misiligutit*



EMRK isumaqatigiissummi immikkoortoq 8, imm. 1 malillugu, kinaluunniit namminerisaminik inuuneqarnini pillugu ataqqineqartussaavoq. Pisortat oqartussa qarfiat sunaluunniit pisinnaatitaaffimmut taassumunnga akulerussinnaatitaanngilaq, imaassimanngippat inatsit naapertorlugu tamanna pisoq aamma inuiaqatigiinni demokratiskiusumi tamanna pisariaqartoq (atsikkutigiiisumik) ilaatigut eqqissiviilliorneq imaluunniit pinerlunneq pitsaaliorniarlugit imaluunniit allat pisinnaatitaaffii aamma kiffaanngissusii illersorniarlugit, tak. Immikkoortoq 8, imm. 2.

Den Europæiske Menneskerettighedsdomstol-ip periusaa malillugu pineqaatissiineq, inuit namminerisamik inuunerannut tunngasoq, minnerpaaffittut sakkortussuseqassaaq immikkoortoq 8-mi akulerunneq pissappat.

Inuit namminerisamik inuunerannik illersuinermit ilaatigut ilaavoq, inuup timikkut innarligassaannginnera. Inissinneqarsimasutut quumik aamma supoorsilluni misiligummik tunniussinissamut pisussaaffeqarnermit aamma tassunga atatillugu misiligummik tunniussiumanani naalagaatsuliorluni akisussaatinneqarsinnaanermi, tassunga atatillugu inimut kisimiittarissamut inissinneqarsinnaanerup atorneqarnera, Justitsministeriap paasinninnera malillugu tassaavoq namminerisamik inuuneqarnermut akulerunneq.

Pinerluttulerinermi inatsimmut § 221 a-mik eqqussinissamik siunnersuuteqarnermi siunertaavoq, anngiortumik eqqussuisarnermut aammalu aalakoornartortalinnik imaluunniit aanngajaarniutinik imaluunniit allanik atuinermit atatillugu inatsisit nalinginnaasut malillugit inerteqqutaasunik misissuisarnerup nukittorsarneqarnissaa. Tamanna misissuisarneq nukittorsarneqartoq aalakoornartutornermi kinguneqaataasartut naleqqutinngitsuusut pinngitsoortinnissaannut siunertaarpoq, pineqaatissinneqarnerup eqquutsinneqarnissaanut akornutaasartut. Allanguut siunnersuutigineqartoq eqqissiviilliornerit imaluunniit pinerlunnerit pitsaaliorneqarnissaannut aammalu allat pisinnaatitaaffii aamma kiffaanngissusii illersornissaannut mianerinninnermut tunngavoq.

Justitsministeriap paasinninnera malillugu akulerunneq malitsigiissuuvoq. Justitsministeriap matumuuna pingaartippaa, aalakoornartutorneq imaluunniit inerteqqutaasunik aanngajaarniutitorneq imaluunniit allanik atuneq inerteqqutaasoq, inissinneqarsimasunut inatsisit nalinginnaasut malillugit inerteqqutaasoq. Ministeriap aammattaaq pingaartippaa, aaqquissuussinerup siunertarigaa, inatsisit nalinginnaasut malillugit

inertequtaasunik, anngiortumik eqqussuisarnermut aamma aalakoornartutortarnermut, inertequtaasunik aanngajaarniutunik imaluunniit allanik atuisarnermut atatillugu, misissuisarnerup nukittorsarneqarnissaa, qulaani taaneqartutut arlariinnik pitsaanngitsunik kinguneqaateqarsinnaasunik. Quumik aamma supoorsilluni misiligutunik atuineq aammattaaq tulluurtumik aamma sunniuteqarluurtumik sakkutut isigineqassaaq, paasinninnissamut inissinneqarsimasut aalakoornartutorsimanerinit, inertequtaasunik aanngajaarniutitorsimanerinit imaluunniit allanik atuisimanerinit, inatsisit nalinginnaasut malillugit inertequtaasunik, taamaaliornikkullu aaqqissuussinikkut mianerineqartussat isumagineqarlutik.

Taamatuttaa qpineqarpoq, inissinneqarsimasut namminerisamik inuuneqarneranni killilimmik akulerunneq, aammalu quumik aamma supoorsilluni misiligut pinerluttulerinermi inatsimmi § 221, imm. 4 malillugu qajassuurtumik periuseqarneq malillugu tiguneqartussaana, tamassumalu malitsigissagaa, quumik aamma supoorsilluni misiligummik tigusinermi inissinneqarsimasunik allanik najuuttoqartariaqannginnera. Taamatuttaa quumik aamma supoorsilluni misiligutit, ingerlatsinermi periutsit nalinginnaasut malillugit, taamaallaat peqqussutigineqarsinnaapput, tamatumunnga tunngavissaqarluarpat.

Justitsministeriap tamanna tunuliaqutaralugu nalilerpaa, aaqqissuussineq EMRK immikkoortoq 8-p sinaakkutaasa iluani naammassineqarsinnaasoq.

#### **4. Pisortanut aningaasarnikkut kinguneri aamma atuutsitsilernerup pisortanut kinguneri**

Inatsisissatut siunnersuut pisortanut aningaasartuuteqarnerulersitsissaaq. Pingaartumik kinguaassiuutitigut pinerluuteqarsimasut Nuummi isertitsivimmi katsorsarneqartarnissaannut inissanik pilersitsineq aammalu ukiukitsunut kinguaassiuutitigut pinerluuteqarsimasunut pineqaatissiiisarnerup qaffanneqarnera aningaasartuuteqarnerulernermik nassataqassapput. Pinerluttunik isumaginnittunut tamakkiisumik eqqussinermit atatillugu ataavartumik ukiumut aningaasartuutissatut naatsorsuutigineqarput 5,0 mio. kr.-nit.

Allat suliniutaasut eqqarsaatigalugit annikinnerusumik inatsisissatut siunnersuut aningaasartuuteqarnermik kinguneqarsinnaavoq.

Digital-inngortitsinermit atatillugu inatsisissatut siunnersuut kinguneqarnissaa naatsorsuutigineqanngilaq.

## **5. Inuussutissarsiortunut il. il. aningaasaqarnikkut aamma allaffissornikkut kinguneri**

Inatsisissatut siunnersuut inuussutissarsiortunut il. il. aningaasaqarnikkut aamma allaffissornikkut kinguneqassanngilaq.

## **6. Innuttaasunut allaffissornikkut kiinguneri**

Inatsisissatut siunnersuut innuttaasunut allaffissornikkut kinguneqassanngilaq.

## **7. Silap pissusianut aamma avatangiisinut kinguneri**

Inatsisissatut siunnersuut silap pissusianut aamma avatangiisinut kinguneqassanngilaq.

## **8. EU-mi inatsisinut pissutsit**

Inatsisissatut siunnersuut EU-mi inatsisinut pissutsinut imaqanngilaq

## **9. Oqartussat aamma suleqatigiiffiit il. il. tusarniaaffigineqartut**

Inatsisissatut missingiut piffissami 14. januar 2021-miit 11. februar 2021-mut oqartussanut, suleqatigiiffinnut il. il. tulliuttunut tusarniaassutigalugu nassiunneqarpoq:

Advokatrådet, Avannaata Kommunia, Amnesty International, Børnerådet, Børns Vilkår, Meeqqat Pisinnaatitaaffiinut Sullissivik – MIO, Børnesagens Fællesråd, Danske Advokater, Kalaallit Illuutaat, Det Kriminalpræventive Råd, Den Danske Dommerforening, Politiit pillugit Naammagittaalliuteqartarfik Arlaannaannulluunniit Attuumassuteqanngitsoq, Dommerfuldmægtigforeningen, Domstolsstyrelsen, Faggruppen af Socialrådgivere i Kriminalforsorgen, Foreningen af institutionschefer og områdechefer, Peqatigiiffik Kalaallit Meerartaat, Foreningen af Offentlige Anklagere, Kalaallit Nunaanni Illersuisut Peqatigiiffiat, Fængselsforbundet, Nunatta Eqqartuussisuuneqarfia, Kalaallit Nunaanni Politiit Peqatigiiffiat, Kalaallit Nunaanni Eqqartuussisuserisut, Kalaallit Nunaanni Inuit

Pisinnaatitaaffiit Siunnersuisoqatigiit, Eqqartuussiviit Qullersaat, Institut for Menneskerettigheder, Justitia, Kommune Qeqertalik, Kommuneqarfik Sermersooq, Kommune Kujalleq, Kredsdommerit Peqatigiiffiat, Kriminalforsorgsforeningen, Landsorganisationen mod seksuelle overgreb, Landsforeningen af nuværende og tidligere psykiatridrugere, Landsforeningen af Forsvarsadvokater, Landsforeningen KRIM, Landsforeningen SIND, Kalaallit Nunaanni Eqqartuussisuserisoq, Naalakkersuisut, Politiforbundet i Danmark, Kalaallit Nunaanni Politii pillugit naammagittaalliuuteqartarfik, Kalaallit Nunaanni Politimesteri, Kalaallit Nunaanni Eqqartuussivik, Retspolitisk Forening, Rigsadvokati, Rigspolitiet, Vestre Landsret, Østre Landsret aamma Qeqqata Kommunua.

Tamatuma saniatigut inatsisissatut missingiut Kalaallit Nunaanni Namminersorlutik Oqartussanut oqaaseqaateqarfigisassanngorlugu nassiunneqarnikuvoq.

## 10. Immersugaq eqikkaaffiusoq

	Kinguneri pitsaasut/ aningaasartuutikin -nerulernerit (aappimik akiguit, annertussusaat taajuk/ naaggamik akiguit, allaguk, »Soqanngilaq«)	Kinguneri pitsaanngitsut/ aningaartuuteqarnerulernit (aappimik akiguit, annertussusaat taajuk/ naaggamik akiguit, allaguk, »Soqanngilaq«)
Naalagaafimmut, kommuninut aamma nunap immikkoortuinut aningaasaqarnikkut kinguneri	Soqanngilaq	Pinerluttunik isumaginnittunut tamakkiisumik eqqussinermut atatillugu ataavartumik ukiumut aningaasartuutissatut naatsorsuutigineqarput 5,0 mio. kr.-nit.  Allat suliniutaasut eqqarsaatigalugit annikinnerusumik inatsisissatut siunnersuut aningaasartuuteqarnermik

		kinguneqarsinnaavoq.
Naalagaaffimmut, kommuninut aamma nunap immikkoortuinut atuutsitsilernerup kinguneri	Soqanngilaq	Soqanngilaq
Aningaasaqarnikkut inuussutissarsiortunut kinguneri	Soqanngilaq	Soqanngilaq
Allaffissornikkut inuussutissarsiortunut kinguneri	Soqanngilaq	Soqanngilaq
Innuttaasunut allaffissornikkut kinguneri	Soqanngilaq	Soqanngilaq
Silap pissusianut aamma avatangiisinut kinguneri	Soqanngilaq	Soqanngilaq
EU-mi inatsisinut pissutsit	Inatsisissatut siunnersuut EU-mi inatsisinut pissutsinut attuumassuteqanngilaq	
Inuussutissarsiutinu t sammititamik EU- mi maleruagassanik atuutsitsilerner mut tunngavinnut tallimaasunut akerliuvoq / EU-mi maleruagassianut minnerpaaffittut piumasaqaatinut qaangiisumik ingerlaqqippoq	Aap	Naamik  X

*Inatsisissatut siunneruummi aalajangersakkanut*

*ataasiakkaanut oqaaseqaatit*

*§ 1-imut*

*Nr. 1-imut*

Pinerluttulerinermik inatsimmi § 20, imm. 2 malillugu ataqinassutsimik  
ajuallatsitsinerit pillugit pinerluttulerinermik inatsimmi § 99-imik

unioqqutitsinerit namminerisamik unnerluussutigineqassapput.

§ 20, *imm.* 2-mi ilassutaasutigut siunnersuutigineqarpoq, pinerlineqartup noqqaaneratigut suliani sakkortuumik pasilliineq eqqunngitsuutillugu, suliani pasilliineq tusagassiiuutit amerlasuunit malinnaavigineqartut saqqummiunneqartuni imaluunniit siaruaanneqartuni, suliani pasilliineq pinerlineqartup annertuumik ajoquserneqarneranik kinguneqarsinnaasuni, suliani pisortani atorfirmik sulihamilluunniit annaasaqarnermik kinguneqarsinnaasuni, kiisalu suliani sakkortuumik pasilliineq atermik taasinani siaruarterneqarsimasuni pisortat utaqqisitaasumik unnerluussuteqarsinnaassasut siunnersuutigineqarpoq.

Siunnersuutip malitsigivaa, ataqqinassutsimik ajuallatsitsinerit pillugit suliani piумаqataasumik pisortat unnerluussisinnaanerannik eqqussisoqassasoq. Piумасаqataasumik pisortat unnerluussinerattut paasineqassaaq, pisortat unnerluussisinnaanerannik, imatut paasillugu unnerluussisussaataasut sulihamik pillaatissartalimmik aallartitsissasut, suliani taakkunani pisortat utaqqisitaasumik unnerluussissapput, pinerlineqartoq tamatuminnga noqqaassuteqarpat, assersuutigalugu nalunaarutiginninnermik tunniussinermigut.

Piумаqataasumik pisortat unnerluussisinnaanerannik periarfissami taamaallaat pineqarpoq § 99-ip ilaa, pasilliinikkut ataqqinassutsimik ajuallatsitsinermut tunngasoq. Nikanarsaalluni oqaaseqaateqarluni imaluunniit iliuuseqarluni ataqqinassutsimik ajuallatsitsinerit pisortat unnerluussisinnaanerannik periarfissami pineqanngillat. Pasilliinerit peqqarniilluinnartut, piумасаqataasumik pisortat unnerluussisinnaanerannik periarfissami taamaallaat pineqarput.

»Pasilliineq« Inuit Pisinnaatitaaffiinut Eqqartuussiviup suleriaasia malillugu pivisut uppersarneqarsinnaasut aamma naqqinneqarsinnaasut pillugit oqaaseqaataassaaq (statement of facts). Tamatumunnga tunngatillugu oqaaseqaatigineqarpoq, pinerluttulerinermi inatsimmi § 99-imi taaguut »pasilliineq« pillaasarneq pillugu inatsimmi ataqqinassutsimik ajuallatsitsinernut tunngatillugu »pisuutitsneq«-mut assingusuusoq.

Oqaaseqaatip saqqummiunnerani ataqatigiiffia oqaaseqaatip inuk alla akerleralugu pasilliinertut isigineqassaneranut pingaaruteqartussaavoq. Taamaasilluni politikerep nunamut killuussisuuneranik pasilliut, pineqartup iliuuseqarsimasinnaasup isumaa malillugu pinerluttulerinermik inatsimmi § 23-p iliuutsimut imarisaa piviusunngortissimagaa, pissutsit aallaavigalugit tamanna sakkortuumik pasilliutaassaaq aalajangersakkamut ilaasoq,

oqaaserli nunamut killuussisoq sakkortuumik pasilliutaassanngilaq politikermik, iliuuseqartup isumaa malillugu naalagaaffimmut ajoqutaasumik politikeqartumik (akuersaarnartumik) naliliineranut atatillugu atornerpat.

Oqaraanni inuk alla inuartuusoq imaluunniit kinguaassiuutitigut pingitsaaliilluni pinerluttuusoq, imatut paasillugu pineqartoq pinerluttulerinermi inatsimmi toqutsineq imaluunniit pinngitsaaliineq pillugit aalajangersakkanik unioqutitsisimasoq, tamanna pasilliinertut isigineqassaaq, taaguutilli kinaassusersiornermut tunnganerusut atoraanni, soorlu pineqartoq ileqqorluttuunerarlugu imaluunniit ammit qalipaataannik assigiinngisisuunerarlugu, tamanna aalajangersagassatut siunnersuutip isumaanut pasilliinertut isigineqassanngilaq.

§ 20, imm. 2, nr. 1-imi siunnersuutigineqarpoq suliani sakkortuumik pasilliineq eqqunngitsuutillugu pisortat utaqqisitaasumik unnerluussuteqarsinnaanissaat eqqunneqassasoq. Tamatuma siullertut kingunerissavaa taamaallaat pasilliinerit atorlugit ataqqinassutsimik ajualsitsinerit (nikanarsaalluni oqaaseqaatit pinnagit) siunnersuummut ilaasut, tak, qulinnguaniittoq, allaqqasoq, nikarnarsaalluni oqaaseqaatit siunnersuummut ilaatinneqanngitsut.

Aappaattut taamaallaat »sakkortuumik« pasilliinerit aalajangersagassatut siunnersuummut ilaassapput. Sakkortuumik pasilliinerit siullertut tassaassapput pissutsit pillaatisissutaasinaasut sakkortuut pillugit pasilliinerit, aamma oqaaseqaatip sumut atatillugu saqqummiunneqarsimanera pineqartup sakkortuutut immikkoortinneqarnissaanut pingaaruteqassaaq.

Aalajangersagassatut siunnersuummi taamaallaat pingajuattut pasilliinerit »eqqunngitsut« ilaassapput. »Eqqunngitsut« atorlugu oqaasertaliinermi piaarluneerneq pillugu pinerluttulerinermik inatsimmi § 11-mut attuumassuteqarneranik kinguneqarpoq, tassalu iliuuseqartup pasilliinerup eqqunngitsuunissaa piaarluneerutigisimassagaa.

§ 20, imm. 2, nr. 2-mi siunnersuutigineqarpoq ataqqinassutsimik ajualsitsinerit pillugit suliani, pasilliineq tusagassiuutit amerlasuunit malinnaavigineqartut atorlugit saqqummiunneqarsimappat imaluunniit siaruaanneqarsimappat, pisortat utaqqisitaasumik unnerluussuteqarsinnaassasut, pasilliinerlu pinerlineqartup annertuumik ajoquserneqarneranik kinguneqarsinnaassalluni.

Aalajangersagaq taamaallaat pasilliinernut atuuppoq nikanarsaalluni oqaaseqaatinuunngitsoq, tamanna pillugu tak. qulaaniittoq. Pasilliinerit tamarnik tunngaviatigut aalajangersagassatut siunnersuummut ilaassapput, pinerlineqartumilli annertuumik ajoqusiisinaanannerannik piunasaqaateqarnikkut, suleriaatsikkut tamatuma kingunerissavaa, taamaallaat pasilliinerit aalajangersimasumik peqqarniissusillit aalajangersakkamut ilaasussaanut. Pasilliinerup pinerlineqartumut ajoqusiisinaanera pillugu kinaassusersiunngitsumik naliliisoqassaaq. »Malunnaatilimmik ajoqusiineq«-tut isumaqartinneqarpoq, ajoqusiineq isigineqarnikkut, inummik eqquisuusinnaasoq, assingusumik pisuutinneqartoq. Assersuutigalugu pineqarsinnaavoq, pinerlineqartoq immikkuullarissumik atorfittaartoq, immikkuullarissumik atorfeqartoq imaluunniit immikkuullarissumik inissisimasoq, pasillerneqarnikkut ulorianartorsiortinneqarsinnaasumik. Aalajangersagaq malillugu piunasaqaataanngilaq, pisuutinneqarneq ajoquserneqarnermik kinguneqarsimanissaa.

Assersuutigalugu pineqarsinnaavoq, inuk amigartumik tunngaveqarluni pisumut pisuutinneqartoq, minnerusumik peqqarniissuseqarnermut pineqaatissiisummik kinguneqarsinnaasumik, tassunga ilagitillugu assersuutigalugu, inatsimmik allamik unioqquitsinerit ilaat, peqqarniissusaat sakkortunerulersinnaasut, pasilliinerup nuna tamakkerlugu tusagassiutitigut siaruarternegarneratigut, aammalu pinerlineqartup pasilliineq pissutigalugu ajoquserneqarsinnaanera qaninnerulerluni.

Aappaattut pasilliineq tusagassiutit amerlasuunit malinneqartut imarisaasigut siaruaanneqarsimassaaq. »Tusagassiutit amerlasuunit malinnaavigineqartut« tusagassiutit akisussaassuseqarnissaat pillugu Inatsisartut inatsisaat nr. 17, 19. november 2007-imeersumi § 1, nr. 1-3 malillugit paasineqassaaq. Tusagassiutit amerlasuunit malinnaavigineqartut Inatsisartut inatsisaanni nr. 1 malillugu tassaapput allaganngortitat, ilanngullugit assit saqqummiussallu assigisaat, naqiterneqartartut allatigulluunniit amerlasuunngortinneqarlutik, Inatsisartut inatsisaanni nr. 2 malillugu tassaapput nipi assilluunniit atorlugit aallakaatitat Kalaallit Nunaata Radioa (KNR) aamma suliffiit radiokkut TV-kkullu aallakaatitsinerit pillugit Inatsisartut peqqussutaat malillugu radiokkut TV-kkullu aallakaatitsisinnaasut aqqutigalugit siaruaassorneqartartut, kiisalu Inatsisartut inatsisaanni nr. 3 malillugu oqaasertaliussat assillu kiisalu nipi atorlugu aallakaatitat, piffissaliussani aalajangersimasuni tamanut saqqummiunneqartartut, nutaarsiassaqaatitsinerup Inatsisartut peqqussutaanni nr. 1-imi aamma 2-mi taaneqartup assigisaatut nutaarsiassalerinertut taaneqarsinnaagunik,



taamaattoq tak. tusagassiuutit allat pillugit Inatsisartut inatsisaanni § 8, imm. 1.

Suliani inuk iliuitsimik pisortani atorfimminik imaluunniit suliaqarnerminik annaasaqassutigisinnaasaanik pasilliierni, pisortat utaqqisitaasumik unnerluussuteqarsinnaassasut § 20, imm. 2, nr. 3-mi siunnersuutigineqarpoq.

Taamaallaat ataqqinassutsimik ajuallatsitsinerit pasilliiertut ilusiligaasut siunnersuummut ilaanerat siullertut kinguneqaataassaaq (nikanarsaalluni oqaaseqaatinut illuatungiusumik), tak. qulinnguaniittoq, allaqqasoq, nikarnarsaalluni oqaaseqaatit siunnersuummut ilaatinneqanngitsut.

Pasilliiernerit pisortani atorfimminik annaasaqarnermik kinguneqarsinnaanerit aappaattut piumasaqaataavoq.

Suliani sakkortuumik pasilliiineq atermik taasinani siaruaanneqarsimappat, pisortat utaqqisitaasumik unnerluussuteqarsinnaanissasa eqqunneqarnissaat § 20, imm. 2, nr. 4-mi siunnersuutigineqarpoq.

Siullertut siunnersuutip kingunerissavaa, taamaallaat pasilliiernerit ataqqinassutsimik ajuallatsitsinerusut (nikanarsaalluni oqaaseqaatinut illuatungiusumik) siunnersuummut ilaatinneqartut pineqarnerat, tak. qulinnguaniittoq, allaqqasoq, nikarnarsaalluni oqaaseqaatit siunnersuummut ilaatinneqanngitsut.

Aappaattut taamaallaat »sakkortuumik« pasilliiernerit aalajangersagassatut siunnersuummut ilaasinnaassapput. Sakkortuumik pasilliiernerit siullertut iliuitsinik pillaa-tisissutigineqarsinnaasunik pasilliiernerussapput, oqaaseqaatillu sumut atatillugu saqqummiunneqarsimanera sakkortuutut nalilerneqarnissaanut pingaaruteqarsinnaassalluni.

Pasilliiernerit atermik taasinani siaruaanneqartut aalajangersagassatut siunnersuummut pingajuattut ilaapput. Tamatumunnga ilaapput pisut innarlīgaasup iliuseqartoq imaaliallaannaq kinaassusersisinnaanngippagu, ilanngullugu pisut pasilliiineq atermik eqqunngitsumik atuilluni saqqummiunneqarsimappat. Aalajangiisoq tassaassaaq erseqqinnerusumik paasiniaasoqarnissaa pisariaqartinneqassammat, iliuseqartup kinaassusaata paasisaqarnissaa siunertaralugu.

Pasilliiineq aalajangersagaq malillugu kinaassutsimik taasinani

siaruaanneqarsimasutut isigineqassanngilaq, siaruaassineq tusagassiuutit tusagassiuutit akisussaassuseqarnerat pillugu Inatsisartut inatsisaannut ilaasut atorlugit siaruaanneqarsimappat. Tamatumani aalajangersarneqarpoq tusagassiuutikkut siaruaanneqarneranut kina pinerluttulerinermi inatsisinut atatillugu akisussaasuunersoq, taamaattumik iliuuseqartup kinaassusaata paasineqarnissaa siunertaralugu erseqqinnerusumik paasiniaanissaq pisariaqartinneqassanani.

Pasilliinerit oqaatsit atorlugit siaruaanneqartut aalajangersakkamut ilaassapput, tassalu assersuutigalugu video, Facebookikkut siaruaanneqartoq, tassani inuk kiinnaminik assiisimasoq arlaannut sakkortuumik pasilliinerminik saqqummiussisimassaaq, soorlu aamma pasilliinerit allaganngorlugit siaruaanneqartut aalajangersakkamut ilaassasut.

Tamatuma saniatigut inatsisissatut siunnersuummut oqaaseqaatini nalinginnaasuni imm. 2.1 innersuussutigineqarpoq.

#### *Nr. 2-mut*

Pinerluttulerinermi inatsimmi § 22, imm. 1 malillugu, namminerisamik unnerluutiginnissinnanermut periarfissaq atorunnaassaaq, tamatumunnga pisinnaatitaasoq suliassanngortitsisimangippat, pineqartup suliassanngortitsinissamut tunngavissaqarluni pisinnaatitaalerneraniit kingusinnerpaamik qaammatit 6-it qaangiunneranni.

Siunnersuutigineqarpoq, § 22, imm. 1-imik allannguinnissaaq, isumannaarniarlugu namminerisamik unnerluutiginnissinnanermut pisinnaatitaaneq atorunnaassasoq, tamatumunnga pisinnaatitaasoq suliassanngortitsinissamut tunngavissaqarluni kingusinnerpaamik qaammatit 6-it qaangiunneranni unnerluussinissamut piunnaqarsimangippat.

Pinerluttulerinermi inatsimmi piunnaqaataasumik pisortat unnerluussinissaat pillugu malittarisassanik eqqussineq tunngavigalugu allannguinerup kingunerisaasup, malitsigissavaa imm. 1-imi unnerluussinissamut pisinnaatitaasup, pisortat unnerluussinissaannut piunnaqarnissaanut qaammatini 6-imi piffissalernerqarneranik aalajangersaaneq. Piffissarititaasoq naatsorsorneqassaaq pisinnaatitaasup »suliassanngortitsinissamut tunngavissaqalerneraniit«, taamaalilluni pineqartoq unnerluussisoqarnissaanut piunnaqarsinnaalerluni.

Siunnersuummi § 311 a innersuussutigineqarpoq (Inatsisissatut siunnersuummi § 2, nr. 2), inuit kikkut pisortat unnerluussinissaannut piunasaqarsinnaaneratt pillugu aaqqiineq.

Tamatuma saniatigut inatsisissatut siunnersuummut oqaaseqaatini nalinginnaasuni imm. 2.1 innersuussutigineqarpoq.

*Nr. 3-mut*

Pinerluttulerinermi inatsimmi § 22, imm. 2-mi allaqqavoq, unnerluussinissamut pisinnaatitaasut imaluunniit pisuusut arlaqarpata, taakkununga immikkut namminerisamik unnerluussisinnaanermut piffissarititaasoq naatsorsorneqassasoq.

§ 22, imm. 2-mi siunnersuutigineqarpoq, ilanngunneqassasoq, pisuusut arlaannut pisortat unnerluussinissaannut piunasaqarnissaannut piffissarititaasoq qaangerneqarsimappat, pisuusunulli sinnerinuunngitsoq, taava unnerluussisussaataasut aalajangissavaat, taakkununga unnerluussinissamut piunasaqarneq ingerlatiinnarneqassanersoq.

Pinerluttulerinermi inatsimmi piunasaqaataasumik pisortat unnerluussinissaat pillugu malittarisassanik eqqussinerup kingunerivaa siunnersuutigineqartoq.

Danskit pillaasarneq pillugu inatsisaanni § 96, imm. 2 aalajangersakkamut assinguvoq, tak. inatsimmut nalunaarut nr. 1650, 17. november 2020-meersoq.

Tamatuma saniatigut inatsisissatut siunnersuummut oqaaseqaatini nalinginnaasuni imm. 2.1 innersuussutigineqarpoq.

*Nr. 4-mut*

Pinerluttulerinermi inatsimmi § 22, imm. 3-mi allaqqavoq, namminersisamik unnerluussisinnaanermut periarfissaq atorunnaassasoq, pinerlineqartup toquneraniit qaammatit 6-it qaangiunneranni.

Siunnersuutigineqarpoq § 22, imm. 3 allanngortinneqassasoq, taamaalilluni pisortat unnerluussinissaannut piunasaqarnissamut periarfissaq atorunnaassasoq, pinerlineqartup toquneraniit qaammatit 6-it qaangiunneranni.

Siunnersuutip malitsigivaa, pisortat unnerluussinissaannik piunasaqartoqassasoq, pinerlineqartup toquneraniit qaammatit 6-it qaangiutinnginneranni. Aalajangersagaq imatut ataqatigiisitsisumik isineqassaaq, pisortat unnerluussinissaannik piunasaqarsinnaanermut periarfissaqarneq, pinerlineqartoq suli uumatillugu, pineqartup unnerluussisoqarnissaanut piunasaqarnissamut tunngavissaqalerneraniit qaammatit 6-it qaangiunneranni atorunnaassasoq.

Tamatuma saniatigut inatsisissatut siunnersuummut oqaaseqaatini nalinginnaasuni imm. 2.1 innersuussutigineqarpoq.

#### *Nr. 5-imut*

Pinerluttulerinermik inatsimmi § 77, imm. 1, nr. 1 aamma nr. 2 malillugit kinaluunniit nakuuserluni imaluunniit nakuusernissamik qunusaarilluni inummik pinngitsaaliilluni kinguaassiuutitigut atoqateqarpat imaluunniit kinguaassiuutitigut allatigut iliuuseqarpat, imaluunniit inummik qanoq issutsini imaluunniit atukkani pissutigalugit iliuutsimut akerliliisinnaangitsumik kinguaassiuutitigut atoqateqarpat imaluunniit kinguaassiuutitigut allatigut iliuuseqarpat, tamanna pinngitsaaliineruvoq. Assigisaanik inuk meeqqamik 12-it inorlugit ukiulimmik kinguaassiuutitigut atoqateqarpat imaluunniit kinguaassiuutitigut allatut iliuuseqarpat, tamanna aamma pingitsaaliineruvoq.

Pinerluttulerinermi inatsimmi § 121, imm. 1, nr. 1 aamma nr. 2 malillugit, pineqaatissiissummik toqqaanermi annertussusiliinermilu inatsisunik unioqqutitsinerup peqqarniissusia, ilanngullugu iliuutsit taamatut ittut pinaveersaartinnissaannut inuiaqatigiit soqutigisaat, ilanngullugu pineqartup inatsisunik unioqqutitseqqinnissaanut suut pisariaqartutut nalilerneqarnerat ilanngullugit mianerineqassapput.

Taamaasilluni pinerluttulerinermi inatsit aallaavittut iliuuseqartup tunngavigineqarnissaanik taaneqartumik tunngaveqarpoq, taamaasilluni eqqartuussiviup pineqaatissiissummik toqqaanermi iliuuseqartut ataasiakkaat inuttut inooqatigiinnermilu atugaat annertuumik mianerisussaavai, ilanngullugu pineqartup pinerluuteqaqqinninnissaanut suut iluaqutaasinnaasutut isumaqarfigineqartut ilanngullugit mianerissallugit. Iliuserisalli qanoq ittuunera pinerluutillu taamatut ittut akiornissaannut inuiaqatigiit soqutigisaat ilanngullugit mianerineqartussaapput (iliuserisamik tunngaveqarneq). Taamaattumik pinerluttulerinermi inatsimmi taaguut »pillaat« atorneqanngilaq, inatsillu pillaaqatut sinaakkusiussanik imaqarani.

§ 77, imm. 3-mi siunnersuutigineqarpoq, pinerluttulerinermi inatsimmi § 77-mik unioqqutitsinermi pineqaatissiissutip annertussusilerneqarnerani, inatsisunik unioqqutitsinermut atatillgu immikkut ittumik kanngunarsagaasimaneq pingaartinneqassasoq, inummut 18-it inorlugit ukiulimmut pinerluttuliortoqarsimappat.

Allannguutissatut siunnersuutigineqartukkut inummik 18-it inorlugit ukiulimmik kinguaassiuutitigut atoqateqarluni imaluunniit kinguaassiuutitigut allatut iliuseqarluni pinngitsaaliinernut pineqaatissiissutit annertussusaat nalinginnaasumik 50 procentinik qaffanneqassasoq piunasaqaataavoq, tak. pinerluttulerinermi inatsimmi § 77, imm. 1, nr. 1-3. Taamaasilluni § 77, imm. 1-imik unioqqutitsinerni inuit 18-inik ukiullit ukioqqortunerusulluunniit eqqorlugit pinerluutaasunut pineqaatissiissutit sakkortusineqarnissaat allannguutip siunertarinngilaa. Aammattaq pinerluttulerinermi inatsimmi § 77, imm. 2-mik unioqqutitsinerni pineqaatissiissutit qaffanneqarnissaat allannguutip siunertarinngilaa.

Suliani, iliuseqartoq nakuuserluni imaluunniit nakuusernissamik qunusaarilluni inummik 18-it inorlugit ukiulimmik kinguaassiuutitigut atoqateqarpat, imaluunniit kinguaassiuutitigut allatut iliuseqarpat, pineqaatissiissutit qaffanneqarnerat siunnersuutip kingunerissavaa, tak. pinerluttulerinermi inatsimmi § 77, imm. 1, nr. 1.

Aammattaq suliani iliuseqartoq inummik 18-it inorlugit ukiulimmik qanoq issutsini atukkaniluunniit pissutigalugit iliuitsimut akerliliisinnaangitsumik kinguaassiuutitigut atoqateqarpat imaluunniit kinguaassiuutitigut allatut iliuseqarpat, pineqaatissiissutit qaffanneqarnissaat siunnersuutip ilanngullugu kingunerissavaa, tak. pinerluttulerinermi inatsimmi § 77, imm. 1, nr. 2.

Suliani iliuseqartoq meeqqamik 12-it inorlugit ukiulimmik kinguaassiuutitigut atoqateqarpat imaluunniit kinguaassiuutitigut allatut iliuseqarpat, pineqaatissiissutit qaffanneqarneranik siunnersuutip naggataagut kingunerissavaa, tak. pinerluttulerinermi inatsimmi § 77, stk. 1, nr. 3.

Pineqaatissiissutit qaffasissusaasa 50 procentimik qaffanneqarnissaat allannguutikkut piunasaqaataavoq, taassuma kingunerissallugu suliaq inatsisit atuuttut malillugit ukiumik 1-imik inissiisarfimmuut inissinneqarnermik pineqaatissiissutigineqarsinnaasoq, maanna ukiumik 1-

imik qaammatinilu 6-inik inissinneqarnermik kinguneqartalissaaq. Suliaq inatsisit atuuttut malillugit ukiuni 2-ni inissiisarfirmmut inissinneqarnermik aalajangiivigineqartussaq, maanna ukiuni 3-ni inissiisarfirmmut inissiinermik aalajangerneqartalissaaq.

Pinerluttulerinermik inatsimmi § 77, imm. 1, nr. 1 malillugu ukiukinnerusunik kinguaassiuutitigut pinngitsaaliinernut imaluunniit kinguaassiuutitigut allatut iliuuseqarnernut maanna pineqaatissiissutit qaffasissutaannut, kiisalu 50 procentimik qaffaanerup sunniutaannut assersuutitut ataani pinngitsaaliinerit ataasiakkaat allaaserineqarput, taakkunani iliuuseqartoq siusinnerusukkut pineqaatissinneqarsimanani:

Assersuut 1: Suliami 17-inik ukiullip 16-inik ukiulik persuttarlugu imaluunniit persuttarniarlugu soorasaarlugu pinngitsaalisimappagu, maanna pineqaatissiissutit qaffasissusaat malillugu, aamma suliami pissutsit aalajangersimasut apeqqutaatillugit, ukiumik 1-imik qaammatinillu 3-nik aamma ukiunik 2-nik sivilisussuseqartup akornanni inissiisarfirmmut inissiinermik aalajangiisoqassaaq. Siunnersuutikkut suliaq assigisaa ukiut 2- aamma ukiut 3-t akornanni inissiisarfirmmut inissinneqarnermik aalajangiivigineqartarnissaa siunniussaavoq.

Assersuut 2: Suliami 35-nik ukiullip 10-nik ukiulik persuttarlugu imaluunniit persuttarniarlugu soorasaarlugu pinngitsaalippagu, maanna pineqaatissiissutit qaffasissusaat malillugit aamma suliami aalajangersimasumik pissutsit apeqqutaatillugit, ukiut 2-t qaammatillu 6-it aamma ukiut 3-t qaammatillu 6-it akornanni aalajangiisoqartussaassaaq. Suliami assigisaani ukiut 3-t qaammatillu 6-it aamma ukiut 5-it akornanni inissiisarfirmmut inissinneqarnermik aalajangiivigineqartarnissaat siunniussaavoq

Meeqqamik 12-it inorlugit ukiulimmik pinngitsaaliinermut imaluunniit kinguaassiuutitigut allatut iliuuseqarnermut, tak. pinerluttulerinermi inatsimmi § 77, imm. 1, nr. 3, maanna pineqaatissiissutit qaffasissusaannut kiisalu 50 procentimik qaffaanerup sunniutaannut assersuutitut ataasiakalaamik pinerluutip allaaserineqarnera ataani ilanngunneqarpoq, tamatumani iliuuseqartoq siunnersusukkut pineqaatissinneqarsimanani:

Assersuut 1: Suliami 10-nik ukiulik 35-nik ukiulimmit siniffimmi tutillutik sinittussaatiillutik attuualarneqarpat, (attuualarinninnerlu kinguaassiuutitigut allatut iliuuseqarnerut pissuseqarpat) maanna pineqaatissiissutit qaffasissusaat malillugit, aamma suliami aalajangersimasumik pissutsit apeqqutaatillugit, suliami qaammatit 4-t 6-

illu akornanni inissiisarfimmut inissinneqarnermik aalajangiisoqassaaq. Suliami assigisaani qaammatit 6-it aamma qaammatit 9-t akornanni inissiisarfimmut inissinneqarnermik aalajangiisoqartarnissaa siunniussaavoq.

Oqaaseqaatigineqarpoq, pisut suussusaannut assersuutit pineqartut, aammalu pisut assigiinngiiaartut malitsigisaannik, pinerluttulerinermi § 77, imm. 1, nr. 1-3-mi, aamma imm. 2-mi, ilaatinneqartut, aalajangersakkat malillugit pineqaatissiissutit sivilissusaanni annertuunik nikingasoqarnera, tassunga ilagitillugu aamma pisut naapertorlugit sakkukilliliinernik aamma sakkortuliniinernik, kiisalu pisut uteqqiasuusinnaaneri. Allanguinerup siunertaraa, pisuni tamani 50 pct.-imik qaffaasoqarnissaa, pineqaatissiissutit qaffasissusaat eqqarsaatigalugu, allanguineq sioqqullugu inissinneqartussat, aammalu pisut naapertorlugit tunngavissaqarsinnaavoq pineqaatissiissutit inissinneqarnissaannut, malunnaatilimmik qaffasinnerusussanik pisut suussusaat eqqarsaatigalugu, pisoq taaneqartoq tunngavigalugu pissutsit allaaneruneri pissutigalugu, soorlutaaq tunngavissaqarsinnaasoq appasinnerusunik pineqaatissiissutinut.

Soorlu assersuutigalugu, inatsisit atuuttut malillugit nalinginnaasumik tunngavissaqarsinnaavoq sakkortusisamik pineqaatissiissuteqarnissamut, pinngitsaaliisimanermut malunnaatilimmik persuttaasoqarsimappat, pinngitsaaliineq piffissami sivilissuuni ingerlanneqarsimappat, imaluunniit pinerluttunit arlariinnit ataatsikkut ingerlanneqarsimappat, imaluunniit pinerluttoq namminerisamik inigisamut isersimappat aammalu tassani pinngitsaaliisimappat. Assersuutigalugu, atoqatigiinnerunngitsoq kinguaassiuutitigulli iliuuseqarsimaneq imaluunniit misiliisimaneq pineqarpata, taava taaneqartut akerlianik sivilinnerusumik pineqaatissiissuteqartoqarnissaa tunngavissaqarsinnaavoq.

Eqqartuussiviit pisuni ataasiakkaani suliami pissutsinik tamanik naliliinerat pineqaatissiissutit annertussusilerannut suli tunngavigineqartuassaaq, ilanngullugit inatsisinik unioqqutitsinerup peqqarniissusaa aamma iliuuseqartup inuttut atugai tunngavigineqassallutik, tak. pinerluttulerinermi inatsimmi § 121, aammalu pineqaatissiissutip qaffasissusaa ammut imaluunniit qummut nikisinneqarsinnaavoq, suliami pineqartumi pisoqarsimappat sakkortunerulersitsinissamut imaluunniit sakkukinnerulersitsinissamut tunngavissiisunik.

Siunnersuutitigut siunertaanngilaq aalajangersakkap atorneqarnissaata allanngortinneqarnissaa. Taamatuttaaq sakkortunerulersitsinissamut imaluunniit sakkukinnerulersitsinissamut pisut tunngavissiisarnerat

eqqarsaatigalugit allannguisoqarnissaa siunertaanngilaq.

Tamatuma saniatigut inatsisissatut siunnersuummut oqaaseqaatini nalinginnaasuni imm. 2.2 innersuussutigineqarpoq.

*Nr. 6-imut*

Pinerluttulerinermi inatsimmi § 111, imm. 1 naapertorlugu, tillitanik atuinermut eqqartuunneqassaaq taanna, pisussaaffiginagu pissarsianik tiguisoq imaluunniit pissarsisoq imaluunniit pissarseqataasoq, inatsisinik unioqutitsinikkut pissarsiarineqarsimasunik, pinerluttulerinermi inatsisitigut akisussaatinneqarnermik kinguneqarsinnaasumik, aamma taanna, pisinnaatitaanani toqqorsinikkut, toqqortaqaarnikkut, assartuussinikkut, tunisinermit ikiuunnikkut imaluunniit assigisaatigut unioqutitsinikkut pissarsiamik qulakkeerinneqataasoq, pinerluttulerinermi inatsisitigut akisussaatinneqarnermik kinguneqarsinnaasumik.

Aalajangersakkatigut siunnersuutigineqartukkat § 111, *imm. 1* allanngortinneqassaaq, taamaalilluni ilanngunneqassalluni, aalajangersagaq atuutissasoq, pisoq § 111 a-mi ilaatinneqarpat.

Tamatuma kingunerivaa, tillitanik atuinermik suliat pinerluttulerinermi inatsimmi § 111-mi ilaatinneqassasut taassuma kingorna, siunnersuutigineqartumi § 111 a-mi ilaatinneqanngitsut.

Pinerluttulerinermik inatsimmi § 111 a-mi aningaasarsianik malunnarunnaarsitsiniaaneq pillugu namminerisamik aalajangersakkamik nutaamik ilanngussisoqarnissaa taamaalilluni siunnersuutigineqarpoq (tak. inatsisissatut siunnersuummi § 1, nr. 7), tassunga ilaallutik iliuitsit ilaat ullumikkut § 111-mi tillitanik pisinermit ilaatinneqartut.

Siunnersuummi § 111 a-p aalajangersassavaa, aningaasarsianik malunnarunnaarsitsisoq taanna eqqartuunneqassasoq, aningaasanik allannguisoq imaluunniit nuussisoq, toqqaannartumik imaluunniit toqqaannanngitsumik pinerlunnermit pissarsiarineqarsimasunik, toqqorterniarlugu imaluunniit malunnarunnaarsarniarlugu pinngorfik inatsisinik unioqutitsinerusoq.

Tamatuma kinguneranik siunnersuutigineqarpoq § 111 tillitanik pisinermit tunngasoq siunissami iliuitsinut § 111 a-mi aningaasarsianik malunnarunnaarsitsiniaanermit namminerisamik aalajangersagassamut ilaasut ilaajunnaassasut.



Siunnersuutip kingunerissavaa iliuitsit § 111 a-tut siunnersuutigineqartumut ilaasut, siunissamit aalajangersagaq taanna malillugu suliarineqartassasut, § 111 pinnagu.

Tamatuma saniatigut inatsisissatut siunnersuummut oqaaseqaatini nalinginnaasuni imm. 2.3 kiisalu ataani nr. 7-mut oqaaseqaatit innersuussutigineqarput.

*Nr. 7-mut*

Pinerluttulerinermi inatsimmi § 111 malillugu kinaluunniit pisussaaffiginagu pissarsianik inatsisinik unioqquitsinikkut pinerluttulerinermik inatsisini akisussaataaffiusinnaasumik pissarsisoq imaluunniit imminut allanilluunniit pissarsitittoq, aamma kinaluunniit pisussaaffiginagu toqqorsisoq, uninngatitsisoq, assartuisoq, tuniniaanermut ikiuuttoq imaluunniit assigisaanik periusoqarluni kingorna unioqquitsinikkut pissarsianik pinerluttulerinermik inatsitigut akisussaataasinnaasaminik qulakkeetrinnittoq tillitanik atuineq pillugu eqqartuunneqassaaq.

Aningaasanik allannguisoq imaluunniit nuussisoq, toqqaannartumik imaluunniit toqqaannangitsumik pinerlunnermit pissarsiarineqarsimasunik, inatsisinik unioqquitsinerusoq pinngorfik toqqorterniarlugu imaluunniit malunnarunnaarsarniarlugu, aningaasarsianik malunnarunnaarsitsisutut eqqartuunneqassasoq, aalajangersakkamik ikkussisoqassasoq siunnersuutigineqarpoq.

§ 111 a-mik siunnersuutitigut, siunnersuutigineqarpoq, tillitanik pisinermut aalajangersakkap ilaa aningaasarsianik malunnarunnaarsitsiniaaneq pillugu namminerisamik aalajangersakkamut immikkoortinneqassasoq, taamaasilluni pinerluttulerinermik inatsit siunissami aningaasarsianik malunnarunnaarsitsiniaaneq pillugu aalajangersagartaqalissalluni.

Aalajangersagassatut siunnersuutip pingaartumik iliuitsit, ullumikkut tillitanik pisineq pillugu pinerluttulerinermik inatsimmi § 111.mi ilaasut pinerluutinngortippai. Aammattaaq pinerluutinngortitsineq annertusineqarpoq nammineq iliuitsinit pissarsianit aningaasarsianik malunnarunnaarsitsiniaaneq, tamanna pinerluttulerinermi inatsitigut akisussaataaannermik kinguneqarsinnaappat (nammineerluni aningaasarsianik malunnarunnaarsitsiniaanermik taaneqartartoq), erseqqinnerusoq pillugu tak. ataaniittoq.

Taamaasilluni inatsisinik unioqutitsinermit pinerluutaasumit pissarsiat eqqarsaatigalugit iliuutsit aalajangersimasut aalajangersakkakkut pinerluutingortinneqarput (pinerluummit sioqqutsisut) taamaallaat iliuutsit pinerluuteqartinnani iliuuserineqarsimasut aalajangersakkamut ilaapput. Iliuutsit piffissaq tamanna sioqqullugu iliuuserineqartut taarsiullugu pineqaatissiissutigineqarsinnaapput pinerluut sioqqullugu peqataanertut, pinerluut sioqqullugu piviusunngortitsinermit isumaqatigiissutigineqarsimappat, pineqartoq kingorna aningaasarsianik malunnarunnaarsitsiniaassasoq. Tamatumunnga atatillugu pinerluut sioqqullugu pinerluttulerinermit inatsisitigut akisussaataanerup aamma aningaasarsianik malunnarunnaarsitsiniaaneq pillugu aalajangersagassatut siunnersuutip akornanni pissutsit pillugit oqaaseqaatit innersuussutigineqarput.

Aalajangersakkamut ilaapput aningaasani inatsisinik unioqutitsinikkut pinerluutinngortitaasunik toqqaannartumik aamma toqqaannangitsumik pissarsiarineqartut tamarmik.

Pinerluut sioqqullugu pissutsinut artaata eqqartuussaasimanissaa imaluunniit eqqartuunneqarsinnaanera piumasaqaataanngilaq. Aamma pissarsiat pinerluut sioqqullugu pisumit sorlermi pissarsianeqarsimanerisa uppersarneqarnissaat piumasaqaataanngilaq. Aningaasarsianik malunnarunnaarsitsiniaanermut eqqartuunneqarnissamut pissarsiat inatsisinik unioqutitsinermit ataatsimit arlalinnilluunniit pinerluutaasunit erseqqinnerusumik nassuiarneqarsimanngitsunit pissarsianeqarsimanerat uppersarsassallugu naammappoq. Pissarsiat inatsisinik unioqutitsinermit ataatsimit arlalinnilluunniit pinerluutaasunit pissarsianeqarsimanerat uppersarneqarsimasutut isigineqarsinnaanngippat, aningaasarsianik malunnarunnaarsitsiniaanermik misiliigaluarsimasutut eqqartuussisoqarsinnaavoq, unnerluutigineqartup piaaraluneerluni pissarsiat inatsisinik unioqutitsinermit pinerluutaasunit ataatsimit arlalinnilluunniit pissarsiarisimappagit.

Aamma nunani allani inatsisinik unioqutitsinermit pinerluutaasunit pissarsiarisanik aningaasarsianik malunnarunnaarsitsiniaaneq aalajangersakkamut ilaavoq, tamatumani pinerluut sioqqullugu pisut kalaallit oqartussaasuunit oqartussaaffigineqanngippat. Pisuni taamatut ittuni pinerluut sioqqullugu pisut Kalaallit Nunaanni inatsisit malillugit pinerluutaappat, assigisaanillu Kalaallit Nunaanni iliuuseqartoqarsimagaluarpat. Tamanna assersuutigalugu attuumassuteqarsinnaavoq pinerluttulerinermit inatsisini

aalajangersakkatigut akisussaatisoqarsinnaappat, taakkualu Kalaallit Nunaanni inatsisit malillugit nunap immikkoortuinut killiligaappata.

Inatsisinik unioqqutitsinernit pinerluutaasunit pissarsiat tamarmik aalajangersakkamut ilaapput, ilanngullugit taarsiullugu pissarsiat aamma qaavatigut pissarsiat, assersuutigalugu erniat.

Taamaattoq aalajangersakkami aningaasat aningaasarsianik malunnarunnaarsitsiniaanermut ilaasut siunniussaangillat. Tamanna atuuppoq pinerluut sioqqullugu pissarsiat aningaasaappata, aamma pissarsiat aningaasaanngitsut aningaasanngortinneqarsimappata, kingornalu aningaasarsianik malunnarunnaarsitsiniaanermut atorneqarlutik. Aningaasanut ilaapput nalinginnaasumik nunami ataatsimi arlalinniluunniit akiliutitut akuerisaasut. Aningaasanut ilaapput aningaasat tigorianaat aamma kontomi uninngasuutigineqartut. Aningaasat ullumikkut ilisimaneqartutut qarasaasiakkut pigineqartut, (assersuutigalugu bitcoin) imatut nalinginnaasumik akiliutitut atugaanngillat, aalajangersakkap paasineqarnissaa malillugu aningaasatut isigineqarnatik. Erseqqinnerusumik bitcoins pillugit ataanut innersuussisoqarpoq.

Taamaasilluni aalajangersakkami aningaasanik siullermik aningaasanngortitsilluni kaaviiartitsineq imaluunniit pissarsianik aningaasaanngitsunik passussineq siunniussaangillat. Tamanna assersuutigalugu pigisanik tillitaasunik imaluunniit inatsisinik unioqqutitsinernit pinerluutaasunit allanit arsaarinnissutaasunik pisineq tunisinerlu imaluunniit attartortitsineq, soorlu aamma pigisanik taamatut ittunik assartuineq imaluunniit uninngatitsineq taamatut isigineqartut. Taamaasilluni iliuitsit tamatut ittut allanngorani pinerluttulerinermik inatsimmi § 111 malillugu tillitanik pisinertut pineqaatissiissutigineqarsinnaassapput, iliuitsit pinerluut sioqqullugu inunnit peqataasimanngitsunit iliuserineqarsimappata. Iliuseqartup pissarsianik aningaasaanngitsunik nammeneq atorluaanera, assersuutigalugu atuinermigut, tunisinermigut imaluunniit attartortitsinermigut, assigisaanik allanngorani atuuppoq, tamanna immikkut pinerluutinngortitaanngimmat, pinerluut sioqqullugu pineqaatissiissut aalajangersarneqartarmat ilaatigut iliuseqartup taamatut iliorluni pissarsianik iluaqutissarsisinaanera mianeralugu. Taaneqartoq aamma atuuppoq pigisat allanngortinneqarpata, pinerlunniarnermit pissarsianeqarsimanerat toqqortorniarlugu. Assersuutitut taaneqarsinnaavoq motorcykeli tillinneqartoq isaterneqarsinnaavoq kingornalu immikkoortui taartissamaatitut tuniniarneqarlutik, imaluunniit biili tillitaq nutaamik qalipanneqarsinnaavoq imaluunniit nutaanik

nummerpladelerneqarluni.

Taamaasilluni tamatumunnga ikiuunneq allannguuteqanngitsumik pinerluttulerinermi inatsimmi § 111 malillugu tillitanik pisinertut pineqaatissiissutigineqarsinnaavoq, iliuuseqartup pinerluut sioqqullugu nammineq iliuusai tamatut ittut inatsisit allat malillugit eqqartuuussutigineqarsinnaasut. Assersuutigalugu biili nalunaarsugaanngitsoq imaluunniit nalunaarsuinermit peerneqarsimasoq atorlugu biilerneq namminerisamik pinerluutinngortitaapput. Tamatuma saniatigut iliuuseqartup pigisat tillitat pisisumut sianigisaqanngitsumut tunippagit, tamanna pinerluttulerinermik inatsimmi § 104 malillugu amerlanertigut peqquuserlunnertut isigineqassaaq.

Aningaasat assersuutigalugu pigisanik tillitanik tunisinikkut imaluunniit attartortitsinikkut pissarsianeqartut eqqarsaatigalugit aningaasarsianik malunnarunnaarsitsiniaanermut atorneqassagaluarpata, aalajangersagaq taakkununnga aamma atuutissaaq.

Aalajangersakkap inummut aningaasanik toqqaannartumik imaluunniit toqqaannanngitsumik inatsisinik unioqqutitsinermi pinerluutaasumit pissarsiarisimasaminik allanngortitsisumut nuussisumulluunniit atorneqarsinnaanissaa siunnersuutigineqarpoq, taamaasiornermigut aningaasat unioqqutitsinikkut pissarsiarisimallugit toqqortorniarpagu imaluunniit malunnarunnaarsinniarpagu. Oqaatigineqartut tamanna isumaqarpoq pissarsianik aningaasannortitsilluni allanngortitsineq siulleq aalajangersakkap avataaniippoq.

Assersuutigalugu pissarsiat nunat allat aningaasaataannut allanngortinneqarsinnaapput aamma pissarsiat inummut allamut nuunneqarsinnaallutik, tamanna pissarsiat inatsisinik unioqqutitsisumik pinngorfeqarnerat toqqortorniarnernannik imaluunniit malunnarunnaarsinniarnerannik siunertaqarpat.

Pissarnianik aningaaserivimmi kontomut ikisineq imaluunniit kontot nalinginnaat akornanni nuussineq, assersuutigalugu aningaasarsianik kontop, akiligassanut kontomut imaluunniit sipaakkanut kontomut inummit allamit pigineqartumut nuussineq aalajangersakkamut ilaanngillat. Kontomulli inummit allamit pigineqartumut imaluunniit kontomut nunani allamiittumut nuussineq ilaasussaassapput, aningaasat pissarsiarineqartut inatsisinik unioqqutitsisumik pissarsiarineqarsimanagerat toqqortorniarlugu imaluunniit malunnarunnaarsinniarlugu nuunneqarpata. Aningaasanik aningaasaliissuteqarneq, pappialat nalillit, pigisat aalaakkaasut allalluunniit

pineqaraluarpata, aamma allanngortitsinerussaaq aalajangersakkamut ilaasoq, pissarsiat inatsisunik unioqqutitsisumik pissarsiarineqarsimanerat toqqortorniarlugu imaluunniit malunnarunnaarsinniarlugu tamanna pippat. Tamanna aamma atuuppoq aningaasanut qarasaasiakkoortunut aningaasaliissuteqarnermi, (assersuutigalugu bitcoin).

Aalajangersagaq pinerluttulerinermik inatsimmi § 13-imi peqataanermut maleruagassaaq nalinginnaasoq pissutigalugu aamma inummut aningaasanik allanngortitsinissaaq nuussinissarlunniit siunertarlugu aningaasanik toqqorsisumut imaluunniit pissarsiat qanoq ittuunerannik, sumit pinngorfeqarnerannik, sumut inissineqarsimanerannik imaluunniit suminngaanniit sumut nikisinneqartarsimanerannik, taakkununga pisinnaatitaaffeqarnermik imaluunniit piginnittussaassutsimik malunnarunnaarsitsiniartumut atuutissaaq. Assersuutitut taaneqarsinnaapput allakkianik pissarsiat eqqunngitsumik inatsisit malillugit pissarsiarineqarsimanerannik taasisunik suliaqarneq, assersuutigalugu attartugaanerarlugit, attartukkanik utertitsissutaanerarlugit, inuussutissarsiutitut suliffeqarfimmik tunisinermi pinngorfeqarnerarlugit imaluunniit taassumanga sinneqartoorutaanerarlugit.

Pissarsianik tigusinerinnaq uninngatitsinerluunniit aalajangersakkamut ilaanngillat. Taamaasilluni iliuutsit taamatut ittut pinerluttulerinermik inatsimmi § 111 malillugu tillitanik pisinertut pineqaatissiissutigineqartassapput, iliuutsit inunnit pinerluut sioqqullugu peqataasimanngitsunit iliuuserineqarsimappata.

Aningaasanik tigorianaannarnik assartuineq § 111 a-mut ilaassaaq, assartuinerup kingunerippagu pissarsiat inummiit inummut allamut imaluunniit nunamut allamut nuunneqarpata. Akerlianilli assartuinermi allamik kiffartuussilluni aningaasat tigorianaanaat nunami maani piffimmiit piffimmut allamut assartuineruppat, tamanna pinerluttulerinermik inatsimmi § 111-mut taamaallaat tunngasuussaaq. Taaneqartoq atuutissaaq aallaqqaammut pissarsiat aningaasaappata tigorianaanaat, aamma pissarsiat aningaasanut tigorianaannarnut allanngortinneqarsimappata.

Aalajangersakkamut ilaapput iliuutsit inunnit pinerluut sioqqullugu peqataasimanngitsunit iliuuserineqartut, soorlu aamma iliuutsit inunnit pinerluut sioqqullugu peqataasimasunit iliuuserineqartut ilaasut. Tamatumunnga atatillugu pinerluttulerinermik inatsit malillugu akisussaataasut atorneqassapput, erseqqinnerusoq pillugu tak. ataaniittoq.

Pinerluut sioqqullugu iliuseqartoq aningaasarsianik malunnarunnaarsitsiniaanerup pinerluutinnortinneranut siunnersuutip avataaniippoq pineqartoq kisimiilluni aningaasaanngitsunik pissarsianik passussipat. Tamatumunnga pissutaavoq aalajangersagassatut siunnersuut qulaani allaaserineqartutut ataatsimut isigalugu iliutsinut taamatut ittunut siunniussaqaangimmat, aamma taakku pinerluut sioqqullugu iliuseqartumit pinnatik allanit iliuserineqarpata. Assersuutitut taaneqarsinnaapput pigisanik tillitaasunik atuineq, tunisineq, akiliisitsilluni attartortitsineq, attartortitsineq, uninngatitsineq, assartuineq allatigullu passussineq.

Pinerluut sioqqullugumut iliuseqartoq aamma aningaasarsianik malunnarunnaarsitsiniaanerup siunnersuutigineqartup avataaniippoq, pineqartoq taamaallaat nunami taannaannaasumi aningaasanik uninngatitsiguni, nunami taannaannaasumi nammineq aningaasaserivimmini kontominut ikisiguni imaluunniit aningaasanik ulluinnarni atugassaminut atuiguni. Tamanna atuuppoq aningaasat aallaqqaammut pissarsiaappata, imaluunniit aallaqqaammut pissarsiat aningaasanngortinneqarsimappata, tamatumunngalu pissutaavoq iliutsit taamatut ittut aalajangersagassatut siunnersuummut ilaanngimmata.

Akerlianilli pinerluut sioqqullugu iliuseqartoq aalajangersagassatut siunnersuummut ilaassaaq, assersuutigalugu pineqartup aningaasat nunat allamiut aningaasaannut imaluunniit nunami taannaasumi aningaasanut pappialaasunut allannortippagit, taakku aallaqqaammut pissarsiaasunit suminngaanneereri paasiuminaannerummata. Aalajangersagassatut siunnersuummi piumasqaataasoq malillugu allannortitsineq inatsisinik unioqqutitsinikkut pissarsiat sumit pinngorfeqarnerat toqqortorniarneqarmat imaluunniit malunnarunnaarsinniarneqarluni. Ilaanneeriarluni allannortitsineq tamatuminnga tamakkiisumik ilaannakortumilluunniit siunertaaneq ajorpoq, assersuutigalugu nunami allami sulinnigiffeqarnermut atatillugu taamaallaat nalinginnaasumik ulluinnarni atugassat siunertaralugit allannortitsisoqarpat.

Assigisaanillu pinerluut sioqqullugu iliuseqartoq aalajangersagassatut siunnersuummut ilaassaaq, pineqartoq assersuutigalugu pappialanut nalilinnut, pigisanut aalaakkaasunut allanulluunniit aningaasaliissuteqarpat. Aningaasaliissutit ulluinnarnilu atuinerit killissaat nalornissutigineqarsinnaavoq, kisiannili pigisaq pisiarineqartoq pisiarineqarnermini akiminit annertuneroqisumik akilersillugu tunineqarsinnaappat, pivisumik eqqarsaatitigullu, pisineq aningaasaliinertut isigineqassaaq, naak pigisaq aamma atornerqarnermini naleqarluartoq.

Pissutsit erseqqinnerusut apeqqutaatillugit assersuutigalugu biilinu, angallatinu, nalunaaqutaqqanu akisuunu pinnersaatinulluunniit, amermik kavaajanu akisuunu, viinninu akisuunu eqqumiitsulianullu tamanna atuussinnaavoq. Assersuutit taaneqartu aningaasarsianik malunnarunnaarsitsiniaanerup killissaata ataaniittunik takutitsippu. Pinerluut sioqqullugu iliuuseqartu aalajangersagassatu siunnersuut aamma unioqutissimassavaa, pineqartoq aningaasarsianik malunnarunnaarsitsiniaanernu eqqarsaatigilluagaanerusunu peqataaguni, taakkununga assersuutit ilaallutik piginneqatigiiffinnik piviusuunngitsunik pilersitsinerit, aningaasanik piviusuunngitsumik nuussinerit, isertortumik akunnermuliutsitaallutik suliaqartitatu, imminnuut paarlaattunik iliuutsit imaluunniit arlalinnik aqquसारinnittunik aamma imaluunniit nunanik arlalinnik aqquसारinnittunik allanngortitsinerit nuussinerilluunniit imaluunniit pinnguaatit atorlugit aamma betting-inik niuernerit atorlugit aningaasarsianik malunnarunnaarsitsinerit.

Aporaaffinni pinerluttulerinermik inatsitigut akisussaataaneq atorneqassaaq. Tamanna isumaqarpoq pinerluut sioqqullugu pinerluttulerinermik inatsit malillugit akisussaataaneq aningaasarsianik malunnarunnaarsitsiniaanernu aalajangersagassatu siunnersuut malillugu pinerluttulerinermik inatsitigut akisussaataaneq millugutissagaa, pissutsit pinerluut sioqqullugu pissutsinu attuumassuteqartu nalinginnaasumik saniatigoortumik pissutsini takuneqarsinnaasaraluartu. Taamaattumik pinerluut sioqqullugu iliuuseqartoq suleriaatsikkut annerusumik aningaasarsianik malunnarunnaarsitsiniaaneq pillugu aalajangersagassatu siunnersuummut ilaasinnaassaaq, aningaasarsianik malunnarunnaarsitsiniaanermik iliuutsit pineqartu iliuuserisimasai inatsisunik unioqutitsinermi pissarsianik passussineq nalinginaasumit qaangiingaatsiarpat.

Aningaasarsianik malunnarunnaarsitsiniaanernu aalajangersagassatu siunnersuut malillugu pinerluttulerinermik inatsit malillugu pinerluut sioqqullugu pinerluttulerinermik inatsit malillugu akisussaaneq millugunneqarsinnaanngippat, pinerluut sioqqullugu pinerluttulerinermik inatsit malillugu akisussaanerup pisoqalisoorsimanera pillugu apeqqut aamma aningaasarsianik malunnarunnaarsitsiniaanernu aalajangersagassatu siunnersuut immikkut nalilerneqassappu. Taamaasilluni pinerluut sioqqullugu pinerluttulerinermik inatsit malillugu akisussaataanissaq ilaanni pisoqalisoorsimasinnaassaaq, tamatumani aningaasarsianik malunnarunnaarsitsiniaaneq pillugu inatsit malillugu pinerluut sioqqullugu iliuuseqartoq pinerluttulerinermik inatsit malillugu

suli akisussaatitaasinnaasoq, ilaatigut pisoqalisoorinissamut piffissaliussap sivilunerunera pissutigalugu, imaluunniit aningaasarsianik malunnarunnaarsitsiniaanerup piffissami kingusinnerusumi iliuuserineqarsimanera pissutigalugu.

Piaaraluneerluni iliuutsit aalajangersakkamut ilaapput, tak. pinerluttulerinermi inatsimmi § 11. Piaaraluneernej pinerluttulerinermik inatsisini tunngaviit nalinginnaasut, aamma suliami pissutsit erseqqinnerusut malillugit ilaatigut suliami piviusumik pissutsit tunngavigalugit uppersarneqarsinnaasarpoq.

Inatsisitigut pininnaatitaasut pisussaatitaasullu aningaasarsianik malunnarunnaarsitsiniaanerumut pinerluttulerinermik inatsit malillugu akisussaatitaasinnaapput, tak. pinerluttulerinermi inatsimmi § 17 aamma kapitali 5. Taamaappat inatsisitigut pininnaatitaasut pisussaatitaasullu aamma inuit, suliffeqarfiup iluani aningaasarsianik malunnarunnaarsitsiniaasimasut pinerluttulerinermik inatsit malillugu akisussaatitaasinnaapput.

Pinerluttulerinermi inatsimmi § 19, imm. 1 malillugu inummut inatsisitigut pisussaatitaasumut pinerluttulerinermi inatsisitigut akisussaatinneqarneq tunngaveqassaaq, suliffeqarfiutaani unoqqutitsisoqarsimanissaanik, inummut ataatsimut imaluunniit inunnut arlalinnut attuumatinneqarsinnaasumik inummut inatsisitigut pisussaatitaasumut attuumassuteqartunut.

Aningaasarsianik malunnarunnaarsitsiniaanermik misiliineq tamatumunngalu peqataaneq pinerluttulerinermik inatsimmi §§ 12 aamma 13-imi maleruagassat nalinginnaat malillugit pineqaatissinneqarsinnaapput.

Tamatuma saniatigut inatsisissatut siunnersuummut oqaaseqaatini nalinginnaasuni imm. 2.3 innersuussutigineqarpoq.

*Nr. 8-mut*

Pinerluttulerinermi inatsimmi § 120-mi allaqqavoq, pininnaatitaaffiigaaneq, tak. kapitali 36, aamma arsaagaaneq, tak. kapitali 37, eqqartuussutigineqarsinnaasoq pineqaatissiissutimut allamut atatillugu.

Tamatuma malitsigivaa, pininnaatitaaffiigaaneq aamma arsaagaaneq pineqaatissiissutinut allanut ilassutitut pineqaatissiissutitut atorineqartussaana.



Siunnersuutigineqarpoq pinerluttulerinermi inatsimmi § 120 atorunnaarsinneqassasoq.

Siunnersuutigineqarpoq aalajangersagaq atorunnaarsinneqassasoq immikkoortoq II-p quletutaata allanngortinneqarnerata kingunerisaanik, tak. § 1, nr. 10-mut siunnersuut, ataatungaani, imatut sunniuteqartoq, pisinnaatitaaffiigaaneq pillugu kapitali 36 aamma arsaarinnineq pillugu kapitali 37 (kiisalu eqqartuussassamut illersuisut pillugit kapitali 35) pinerlunnerit pillugit inatsisitigit kinguneqaataasutut isigineqalissasut aamma pineqaatissiissutituunngitsoq. Tamatuma kingorna § 120-mi aalajangersagaq pisariaqanngilaq, pisinnaatitaaffiigaaneq aamma arsaarinnineq pillgit, ullumikkut pineqaatissiissutitut isigineqartut, pineqaatissiissutitut allanut ilassutitut eqqartuussutaasinnaassasut.

Tamatuma saniatigit inatsisissatut siunnersuummut oqaaseqaatini nalinginnaasuni imm. 2.4 innersuussutigineqarpoq.

*Nr. 9-mut*

Pinerluttulerinermi inatsimmi § 135 malillugu eqqartuussiviup eqqartuussummi piumasaqaatitut aalajangersarsinnaavaa, pinerluttunik isumaginnittut aalajangersaanerat malillugu eqqartuunneqartup naalattussaminik assigiinngitsutigut katsorsartinnissaa, tassunga ilagitillugit atonerluisuuneq pillugu katsorsarneqarneq, nakorsartinneq imaluunniit tarnip pissusaanut tunngatillugu/atoqatigiittanermi pissutsit pillugit nakorsartinnerit.

Siunnersuutigineqarpoq, § 135, imm. 1, nr. 3-mi tarnip pissusaanut tunngatillugu nakorsartinneq ilanngunneqassasoq, eqqartuussutaasinnaasutut atugassarititaasunut ilanngullugu.

Siunnersuutip kingunerivaa pinerluttulerinermi inatsimmi § 135-imi nakkutigineqartussanngortitsilluni eqqartuussutip, tarnip pissusaa pillugu nakorsartinnissamut tunngaviunissaa pillugu erseqqissaaneq.

Tamatuma saniatigit inatsisissatut siunnersuummut oqaaseqaatini nalinginnaasuni imm. 2.5 innersuussutigineqarpoq.

*Nr. 10-mut*

Pinerluttulerinermi inatsimmi immikkoortoq II-p qulequtaa malillugu,

arsaarinninneq pineqaatissiissutitut isigineqarpoq. Tamanna pinerluttulerinermi inatsimmi § 16-imut naleqqiunneqaruni, iliuitsit meeqqanit 15-it inorlugit ukiulinnit iliuserineqartut inatsit malillugu pineqaatissiissuteqarnermik kinguneqarsinnaanngitsut, tamatuma kingunerivaa, meeqqanik 15-it ataallugit ukiulinnit arsaarinnittoqarsinnaanngitsaq.

Siunnersuutigineqarpoq immikkoortoq II-mut qulequttap allanngortinneqarnissaa, taamaalilluni qulequttamut ilanngunneqarluni “pinerluuteqarnemi inatsisitigut kinguneqaataasut allat”.

Siunnersuutitigut pinerluttulerinermi inatsimmi immikkoortoq II-p qulequtaa imaalissaaq “Pineqaatissiissutit ataasiakkaat aamma pinerluuteqarnemi inatsisitigut kinguneqaataasut allat”.

Tamanna ilanngussineq, eqqartuussassamut illersuisut pillugit kapitali 35, pisinnaatitaaffiigaaneq pillugu kapitali 36 aamma arsaarinninneq pillugu kapitali 37, pinerluuteqarnermut inatsisitigut kinguneqaataasut allatut isigineqalernissaannik siunertaqarpoq aammalu pineqaatissiissutituunngitsaq. Tamatuma kingunerivaa, arsaarinninneq pillugu malittarisassat pineqaatissiissutitut isigineqarunnaarnerannik, imatut kinguneqartussaasoq, meeqqanut 15-it inorlugit ukiulinnut atorneqarsinnaasunngorlutik. Kapitali 24-34 allanngoratik pineqaatissiissutitut isigineqassapput.

Allannguutissatut siunnersuutitigut Kalaallit Nunaanni Politiit assersuutigalugu meeqqamit 13-inik ukiulimmit hashimik arsaarinnissinnaalissapput. Aammattaaq aalisarnermut qassutinik meeqqamit 15-it inorlugit ukiulimmit arsaarinnissinnaalissapput, taakku inatsisinik unioqqutitsumik aalisarnermut atorneqarsimappata.

Tamatuma saniatigut inatsisissatut siunnersuummut oqaaseqaatini nalinginnaasuni imm. 2.4 innersuussutigineqarpoq.

*Nr. 11-mut*

Pinerluttulerinermik inatsimmi § 168, imm. 1 malillugu pisuussutitut ajunngitsorsiassaatinik inummit pinerluummut pisuutitaasumit pigineqartunik tamakkiisumik ilaannakortumilluunniit arsaarinnittoqarsinnaavoq, iliuseq ima ittuuppat annertuumik iluanaarutiginnissutaasinnaalluni, aamma inatsisinik unioqqutitsineq immikkut ittumik sakkortussuseqarpat.

Pinerluttulerinermi inatsimmi § 168-ip maanna oqaasertaligaanera malillugu periarfissaavoq annertusisamik arsaarinninnissamut, soorlu suliami inuk hash-imik 8 kg-mik pigisaqarsimasutut eqqartuunneqarpat, hash-imik 8 kg-mik pigisaqarnermut pineqaatissiissut eqqartuussisarnermi ileqqusoq malillugu ukiuni 2-t missaani isertitsivimmiittussanngortinneqarnermik kinguneqartarmat aammalu inatsimmik annertuumik unioqqutitsinertut isigineqarmat, aalajangersakkap atuuffissaani ataani inissisimasoq. Aanngajaarniutit pillugit inatsimmik unioqqutitsineri aalajangersakkap qaqugukkut inatsisit atuuttut malillugit atorneqarnissaanut killiusoq hash-ip 3 kg-p missaaniippoq, tassani isertitsivimmiinnissamut pineqaatissiissutaasartoq ukiup ataatsip missaaniilluni.

Siunnersuutigineqarpoq, § 168, imm. 1, nr. 2-mut ilassutigineqassasoq, aalajangersagaq aamma atuussinnaasoq, aanngajaarniutit pillugit inatsimmik unioqqutitsineq eqqartorneqartillugu.

§ 168, imm. 1, nr. 2-mik siunnersuutitigut, taamaalilluni siunnersuutigineqarpoq pinerluttulerinermik inatsimmi § 168-mi Kalaallit Nunaanni pissarsianik arsaarinnissinnaanerup annertusineqarnissaa, taamaasilluni ikiaroonartut pillugit inatsisinik unioqqutitsinerit tamarmik ilaasussanngorlugit. Taamaasilluni suliani taamatut ittuni inatsisinik unioqqutitsinerup sakkortuujunissaa pisariaqarunnaarpoq.

Allannguut isumaqassaaq inuk ikiaroonartut pillugit inatsisinik unioqqutitsisimasutut eqqartuunneqarpat, assersuutigalugu hashimik 2 kg-mik peqarsimasutut, pisussusutitut ajunngitsorsiassaait annertunerusut pineqartup pigisai arsaarinnissutigineqarsinnaassapput, pineqartup uppersarsinnaanngippagu pisussusutitut ajunngitsorsiassaait inatsisit malillugit pissarsiarisimallugit. Assigisaanik pisussusutitut ajunngitsorsiassaait inuup immikkut sakkortuumik anngiortumik eqqussisutut eqqartuunneqartup pigisai arsaarinnissutigineqarsinnaassapput, pineqartup uppersarsinnaanngippagu taakku inatsisinik eqqortitsisumik pissarsiarisimallugit.

Erseqqissaatigineqassaaq pinerluttulerinermik inatsimmi § 168 malillugu pissarsianik annertusisamik arsaarinnissinnaanerup atorneqarnissaanut pineqartup annertuumik pissarsisutigisinnaasaminik inatsisinik unioqqutitsisimasutut eqqartuunneqarsimanissaa. Taamaasilluni pineqartoq taamaallaat ikiaroonartunik annikinnerusunik annertunerusumik

pissarsissutigisinnaangisaminik peqartutut eqqartuunneqarsimappat, piumasaqaat taanna eqqortinneqarsimassanngilaq. Tamanna isumaqarpoq § 168-mi aalajangersakkamut allannguutissatut siunnersuut annerusumik ikiaroorartut pillugit inatsisinik annertunerusumik unioqquitsinerni pingaaruteqartuussasoq, taamaasillunilu inunnik pinerlunniarnermik inuussuteqartunik imaluunniit annertuumik isertitaqartartunik eqquisuussalluni.

Tamatuma saniatigut inatsisissatut siunnersuummut oqaaseqaatini nalinginnaasuni imm. 2.4 innersuussutigineqarpoq.

*Nr. 12-mut*

Pinerluttulerinermik inatsimmi § 196, imm. 1 malillugu inissiisarfirmut inissinneqartussanngorluni pineqaatissinneqarneq sapinngisamik periarfissaqartillugu eqqartuunneqartup angerlarsimaffiata qanittuani naammassineqassaaq (qanittumiinnissamik tunngaveqarneq). Pinerluttulerinermik inatsimmi § 196, imm. 2, nr. 1-5 qanittumiinnissamik tunngaveqarneq pisuni assigiinngitsuni arlalinni avaqqunneqarsinnaavoq.

Pinerluttulerinermi inatsimmi § 196, imm. 2, nr. 4-mi aalajangersakkamik nutaamik ilanngussisoqarnissaa siunnersuutigineqarpoq, taanna malillugu qanittumiinnissamik tunngaveqarneq avaqqunneqarsinnaassaaq, eqqartuunneqartoq perorsaariaatsikkut, nakorsamit imaluunniit allatigut immikkut ittumik ikiorneqarsinnaaqqullugu.

Qanittumiinnissamik tunngaveqarneq avaqqunneqarsinnaassaaq aalajangersagassatut siunnersuutikkut, assersuutigalugu eqqartuunneqartoq inissiisarfirmut inissinneqarluni naammassinnissappat, eqqartuunneqartup perorsaariaatsikkut, nakorsamit imaluunniit allatigut immikkut ittumik ikiorneqarnissaa siunertaralugu. Tamanna aamma atuuppoq eqqartuunneqartup kissaatiginngisaanik inissinneqarnissaa pineqartillugu.

Taamaasilluni aalajangersagaq atorneqarsinnaassaaq assersuutigalugu kinguaassiuutitigut pinerluteqarsimasut Nuummi Inissiisarfirmut nuullugit. Peqatigisaanik erseqqissaatigineqarpoq arnanut immikkut ittunik immikkoortoqarfeqalersinnaanera.

Pinerluttulerinermi inatsimmi § 196, imm. 2, nr. 5-mi siunnersuutigineqarpoq, qanittumiinnissamik tunngaveqarneq avaqqunneqarsinnaasoq pinngitsoortinniarlugu, inissinneqarsimasoq inissiisarfirmi inissisimassasoq qanigisaata atorfeqarfigisaani.

Aalajangersakkamik siunertaavoq, atorfeqartup sullissinini eqqortumik aamma attuumassuteqanngitsumik ingerlassinnaannginneranik pasilliisoqarnissaanik pinngitsoortitsinissaq.

Aalajangersakkap killeqarnerusumik atorneqarnissaa piunasaqaataavoq, danskit pillaatiniq eqquutsitsineq pillugu inatsisaanni aalajangersakkamut assingusumut sanilliullugu, Kalaallit Nunaanni qanittumiinnissamik tunngaveqarnermik avaqqutsineq ilaatigut nunami isorartuumiinneq pissutigalugu eqqartuussamut sunniuteqarnerusarmat Danmarkimi pissutsinut sanilliullugu. Taamaattoq aalajangersakkamik atuineq inissiisarfimmi atorfeqartumik eqqarsaatiginnittumik pissaq.

Pinerluttulerinermi inatsimmi § 196, imm. 2, nr. 6-mi siunnersuutigineqarpoq, qanittumiinnissamik tunngaveqarnek avaqqunneqarsinnaasoq pinngitsoortinniarlugu, eqqartuussaq inissiisarfimmi inissisimanissaa, tassani inissiisarfimmi atorfeqartoq imaluunniit taassuma qanigisaa eqqartuussap pinerluffigisimappagu.

Aalajangersakkap kingunerivaa, qanittumiinnissamik tunngaveqarnek avaqqunneqarsinnaasoq pinngitsoortinniarlugu, eqqartuussaq inissiisarfimmi inissisimanissaa, tassani inissiisarfimmi atorfeqartoq imaluunniit taassuma qanigisaa eqqartuussap pinerluffigisimappagu, pisuni taamaattuni atorfeqartumut innimiginneq nalilersuereernikkut tunngavigineqarsinnaammat, qanittumiinnissamik tunngaveqarnerup avaqqunneqarnissaanut. Inatsisissatut siunnersuut malillugu piunasaqaataanngilaq, eqqartuussut, inissiisarfimmiittussaaneq, pisumut attuumassuteqarnissaa, pineqartup inissiisarfimmi atorfeqartumut imaluunniit taassuma qanigisaanut iliuuserisimasaanut.

Pinerluttulerinermi inatsimmi § 196, imm. 2, nr. 4-6-mi aalajangersakkat siunnersuutigineqartut, danskit pillaatiniq eqquutsitsineq pillugu inatsisaanni § 23, imm. 2, nr. 4, 7 aamma 8-mut assingupput, tak. inatsimmut nalunaarut nr. 1333, 12. december 2019-imeersoq.

Nr. 4-mi aamma 5-imi aalajangersakkat atuuttut taassuma kingorna nr. 7 aamma 8-nngussapput.

Tamatuma saniatigut inatsisissatut siunnersuummut oqaaseqaatini nalinginnaasuni imm. 2.6. innersuussutigineqarpoq.

*Nr. 13-imut*

Pinerluttulerinermi inatsimmi § 215, imm. 1 malillugu, inissineqarsimasut ikinnerpaamik sapaatip akunneranut ataasiarlutik sivikinnerpaamik akunneq ataaseq aammalu akunnerit marluk angullugit pulaartoqarsinnaatitaapput. Inissineqarsimasunut aneeqqusaanngitsunut pulaartoqarnissamut sapinngisamik annertusisamik akuersissuteqartoqartassaaq. Imm. 3 malillugu Kalaallit Nunaannit Pinerluttunik Isumaginnittut pisortai, torersuunissaq imaluunniit isumannaatsuunissaq pillugu inissineqarsimasut pulaartoqarsinnaanerit pillugu imm. 1, pkt. 1 malillugu eqqartuussivimmi killilersuutitut malittarisassanik aalajangersaasinnaapput.

Imm. 3-mik nutaamik ikkussisoqarnissaa siunnersuutigineqarpoq, taassuma kingorna inissiisarfiup aalajangersinnaallugu, pulaartut inissineqarsimasumut pulaarnissamut pulaarnissaq sioqqullugu akuersissummik piniaqqaarnissaat, aamma pulaarnissamut akuersissuteqarnissamut piunasaqaataasinnaasoq, pulaartup misissorneqarnissamut akuersinissaa. Taamatuttaaq siunnersuutigineqarpoq, pulaartup takkunnermini atisanik atugaanik misissuisinnaaneq, kiisalu pulaartup qaatiguuinik aamma nassataanik annertusisamik misissuineq.

Tamatuma malitsigisaanik siunnersuutigineqarpoq, maanna imm. 3-iusoq taassuma kingorna nr. 4-nngussasoq.

Taamaalilluni siunnersuutigineqarpoq, aalajangersakkamik nutaamik ikkussisoqarnissaa, tassani erseqqissummik allaqqassalluni, inissiisarfiup aalajangersinnaagaa, pulaartut inissineqarsimasumut pulaarnissamut pulaarnissaq sioqqullugu akuersissummik piniaqqaarnissaat. Pulaarnissamut akuersissuteqarnissamut piunasaqaataasinnaavoq, pulaartup misissorneqarnissamut akuersinissaa. Pulaartup takkunnermini atisanik atugaanik misissuinerusinnaavoq, aammalu pulaartup qaatiguuinik aamma nassataanik annertusisamik misissuisinnaalluni.

Siunnersuutip kingunerivaa, Kalaallit Nunaanni pinerluttunik isumaginnittut inissiisarfii periarfissaqalissasut piunasaqaateqarnissamut, pulaartut annertusisamik misissortinnissamut akuersinissaannut, ullumikkut malittarisassat periarfissiinerannit annertunerusumik.

Siunnersuut inissineqarsimasunut pulaarnermut atatillugu anngiortumik eqqussuisoqarsinnaaneranut navianaat pillugu iliuuseqarneruvoq, aammalu pisariaqartut isigineqarpoq inissiisarfiit periarfissaqarnissaat,

isumannaarinissamut pulaartut atortunik inissiisarfinnut eqqussuisinnaanerannut, tassunga ilagitillugit aanngajaarniutit aammalu atortut inerteqqutaasut allat.

Siunnersuutip inissiisarfiit periarfississavai pulaartup takkunnermini atisanik atugaanik misissuisinnaanermut, kiisalu pulaartup qaatiguuinik aamma nassataanik annertusisamik misissuisinnaanermut.

Oqaaseqaatigineqarpoq, siunnersuutip kingunerissanngikkaa, pulaartuq akuersissuteqaqqaartinnagu inissiisarfiit misissuisinnaanissaat. Taamaalilluni pulaartuq misissorneqarnissamut itigartitsisinnaajuassaaq, pulaarnissap itigartitsissutigineqarneranik kinguneqarsinnaasumik. Taamatuttaaq misissuinerit annertussusaat nalorninartoqarsinnaaneranik nalilersuereernikkut nalimmassarneqassapput.

Aalajangersakkatut siunnersuutigineqartoq siullermik, pulaartup takkunnermini atisanik atugaanik misissuisinnaanermik periarfissiissaaq. Tamanna pisinnaavoq pulaartup atisaata qaavatigut pattanneqarneranik aamma attuaneqarneranik. Tassuunakkut eqqunneqarpoq, pulaartuq atisamini, kaasarfimmini imaluunniit timimini atisat iluisigut atortunik toqqortaateqarnerisooq attuanninnikkut misissorneqarsinnaanera.

Piumasaqaataavoq, pulaartup takkunnermini atisanik atugaanik taamatut misissuineq, sulisunit pulaartup suiaaqatigisaanit ingerlanneqarnissaa.

Taaguummot "pulaartup takkunnermini atisanik atugaanik misissuineq"-mut ilaavoq, misissueriaatsit atugaareersut, pulaartoqarneq pillugu nalunaarummi § 10, imm. 1-imi taaneqartut, tak. immikkoortoq 2.7.1.1-ip qulaaniittoq. Taamaalilluni aamma misissuineq pisinnaavoq, pulaartup kaasarfimmi il. il. imarisaanik takutitsinissamut qinnuigineqarneratigut, soorluttaaq pulaartup takkunnermini atisanik atugaanik misissuilluartoqarsinnaasooq, metaldetektor-imik atuinikkut. Taamatuttaaq misissuineq aamma pinerluttunik isumaginnittoqarfiup piumasaqarneratigut, pinerluttunik isumaginnittut qimmiutaanit aanngajaarniutinik naamasartumik atuinikkut, pulaartup misissorneqarnissamut akuersineratigut pisinnaavoq.

Aalajangersakkatut siunnersuutigineqartoq aappaattut, pulaartup qaatiguuinik annertusisamik misissuisinnaanermut periarfissiissaaq. Qaatiguunik taaguinermi ilaatinneqarput ikiaqutit tikillugit atisarineqartut. Pulaartup qaatiguuinik annertusisamik misissuineq imatut pissaaq, pulaartup qaatiguuminik ikiaqutini tikillugit peernissaanik

qinnuiginninnikkut, inissiisarfiup qaatiguunik misissuilluarsinnaanera siunertaralugu.

Tamatuma saniatigut pulaartup atortunik nassataanik annertusisamik misissuisoqarsinnaavoq, tassunga ilagitillugit atisanik, pulaartup atugarinnngisaanik.

Pulaartup qaatiguinikaamma atortunik nassataanik annertusisamik misissuinerup kingunerivaa, inissiisarfik kaasarfinnik, taskinik il. il. takunnissinnaanera aammalu misissuisinnaanera imaarlugit, imarisaasunik misissuilluarnissaq siunertaralugu. Misissuineq metaldetektor-imik atuinikkut pisinnaavoq.

Pulaartoqarneq pillugu nalunaarummi § 12-mi malittarisassanik allanngortitsinissaq siunertaangilaq, pulaartup qaatiguunik annertusisamik misissuinermik naammassinninneq pineqartillugu, tak. Tamanna pillugu immikkoortoq 2.7.1.1.-imi qulaaniittoq.

Oqaaseqaatigineqarpoq, suli siunertaasoq, pulaartup qaatiguunik annertusissamik misissuineq taamaallaat pisinnaasoq, pisuni ataasiakkaani, pulaartoq anngiortumik eqqussinianera pasitsaanneqarpat. Tamatumali akerlianik, atisanik pulaartup atugaanik misissuineq pisinnaavoq, taamatuttaaq pulaartup atortunik nassataanik annertusisamik misissuineq pisinnaavoq pasitsaassisoqanngikkaluarpalluunniit.

Oqaaseqaatigineqarpoq, aalajangersakkatut siunnersuutitigut (suli) inatsisitigut tunngavissaqassasoq, misissuinerit pisinnaasut inissiisarfinni ammasuusuni misissuinerit assigalugit aamma inissiisarfinni matoqqasusuni. Inissinneqarsimasut pulaarneqarsinnaanerintut naammassinninnermut malittarisassat, tassunga ilagitillugu pulaartunik misissuineq, maannakkutuulli allaffissornikkut aalajangersarneqassapput, tak. pinerluttulerinermi inatsimmi § 215, imm. 3, siunnersuutikkut imm. 4-nngortoq, aammalu aalajangersakkatut siunnersuutigineqartoq akornutaassanngilaq, tassunga atatillugu pisariqartitsineq naapertorlugu, inissiisarfiit ammasut aamma matoqqasut immikkoortinneqarsinnaanerintut.

Tamatuma saniatigut inatsisissatut siunnersuummut oqaaseqaatini nalinginnaasuni imm. 2.7.1 innersuussutigineqarpoq.

*Nr. 14-imut*

§ 215, imm. 3 malillugu Kalaallit Nunaanni Pinerluttunik Isumaginnittut



pisortai isumannaatsuunissaq pillugu pulaartoqarsinnaanermut killilersuutitut malittarisassanik aalajangersaasinnaanissamut piginnaatinneqarput, tassunga ilagitillugu inunnik aalajangersimasunik pulaaqqusinnginneq pillugu aammalu nakkutilliisoqarluni pulaartoqarnissaq pillugu, pulaartoqarnissamut akuersissuteqarnissamut pulaartup qaatiguuinik aamma nassataanik misissuinissamut piumasaaqateqarsinnaaneq pillugu.

§ 215, imm. 4-mut siunnersuutikkut, imm. 3-mik nutaamik ikkussisoqarnissaa pissutigalugu aalajangersakkap oqaasertai allanngortinneqarput.

Aalajangersagaq maannatulli atorneqarsinnaassaaq, soorluttaaq aalajangersagaq pulaarnissamut akuersissuteqarnissamut piumasaaqatit pillugit malittarisassanik aalajangersaanissamut atorneqarsinnaassasoq, tassunga ilagitillugu pulaartut misissorneqarsinnaanerannut periarfissat uani inatsisissatut siunnersuummi siunnersuutip § 215, imm. 3-p kingunerisaanik. Taamatuttaaq pulaartut qimmit aanngajaarniutinik naamasartut atorlugit misissorneqarsinnaaneritut malittarisassanik aalajangersaasoqarsinnaassaaq.

Tamatuma saniatigut inatsisissatut siunnersuummut oqaaseqaatini nalinginnaasuni imm. 2.7.1 aamma 2.7.3 innersuusutigineqarput.

*Nr. 15-imut*

Pinerluttulerinermik inatsimmi § 221, imm. 1-imi takuneqarsinnaavoq pinerluuteqarsimasunik isumaginnittoqarfiup misissorsinnaaga inissinneqarsimasoq inimi sumiiffigisamini imaluunniit timimini pigisanik sunik peqarnersoq, mianerisassat arlallit eqqortinneqarsimappata. Pinerluttulerinermik inatsimmi § 221, imm. 2 malillugu inissiisarfiup aqutsisuata aalajangersinnaavaa inissinneqarsimasup inuttaa erseqqinnerusumik misissorneqassasoq, aalajangersimasunik tunngavissaqarluni isumaqartoqarpat inissinneqarsimasoq pisussaaffiginngisaminik pigisanik pigisaqartoq. Pinerluttulerinermik inatsimmi § 221, imm. 3 aamma imm. 4-mi allaaserineqarpoq misissuineq qaqugukkut qanorlu ililluni ingerlanneqassasoq.

Siunnersuutigineqarpoq aalajangersakkamik nutaamik ikkussisoqassasoq, inissiisarfiup pisortaata imaluunniit taanna tamatumunnga piginnaatitaasup, inissinneqarsimasup supoorsilluni misiligummik imaluunniit quumik

misiligummik tunniussinissanut aalajangersaasinnaaneranik, inissineqarsimasup aalakoornartutorsimasinnaaneranic, aanngajaarniutitorsimasinnaaneranic imaluunniit allanik atuisimasinnaaneranic, inatsisit nalinginnaasut malillugit inerteqqutaasunik, misissuinissaq siunertaralugu. Taamatuttaaq siunnersuutigineqarpoq, Kalaallit Nunaannit Pinerluttunik Isumaginnittut misissuilluni supoorsilluni misiligummik aamma quumik misiligummik tigusinissaq pillugu malittarisassanic aalajangersaasinnaaneranun tunngavissiisoqarnissaa.

§ 221 a-mik siunnersuutitigut, siunnersuutigineqarpoq pinerluuteqarsimasunik isumaginnittoqarfiup inissiisarfii inissineqarsimasunit quumik supoorsillunilu misiligutinik tigusineq pillugu Kalaallit Nunaannut maleruagassanic eqqussisoqassasoq, tamannalu pisinnaassalluni aalajangersimasunik pasisaqarnikkut aamma nakkutilliilluni misiliguteqartarnikkut.

Taamaasilluni siunnersuutigineqarpoq inissineqarsimasup imigassartorsimasinnaanera, ikiaroorartunik imaluunniit akuutissanik allanik inatsisit nalinginnaat malillugit inerteqqutaasunik atuisimasinnaanera misissorniarlugu inissineqarsimasoq supoorsilluni imaluunniit quumik misiligummik tunniussinissaa pillugu aalajangiisoqarsinnaassasoq.

Aalajangersagassatut siunnersuutigineqartukkut imm. 1-imi periarfissiisoqarpoq pinerluuteqarsimasunik isumaginnittoqarfiup inissiisarfii inissineqarsimasuni quumik misiligutinik nakkutilliinissamut, ikiaroorartumik, akuutissanillu allanik inatsisit nalinginnaat malillugit inerteqqutaasunik, assersuutigalugu nukkassatinik atonerluisoqarsimasinnaanera misissorniarlugu. Taamaasilluni inissineqarsimasut piffissani piffinnilu siumut aalajangeriigaanngitsuni piunasaqaatigineqarfigineqarsinnaassapput quumik misiligummik tunniusseqqullugit, inissineqarsimasut ikiaroorartumik akuutissanillu allanik inerteqqutaasunik atonerluisimasinnaanerisa nakkutigineqarnissaat siunertaralugu. Tamatuma saniatigut siunnersuutigineqarpoq pinerluuteqarsimasunik isumaginnittoqarfiup inissiisarfii inissineqarsimasuni supoorsilluni misiligutinik nakkutilliisoqarsinnaassasoq, imigassartorsimasinnaanerisa misissorneqarnissaat siunertaralugu. Siunnersuutip ilaata taassuma aamma kingunerissavaa inissineqarsimasut piffissani piffinnilu siumut aalajangeriigaanngitsuni supoorsilluni misiligutinik tunniussinissaannik piunasaqaatigineqarfigisinnaanerit, inissineqarsimasut

imigassartorsimasinnaanerisa nakkutigineqarnissaat siunertaralugu.

Aalajangersagassatut siunnersuut malillugu quumik misiligummik nakkutilliinermik aamma supoorsilluni misiligummik nakkutilliinermik aallartitsinissamut inissinneqarsimasup imigassartorsiamneranik aamma ikiaroorartumik atuisimaneranik aalajangersimasumik pasitsaassaqaarsimanissaq piumasqaataangilaq. Quumik misiligummik aamma supoorsilluni misiligummik tigusinissaq kingorna inissinneqarsimasunut suleriaaseq malillugu aamma misiliinissaq siunertaralugu piumasqaatigineqarsinnaalissaaq, tamanna naapertuuttut aamma piviusorsiortumik naliliineq tunngavigalugu, pingaartumik pinaveersaartitsinermik mianerisassat aallaavigalugit. Torersumik pissuseqarnissamik aalajangersakkat malinneqarnissaasa aamma isumannaallisaanermut mianerisassat malinneqarnissaasa qulakkeerneqarnissaannut nakkutilliinerup aalajangiisuunissaata uppersisinnissaat piumasqaataangilaq.

Aalajangersagassatut siunnersuut inunnt amerlanerusunut, assersuutigalugu inissiisarfimmi ataatsimi arlalinniluunniit imaluunniit immikkoortoqarfinni, soorlu aamma inissinneqarsimasunut ataasiakkaanut atorneqarsinnaassaaq.

Quumik misiligummik nakkutilliinerup aamma supoorsilluni misiligummik nakkutilliinerup piviusunngortinnissaanut taamaallaat inissiisarfimmi aqutsisoq imaluunniit inuk tamatumunnga pisinnaatitaasoq aalajangiisuusinnaapput.

Imm. 2-mi oqaatigineqarpoq § 221, imm. 4-mi aalajangersagaq aamma aalajangersagassatut siunnersuut taanna malillugu akuliunnernut atorneqartassasoq.

Tamatuma malitsigisaanik akuliunneq ingerlanneqassaaq pissutsit aallaavigalugit sapinngisamik mianersornerpaamik. Tamatuma ilaatigut kingunerissavaa quumik misiligummik aamma supoorsilluni misiligummik tunniussinermi inissinneqarsimasunik allanik najuuttoqassanngitsoq.

Tamatuma saniatigut piumasqaataavoq § 221 a-mi aalajangersagassatut siunnersuut malillugu akuliunnerit taamaallaat ingerlanneqassasut akuliunneq piviusorsiortumik mianerisassanik tunngavilersugaappat.

Quumik misiligummik tunniussinermi inissinneqartup tamakkiisumik ilaannakortumilluunniit atisaajarnissaa pisariaqartinneqarpat, akuliunneq

qaqutiguinnaq ingerlanneqassaaq inissinneqartup suiaaqatiginngisaanik inissinneqarsimasunik allanik imaluunniit peqqinnissaqarfimmi sulisunik najuuttoqartillugu.

Imm. 3-mi siunnersuutigineqarpoq Kalaallit Nunaanni Pinerluuteqarsimasunik Isumaginnittoqarfimmi aqutsisut suleriaaseq malillugu quumik misiligummik nakkutilliinerup aamma supoorsilluni misiligummik nakkutilliinerup ingerlannissaanut maleruagassanik erseqqinnerusunik suliarinninnissamut inatsisitigut tunngavissinneqassasut. Tamatuma pinerluttulerinermik inatsimmi § 221 malillugu inissinneqarsimasup inuttaanik inimillu sumiiffianik misissuinissamut aaqquissuussinerup assigaa, tak. § 221, imm. 5. § 221, imm. 5 inatsisitut tunngavigalugu nalunaarut nr. 1175, 9. december 2009-meersukkut tamanna pillugu maleruagassat erseqqinnerusut aalajangersagaapput.

Tamatuma saniatigut inatsisissatut siunnersuummut oqaaseqaatini nalinginnaasuni imm. 2.7 innersuussutigineqarpoq.

*Nr. 16, 17 aamma 18-imut*

Pinerluttulerinermik inatsimmi § 226 malillugu inissinneqarsimasooq inissiisarfiup aqutsisuanit imaluunniit inummit tamatumunnga piginnaatitaasumit innersuussummik malinnginngikkuni § 202 malillugu pissusissanik malinngitsutut pineqaatissinneqarsinnaavoq, takkutinnitsoornermi, qimaanermi qimaariaraluarnermiluunniit, § 210, imm. 1 malillugu suliaqarnissamut pisussaaffiup avaqqunneranut, pinerluttulerinermi inatsisinik unioqutitsinermi, unioqutitsineq inissiisarfimmi torersumik pissuseqarnissamik isumannaallisaanermillu namminerisamik kanngunarsaaneruppat, maleruagassanik Kalaallit Nunaanni Pinerluuteqarsimasunik Isumaginnittoqarfiup aqutsisuinit aalajangersagaasunik unioqutitsinermi, maleruagassani aalajangersarneqarsimappat unioqutitsineq pissusissanik malinnginngitsutut pineqaatissinneqarnermik kinguneqarsinnaavoq.

Pinerluttulerinermi inatsimmi § 227-imi allaqqavoq, malinngitsutut pineqaatissinneqarnermut mianersoqqusineq, akiliisitaaneq, aneersinnanermut akuersissummik arsaagaaneq aamma inimut kisimiittarissamut inissinneqarneq atorneqarsinnaassasut. Taamaattoq inimut kisimiittarissamut inissinneqarneq taamaallaat atorneqarsinnaavoq, takkutinnitsoornermut imluunniit qimaanermut, sakkunik anngiortumik eqqussinermut imaluunniit pigisaqarnermut, imaluunniit inissisimaqatigisanut imaluunniit sulisunut persuttaanermut imaluunniit

persuttaanissamik siorasaarinnermut, aalakoornartortalinnik imaluunniit aanngajaarniutunik anngiortumik eqqussinnermut, pigisaqarnermut imaluunniit atuinnermut aammalu ingasattumik imaluunniit uteqqiasumik unioqqutitsinnermut.

Inatsisit atuuttut malillugit ilaatigut inimik kisimiittarissamik atuneq periarfissaavoq, inissisimasoq inerteqqutaasunik aanngajaarniutunik atuisimappat.

Pinerluttulerinnermik inatsimmi § 226, nr. 4 aamma nr. 5-imi siunnersuutigineqarpoq, inissinneqarsimasup pissusissanik malinnginngitsut pineqaatissinneqarsinnaanissaanut inatsisitigut tunngavissamik ikkussisoqarnissaa, pineqartoq § 211 a-mut (inatsisissatut siunnersuummi § 1, nr. 15) siunnersuut malillugu quumik misiligummik imaluunniit supoorsilluni misiligummik tunniussinissamut itigartitsippat, imaluunniit inissinneqarsimasoq imigassartorsimappat, ikiaroorartunik imaluunniit akuutissanik allanik inatsisit nalinginnaat malillugit inerteqqutaasunik atuisimappat.

Pinerluttulerinnermik inatsimmi § 227, imm. 2, nr. 4-mi siunnersuutigineqarpoq inissinneqarsimasunut quumik misiligummik imaluunniit supoorsilluni misiligummik tunniussinissamut itigartitsisunut pissusissanik malinngitsutut pineqaatissiissutitut inimut kisimiiffiusumut mattunneqarsinnaanerat inatsisitigut tunngavissinneqassasoq.

Siunnersuutip kingunerissavaa ikiaroorartumik il. il. atuisimanermit nakkutilliinissaq siunertaralugu quumik misiligummik tigusinissamut itigartitsinnermi, soorlu aamma imigassartorsimanermit nakkutilliinissaq siunertaralugu supoorsilluni misiligummik tigusinissamut itigartitsinnermi pissusissanik malinnginnermut pineqaatissiissutitut inimut kisimiiffiusumut inissinneqarsinnaaneq.

Inimi kisimiittarissami inissiinissap atorneqarsinnaaneranut inatsisitigut tunngavissatigut siunnersuutigineqartukkut quumik misiligummik tunniussinissamut itigartitsinnermi, inimut kisimiiffiusumut inissinneqarnerup inissinneqartumut pineqaatissiissutigineqarnissaa qulakkeerneqarpoq.

Pinerluttulerinnermi inatsimmi § 227, imm. 2, nr. 5-imi siunnersuutigineqarpoq, aalajangersakkami oqaaseqatigiinnik erseqqissaanissaq, aanngajaarniutit allat ilaatinneqarnerat pillugu, inatsisit nalinginnaasut malillugit inerteqqutaasut.

Allannguut imarisaatigut sunniuteqanngilaq, aalajangersakkami aanngajaarniutit taaneqartut ilaatinneqareermata, kisiannili § 226, imm. 2, nr. 5-imi aamma § 227, imm. 2, nr. 5-imi allannguisoqarpoq oqaasertaliinermi assigiimmik allaqqanissaat pillugu.

Tamatuma saniatigut inatsisissatut siunnersuummut oqaaseqaatini nalinginnaasuni imm. 2.7 innersuussutigineqarpoq.

## § 2-mut

### *Nr. 1-imit*

Kalaallit Nunaanni eqqartuussisarneq pillugu inatsimmi § 44, imm. 2 malillugu suliani unnerluutigineqartoq pisuutitaasimatillugu, aamma akiliisitaanermit, arsaarinninnermut, biilersinnaajunnaarsitaanermit imaluunniit taarsiissuteqarnermit annerusumik pineqaatissiisoqarsinnaatinnagu eqqartuusseqaataasut peqataassanngillat.

§ 44, imm. 2-mut siunnersuummi, allannguisoqarpoq, eqqartuussassanut illersuisut, arsaarinninneq aamma pisinnaatitaaffiigaaneq pinerluuteqarnermut inatsisitigut kinguneqaataasussanngortillugit siunnersuuteqarnerup kingorna malitsinngortillugit.

Tamatuma saniatigut inatsisissatut siunnersuummut oqaaseqaatini nalinginnaasuni imm. 2.4 innersuussutigineqarpoq.

### *Nr. 2-mut*

Piumasaqaataasumik pisortat unnerluussinissaanut Kalaallit Nunaanni malittarisassaqaanngilaq.

Siunnersuutigineqarpoq § 331 a-mi piumasaqaataasumik pisortat unnerluussinissaat pillugu aalajangersakkamik nutaamik ikkussisoqarnissaa, taassuma kingorna inuk, § 302-mi ilaatinneqartoq, soorlu assersuutigalugu pinerlineqartoq, piumasaqaataasumik pisortat unnerluussinissaannik piumasaqarsinnaanngortillugu, inatsit malilluguutaqqisitaasumik pisortat unnerluussinissaat piumasaqaataappat. Pinerlineqartoq politii nut nalunaarutiginnittuuppat, taava tamanna pisortat unnerluussinissaannik piumasaqarnertut isigineqassaaq, imaassimanngippat allamik nalunaarummi allaqqasoaqartoq. Namminerisamik unnerluussineq

aallartippat, taava pisortat unnerluussinissaat piumasarineqarsinnaajunnaassaaq. Aammattaaq siunnersuutigineqarpoq, unnerluussinissamut oqartussat piumasaqarnermik naammassinninnissamut itigartitsisinnaasut, pisooqataasooq malersuinissamut ilaaqqusaanngippat. Piumasaqarneq taamaallaat pisooqataasut ilaannaanut tunngappat, pisooqataasinnaasulli allat mattunnagit, unnerluussinissamut oqartussat malersuinissaq annertusisinnaavaat taakkua ilaatinneqartunngortillugit, imaassimannngippat piginnaatitaasup oqaaseqaateqarnissamut periarfissinneqarnermi kingornatigut tamatumunnga akerliusoq.

Aalajangersakkap siunnersuutigineqartup kingunerivaa, pisortat utaqqisitaasumik unnerluussisimatillugit, suliat suliarineqarnissaannut malittarisassanik aalajangersaasoqarnissaa.

Suliani ataqqinassutsimik ajuallatsitsinermut tunngasuni erseqqinnerusumik taaneqartuni pisortat utaqqisitaasumik unnerluussuteqarsinnaanerisa pinerluttulerinermi inatsimmut eqqunneqarnerata kinguneranik aalajangersagaq eqqunneqartussatut siunnersuutigineqarpoq.

§ 311 a, imm. 1-imut siunnersuutip siullertut kingunerissavaa, suliani aatsaat Kalaallit Nunaanni eqqartuussisarnermik inatsimmi § 302 malillugu tamatumunnga pisinnaatitaasumit qinnuteqaat saqqummiunneqarpat, pisortat unnerluussisinnaanerat. Tamanna isumaqarpoq innarligaasup unnerluussisoqarnissaa nammineerluni qinnuteqaatigissagaa. Innarligaasooq nammineq aalajangiisinnaatitaanngippat, nammineq aalajangiisinnaatitaanngitsut eqqartuussinerup ingerlanerani inissimanerat pillugu maleruagassat assigisaanik atorneqassapput. Innarlerneqartoq toqkkut qimagussimappat imaluunniit toqkkut qimagutereersumut sammititamik iliuuserisaq pinerluutaappat, unnerluussuteqarnissamut pisinnaatitaaffik toqkkut qimagussimasup katissimasaanut, inooqataanut, angajoqqaavinut, meeraanut imaluunniit qatannugutaanut nuunneqassaaq.

Aappaattut pisinnaatitaasup nalunaaruteqarnera pisortat unnerluussuteqarnissaannut qinnuteqaatitut isigineqassaaq, nalunaaruteqarnermi allamik takusaqartoqarsinnaanngippat. Tamatuma kingunerissavaa Kalaallit Nunaanni eqqartuussisarneq pillugu inatsimmi § 302 malillugu pisortat unnerluussuteqarnissaannik qinnuteqarnissamut pisinnaatitaasup politiiunut nalunaaruteqarnera pisortat unnerluussuteqarnissaannik qinnuteqaatitut isigineqassaaq.

Pingajuattut namminerisamik unnerluussuteqarneq  
aallartinneqareersimappat, pisortat unnerluussuteqarnissaat  
qinnuteqaatigineqarsinnaanngilaq.

Sisamaattut unnerluussuteqarnermut oqartussat pisortat  
unnerluussuteqarnissaannik qinnuteqaat itigartitsissutigisinnaavaat,  
tamatumani pisooqataasut ilaasa malersorneqarnissaat  
mattunneqarsimappat.

Tallimaattut pisortat unnerluussuteqarnissaannik qinnuteqaat pisuusut  
ilaannaannut tunngasoq, pisooqataasimasinnaasut ilaat  
mattunneqanngippata, unnerluussisutut oqartussat malersuineq  
annertusisinnaavaat taakku aamma ilaatilerlugit, pisinnaatitaasoq tamanna  
pillugu oqaaseqaateqarnissamut periarfissinneqareermermi kingorna  
tamatumunnga akerliunngippat. Taamaappalli aalajangersakkami pkt. 4.  
atorneqassaaq, tak. qulaani unnerluussisutut oqartussat allaaserineqarnerat.

Taamaattoq suliani tamat mianerineqarnisaasa unnerluussuteqarnissaq  
pisariaqartippassuk, pinerluttulerinermermi inatsimmi § 317, imm. 1 malillugu  
innarlugaasup qinnuteqarnissaa pisariaqartinneqanngilaq.

§ 311 a, imm. 2-mi siunnersuutigineqarpoq aalajangersakkami imm. 1  
apeqqutaatinnagu, naalagaaffiup unnerluussisua aamma politiit pisortaat  
kinguartinneqarsinnaanngitsunik iliuseqarsinnaassasut,  
unnerluussisoqarnissaannik aalajangiinissamut imaluunniit  
qinnuteqarnissamut qanoq isummernissaa suli naluneqartutut  
isumaqarfigineqarpat. Aamma apeqqutaavoq, unnerluussisoqarnissaannik  
aalajangiisoqarnissaa imaluunniit tamatuminnga qinnuteqartoqarnissaa  
pissutsit aallaavigalugit ilimagineqarsinnaanera. Qinnuteqaat  
eqqartuussuteqartinnagu imm, 1 malillugu utertinneqarpat, malersuineq  
unitsinneqassaaq, taamatulli issanani unnerluussisutut oqartussat  
nalilerpassuk tamat mianerineqarnissaat pissutigalugu malersuineq  
ingerlaqqittariaqartoq.

Aalajangersakkap danskit eqqartuussisarneqarmik inatsisaanni § 720, imm.  
1 aamma imm. 2 assigaa, tak. inatsimmut nalunaarut nr. 1145, 29. september  
2020-meersoq.

Tamatuma saniatigut inatsisissatut siunnersuummut oqaaseqaatini  
nalinginnaasuni imm. 2.1 innersuussutigineqarpoq.



*Nr. 3-mut*

Kalaallit Nunaannut eqqartuussisarnermik inatsimmi § 452, imm. 2 malillugu, unnerluutigineqartoq inerteqqutaanngitsumik ilisimatitsissutigineqartumik pissuteqarluni takkutinnngippat imaluunniit nassuiaateqarumanngippat, eqqartuussiviup suliap unnerluutigineqartup nassuerutiginninneratigut suliarinissaanut taarsiullugu, uppersaatinik saqqummiussinertaqanngitsumik suliaq aalajangiiffigisinnaavaa. Taamaattoq tamanna taamaallaat atuuppoq, suliap suliarineqarnerani pineqaatissiisummut tunngatillugu akiliisitaanissamiik, arsaarinninnissamiik, biilersinnaanermut allagartamik arsaagaanissamiik aamma taarsiiviginninnissamiik allaanerusumik apeqquummik qaqitsusoqarsimanngippat, aammalu suliaq unnarluutigineqartumut akuliunermik annerusumik kinguneqassanngippat.

§ 452, imm. 2-mut siunnersuutikkut, allannguisoqarpoq, eqqartuussamut illersuisut, arsaarinninneq aamma pisinnaatitaaffiagaaneq pinerluuteqarnermut inatsisitigut malitsiusussatut siunnersuutigineqarnerannut kinguneqaataasumik.

Tamatuma saniatigut inatsisissatut siunnersuummut oqaaseqaatini nalinginnaasuni imm. 2.4 innersuussutigineqarpoq.

*§ 3-mut*

*Imm. 1*-imi siunnersuutigineqarpoq, inatsit ulloq [...] atuutilissasoq.

*Imm. 2*-mi siunnersuutigineqarpoq, pinerluttulerinermi inatsimmi § 215, imm. 3 malillugu malittarisassat aalajangersarneqartut, tak. inatsimmut nalunaarut nr. 1045, 7. september 2017-imeersoq, atuutiinnassasut, atorunnaarsinneqarnissaat imaluunniit malitassianik pinerluttulerinermi inatsimmi § 215, imm. 4 malillugu atuutilersinneqartunik taarserneqarnissaasa tungaannut.

# Inatsisissatut siunnersuutip inatsisinut atuuttunut sanilliunnera

## § 1

Kalaallit Nunaanni pinerluttulerinermik inatsimmi, tak. inatsisitut nalunaarut nr. 1045, 7. september 2017-imeersoq, inatsit nr. 1718, 27. december 2018-imeersumi § 2-kkut, inatsit nr. 168, 27. februar 2019-imeersumi § 1-ikkut aamma inatsit nr. 1056, 30. juni 2020-meersumi § 1-ikkut allanngortinneqartumi tulliuuttunik allannguisoqassaaq:

## § 20. ---

Imm. 2. § 99-imik unioqqutitsineq inuinnarnit unnerluussutaassaaq.

1. § 20, imm. 2-mi, »unnerluussut,«-ip kingorna ilanngunneqassaaq *pkt. 2-tut*: »Innarligaasup qinnuteqarneratigut pisortanit unnerluutiginnittoqarsinnaavoq  
1) suliani sakkortuumik pisuutitsineq eqqortuunngippat,  
2) suliani pisuutitsineq tusagassiuutit amerlasuunniit atuarneqartartut imaasigut saqqummiunneqarsimappat imaluunniit siaruaanneqarluni, pisuutitsinerlu innarligaasumik annertuumik ajoqusiisinnaappat,  
3) suliani inuk pissutsimik pisortani atorfimminik suliaminilluunniit annaasaqassutigisinnaasaanik pasillerneqarpat, imaluunniit  
4) Suliani, sakkortuumik pasilliineq kinaassutsimik isertuussilluni siaruaanneqarsimappat.«.

§ 22. Namminerisamik unnerluussisinnaatitaaneq atorunnaarsinneqassaaq, innarligaasooq innarlerneqarnerminiit tunngavissaqartumik unnerluutiginnissummik suliakkiussisimanngippat qaammatit arfinillit iluini.

*Imm. 2.* Unnerluussiniartut unnerluussaasulluunniit arlaqarpata taava piffissarititaq pineqartunut ataasiakkaanut immikkut atuutissaaq.

2. § 22, *imm. 1*, ikkunneqassaaq »Namminerisamik unnerluussut«-ip kingorna: »aamma qinnuteqarnikkut pisortanit unnerluutiginnittoqarsinnaavoq«, aamma og »suliani« kingorna: »qinnutigaluguluunniit suliakkiussani«, aamma »eqqartuussisulersuussinikkut« kingorna: »qinnutigalugu unnerluussinerup saqqummiunnerani«.

3. § 22, *imm. 2-mi pkt. 2-tut* inissinneqassaaq: »Pisortanit unnerluutiginninnissamut killigititaq unnerluussaasut ilaannut qaangiutereersimappat ilaannulli suli atuulluni, taava unnerluussisussaataasup aalajangissavaa pisortanit unnerluutiginninnissap akuersissutigineqarnissaa.«

*Imm. 3.* Pisortanit unnerluutiginnittoqarnissaanut periarfissaq atorunnaarsinneqassaaq, innarligaasup toqkkut qimagunneraniit qaammatit 6-t qaangiussimappata.

**§ 77.** ---

*Imm.2.* Tassungaa aamma atuuppoq kinaluunniit, *imm. 1*-imut pissutsinut attuumassuteqanngikkaluarluni, pinngitsaaliilluni kinguaassiuutitigut atoqateqarsimappat imaluunniit kinguaassiuutitigut allatut iliuseqarpat. Tak. § 91.

**§ 111.** Tillitanik paarisartoq pillaatisissaaq inatsisinik unioqutitsinikkut pissarsiarineqarsimasunik tunineqarsimaguni, allatigulluunniit iluanaaruteqarsimaguni, pinerluuteqarsimasutut eqqartuussivimmi akisussaasunnngortinneqarsinnaavoq, aammalu unioqutitsinikkut toqqortaqaarnermi, paarisqaarnermi, angallassinermi allatigulluunniit allap unioqutitsilluni iluanaarutigisinnaasaanik ikiuussimanermi pinerluuteqarsimasutut eqqartuussinikkut akisussaasunnngortinneqarsinnaavoq  
*Imm. 2.* ---

**§ 120.** Pisinnaaatitaanernik annaasaqarneq, tak. kapitali 36 aamma arsaarinninneq, tak. kapitali 37, eqqartuussissutigineqarsinnaapput pineqaatissiisummut suugaluartumulluunniit allamut ilanngullugit.

**4. § 22,** *imm. 3*-mi »namminerisamik unnerluussineq«-up kingorna ikkunneqassaaq: »imaluunniit pisortanit unnerluutiginninnissamut qinnuteqarneq«.

**5. § 77**-imi *imm.3*-tut ikkunneqassaaq: »*Imm. 3.* Pineqaatissiisummik aalajangiiniarnermi immikkut pingaartinneqassaaq isiginiassallugu eqqunngitsuliorneq inatsisinik unioqutitsinermut attuumassuteqartoq meeqqamut 18-it inorlugit ukiulimmut iliuserineqarsimappat«.

**6. § 111,** *Imm. 1*-mi , »pinerluttulerinermi inatsisitigut akisussaataitanermik kinguneqarsinnaavoq« kingorna ilanngunneqassaaq: »iliuserisaq § 111 a-mut ilaanngippat«.

**7. § 111-p** kingorna ikkunneqassaaq:

»**§ 111 a.** Aningaasanik malunnarunnaartitsiniaasutut eqqartuunneqassaaq inuk aningaasanik pinerluuteqarnikkut toqqaannartumik toqqaannanngitsumilluunniit pissarsiarisimasaminik allanngortitsisoq imaluunniit nuussisoq, inatsisinik unioqutitsinikkut pinngorfeqaarnerat toqqorterniarlugu imaluunniit malunnarunnaartinniarlugu.«.

**8. § 120** peerneqassaaq.

§ 135. Eqqartuussiviup pineqaatissiinermini atugassatut aamma aalajangiussinnaavaa pineqaatissineqartup, pinerluttunik isumaginnittoqarfiup aalajangersagai malillugit 1-2) ---

3) Tarnip pissusaanik ilisimatuumit/kinguaassiutinik ilisimatuumit katsorsartinnissaq malissagaa.

*Imm. 2. ---*

§ 168. Pisuussutitut ajunngitsorsiassaatinik inummit pinerluummut pisuutitaasumit pigineqartunik tamakkiisumik ilaannakortumilluunniit arsaarinnittoqarsinnaavoq, imaappat

1) ---

2) inatsisinik unioqqutitsineq immikkut ittumik sakkortussuseqarpat.

*Imm. 2-5. ---*

§ 196. ---

*Imm. 2.* Aalajangersagaaq imm 1, oqaaseqatigiinni siullerniittoq

sanioqqunneqarsinnaavoq

4) eqqartuussaq innarlagaanissaanut illersorniarlugu tamanna pisariaqartutut isigineqartariaqarpat,

5) pinerluuteqarsimasunik isumaginnittoqarfiupp aaqqinniffiutaaniinissaniktamakkiisumikatuinissap tamanna pisariaqalersippagu.

*Imm. 3 ---*

9. § 135, *imm. 1*, nr. 3-mi, »malissgaai« kingorna ilanngunneqassaaq: »tarnip pissusaanik imaluunniit«.

§ 120. Pisinnaatitaaffimmik annaasaqarneq, tak. kapitali 36, aamma arsaarinnineq, tak. kapitali 37, pineqaatissiissutitut allanut tamanut atatillugit eqqartuussutigineqarsinnaapput.

10. Immikkoortoq II-mut qulequtsiussassaaq ima allanneqassaaq:

**»Immikkoortoq II  
Pineqaatissiissutit allallu  
pinerluuteqarsimanermi  
eqqartuussisutigoortumik  
kinguneqartitsinerit«**

11. § 168, *imm. 1*, nr. 2-mi, »inatsisinik unioqqutitsineq«-rup kingorna ilanngunneqassaaq: »imaluunniit aanngajaarnartut pillugit inatsisinik unioqqutitsineq«.

12. § 196 *imm. 2.* ikkunneqassapput nr. 3-p kingorna normutut nutaatut:

»4) eqqartuunneqartoq

perorsaariaatsikkut, nakorsatut imaluunniit allatigut immikkut ittumik ikiorniarlugu,

5) pinngitsoortinniarlugu, inissinneqarsimasup qanigisami arlaata suliffigisaani inissinneqarnissaa,

6) pinngitsoortinniarlugu, eqqartuunneqarluni inissinneqarsimasup pinerluffigisimasata atorfilittap imaluunniit taassuma qanigisaata suliffigisaani inissinneqarnissaa,«.

Nr. 4 aamma 5 tamatuma kingorna nr. 7 aamma 8-nngussapput.

§ 215. ---  
Imm. 2-3. ---

§ 215. ---  
Imm. 2. ---  
Imm. 3. Kalaallit Nunaanni Pinerluttunik Isumaginnittoqarfiup aqutsisuata, toqqissisimanissaq – isumannaallisaanerlu eqqarsaatigalugit eqqartuussivimmi killeqartitsinissaq malittarisassatut aalajangersinnaavaa imm. 1, pkt. 1 malillugu.

§ 221.

13. § 215-imi *imm. 2-p* kingorna *imm. 3-tut* ikkunneqassaaq:

»*Imm. 3.* Isertitsiviup nammineerluni aalajangissavaa pulaartut siumoortumik pulaarnissaminnut akuersissummik piniarsinnaanissaat. Pulaarnissamut akuersissummut ilanngunneqarsinnaavoq pulaartup isilernermini misissorteqqaarnissaa. Misissuineq pulaartup atisat atugaanik misissuinerusinnaavoq, annerusumillu qallikkut atisaanik nassatarisaanillu misissuinerusinnaalluni«.  
*Imm. 3* taamaalilluni *imm. 4-nngussaaq.*

14. § 215-imi, *imm. 3, imm. 4-nngortinneqartoq,* allanngortinneqassaaq: »*imm. 1, pkt. 1.* malillugu« til: »pulaarnissamut«

15. § 221-p kingorna § 222-p qulequtaara siorna ikkunneqassaaq:

»§ 221 a. Inissiisarfiup pisortaata imaluunniit inuup tamatumunnga piginnaatitaasup aalajangersinnaavaa inissinneqarsimasoq supoorsilluni misiligummik imaluunniit quumik misiligummik tunniussissasoq, imigassamik, ikiaroorartunik allatigulluunniit akuutissanik inatsisit nalinginnaasumik atuuttut malillugit inertequtaasunik iisaqarsimasinnaanera misissorniarlugu.

*Imm. 2.* § 221, *imm. 4,* assigisaanik atorneqassaaq.

*Imm. 3.* Supoorsilluni misiligutit nakkutigineqarnissaasa aamma quumik misiligutit nakkutigineqarnissaasa piviusunngortinnissaannut Kalaallit Nunaanni Pinerluuteqarsimasunik Isumaginnittoqarfiup aqutsisui maleruagassanik aalajangersaassapput.«.

**§ 226.** Inissiisarfimmi ineqartoq, aalajangersagaasunik unioqqutitsinermi, maleruagassani aalajangersarneqarsimappat unioqqutitsineq pissusissanik malinnngitsutut pineqaatissinneqarnermik kinguneqarsinnaavoq inissiisarfimmi aqutsisumit piginnaatinneqartumilluunniit.

1-3) ---

4) inatsisinik unioqqutitsinermi, unioqqutitsineq inissiisarfimmi torersumik pissuseqarnissamik isumannaallisaanermillu namminerisamik kanngunarsaaneruppat.

5) Maleruagassanik Kalaallit Nunaanni Pinerluuteqarsimasunik Isumaginnittoqarfiup aqutsisuunit aalajangersagaasunik unioqqutitsinermi, inatsisitigut aalajangersagaappat pissusissanik malinnngitsutut pineqaatissinneqarnermik kinguneqarsinnaavoq

6) Maleruagassanik inissiisarfimmi aqutsisuunit aalajangersagaasunik unioqqutitsinermi, inatsisitigut aalajangersagaappat pissusissanik malinnngitsutut pineqaatissinneqarnermik kinguneqarsinnaavoq.

**§ 227.** ---

*Imm.* 2. Inimut kisimiiffissamut inissinneqarneq taamaallaat atuutissaaq ukuningga unioqqutitsisoqarsimappat:

1-2) ---

3) Inissiisarfimmiittoqatinut sulisunulluunniit nakuuserneq nakuusernissamilluunniit sioorasaarineq

4) Imigassamik aanngajaarniutinilluunniit eqqussisimagaanni, paarisaqaraanni atuisimagaanniluunniit, aamma

5) allatigut sakkortuumik akulikitsumillu unioqqutitsisarsimagaanni.

**16.** § 226-mi nr. 3-p kingorna normutut nutaatut ikkunneqassapput:

»4) § 221 a malillugu supoorsilluni misiligummik imaluunniit quumik misiligummik tunniussinissaaq itigartitsissutigineqarpat, 5) imigassamik, ikiaroorartunik imaluunniit akutissanik allanik inatsit nalinginnaat malillugit inerteqqutaasunik iisisimanermi,«.

Nr. 4-6 tamatuma kingorna nr. 6-8-nngussapput.

**17.** § 227, *imm.* 2-mi nr. 3-p kingorna normutut nutaatut ikkunneqassaaq:

4) § 221 a malillugu supoorsinissamut quumillu misissuinissamut itigartitsinermi,

5) imigassartorsimagaanni, aanngajaarniutinilluunniit atuisimagaanni.

Nr. 4 aamma 5 taamaalillutik nr. 5 aamma 6-inngussapput.

**18.** § 227, *imm.* 2, nr. 4, *imm.* 2, nr. 5-inngortussap »imaluunniit aanngajaarniutinik« kingorna ikkunneqassaaq: imaluunniit aanngajaarniutit allat inatsisit nalinginnaasut atuuttut malillugit inerteqqutaasut. «

## § 2

Kalaallit Nunaanni eqqartuussisarneq pillugu inatsimmi, tak. inatsisitut nalunaarut nr. 1581, 13. december 2016-meersoq, inatsit nr. 1056, 30. juni 2020-meersukkut kingullermik allanngortinneqartumi tulliuttunik allannguisoqassaaq:

### § 44. ---

*Imm. 2.* Eqqartuusseqataasut peqataatinneqartanngillat eqqartuussissutini akiligassiinerniit, arsaarinninnerniit, biilersinnaanermut allagartaajagaanerniit, taarsisussanngortitaanerniillu annerusunik eqqartuussissutiginninngikkaanni.

*Imm. 3.* ---

### § 311. ---

1. § 44, imm. 2-mi, »sakkortuumik pineqaatissiissut«-ip kingorna ilanngunneqassaaq: »imaluunniit inatsisitigut kinguneqartitsineq«.

2. § 311-mi § 312-ip qulequtaata siornanut ikkunneqassaaq:

»§ 311 a. Pisortat inatsisit malillugit unnerluussuteqarnissaannut qinnuteqarnissaq piunasaqaataappat, taamaallaat unnerluussuteqartoqarsinnaavoq tamanna pillugu qinnuteqaat § 302 malillugu namminerisaminik unnerluussuteqarsinnaasoq tamatumunnga qinnuteqartuuppat. Pisinnaatitaasumit nalunaarutiginninneq pisortat unnerluussinissamik qinnuteqaataattut isigineqassaaq, nalunaarutiginninnermit allamik takusaqarsinnaanngikkaanni. Namminerisamik unnerluutiginninneq aallartinneqarsimappat, pisortat unnerluutiginninnissaat qinnuteqaatigineqarsinnaanngilaq. Unnerluutiginninnermut oqartussat pisortat unnerluussinissamut qinnuteqaataat malissallugu itigartitsissutigisinnaavaat, arlaata pisooqataasup malersorneqarnissaa pisinnaajunnaarsillugu. Qinnuteqaat pisooqataasut ilaannaannut tunngasuuppat, pisooqataasut allat mattutinnikkaluarlugit, unnerluussinermut oqartussat malersuineq taakkununnga annertusisissinnaavaat, pisinnaatitaasoq tamanna pillugu oqaaseqarnissamut periarfissinneqareernermi kingorna tamatumunnga akerliunngippat. Taamaassappat oqaaseqatigiit sisamaat atorneqassaaq.  
*Imm. 2.* Naalagaaffiup unnerluussisua aamma politiit pisortaat imm, 1-imi aalajangersakkat apeqqutaatinnagit kinguartinneqarsinnaanngitsunik

iliuuseqarsinnaapput, iliuserineqarsimasoq  
isumaqarfigineqarpat tassaasoq  
unnerluussuteqarnissamut aalajangiisinnaasoq  
imaluunniit tamatumunnga qinnuteqarsinnaasoq,  
ilisimaneqanngitsoq aamma pissutsit  
aallaavigalugit isumaqartoqarsinnaalluni  
unnerluussuteqarnissaq aalajangiunneqassasoq  
imaluunniit qinnuteqaatigineqarluni. Qinnuteqaat  
eqqartuussuteqartoqartinnagu imm, 1 malillugu  
utertinneqarpat, malersuineq unitsinneqassaaq,  
unnerluussuteqarnermut oqartussat  
nalilinnigippassuk tamat mianerineqarnissaat  
pissutigalugu malersuinerup  
ingerlatiinnarneqarnissaa pisariaqartoq.«.

§ 452. ---

*Imm. 2.* Unnerluutigineqartoq  
takkutinngitsoorpat pissutissaqavilluni  
takkutinngitsoornissaq nalunaarutigiginagu  
imaluunniit unnerluutigineqartoq  
nassuiaateqarumangippat tamatumunnga  
taarsiullugu eqqartuussisut suliassaq  
suliarisinnaavaat unnerluutigineqartoq  
nassuersimasutut naatsorsuutigalugu, sulissarlu  
uppernarsaasiisoqanngikkaluartoq  
aalajangiiffigalugu. Aatsaalli taamaattoqassaaq  
suliassaq suliarineqartillugu  
biilersinnaanermut allagartaajarneqarnissaamiit  
pineqaatissiissuteqarnissaq pillugu apeqqut  
unnerluutigineqartumut immikkut  
sunniuteqartumik pingaaruteqanngikkaangat.  
Eqqartuussut unnerluussissummi  
maluginiaqqusissuteqarnikkut  
sananeqarsinnaavoq.

*Imm. 3-4.* ---

3. § 452, imm. 2-mi, »allatut pineqaatissiineq«-  
up kingorna: »imaluunniit inatsisitigut  
kinguneqartitsineq« ilanngunneqassaaq.